

D.R. 14/2005

**RANG UNDANG-UNDANG PERBADANAN INSURANS
DEPOSIT MALAYSIA 2005**

SUSUNAN FASAL

BAHAGIAN I

PERMULAAN

Fasal

1. Tajuk ringkas dan permulaan kuat kuasa
2. Tafsiran

BAHAGIAN II PERBADANAN

INSURANS DEPOSIT MALAYSIA

Bab 1

Penubuhan

3. Penubuhan Perbadanan
4. Objektif Perbadanan
5. Meterai biasa dan meterai faksimili
6. Penyempurnaan dokumen
7. Penubuhan jawatankuasa
8. Pejabat Perbadanan
9. Kuasa untuk melantik Wakil dan ejen
10. Penubuhan subsidiari

Bab 2 Lembaga

Pengarah

11. Tugas dan komposisi
12. Undang-undang kecil Lembaga
13. Tempoh jawatan pengarah
14. Kehilangan kelayakan dan penamatan pengarah Lembaga

Rang Undang-Undang

Fasal

15. Tindakan dan prosiding Lembaga tidak terjejas oleh kekosongan, dsb.
16. Saraan dan elaun bagi pengarah
17. Tugas pengarah
18. Mesyuarat

Bab 3 Ketua Pegawai

Eksekutif

19. Pelantikan, fungsi dan kebertanggungjawapan
20. Terma dan syarat perkhidmatan

Bab 4 Pegawai dan

pekerja

21. Pelantikan, terma dan syarat perkhidmatan
22. Bantuan kewangan kepada pegawai, pekerja dan orang lain

Bab 5 Tugas dan

kuasa

23. Sekatan menyiasat secara khusus hal-ehwal pelanggan tertentu
24. Kerahsiaan
25. Kuasa Perbadanan
26. Pemerolehan dan pelupusan melibatkan Perbadanan
27. Kuasa untuk melantik konservator dan konservator tambahan, dsb.
28. Hak untuk melupus dan mengekalkan nilai harta

BAHAGIAN III

KEWANGAN

29. Kumpulan wang dan sumber kumpulan wang
30. Peminjaman wang kepada Perbadanan
31. Pelaburan dibenarkan
32. Tahun kewangan
33. Keperluan untuk menyimpan buku, rekod, akaun atau dokumen lain
34. Juruaudit
35. Penyata kewangan dan laporan tahunan

Perbadanan Insurans Deposit Malaysia

BAHAGIAN IV

INSURANS DEPOSIT

Bab 1 *Keanggotaan, pembatalan- dan penamatan*

36. Takrif
37. Keanggotaan disifatkan
38. Terma dan syarat-syarat keanggotaan
39. Pembatalan keanggotaan
40. Penamatan keanggotaan
41. Kesan pembatalan atau penamatan

Bab 2

Premium

42. Premium pertama
43. Premium tahunan
44. Pengiraan premium tahunan
45. Tiada tolakan atas bayaran premium
46. Surcaj premium
47. Caj lampau tempoh
48. Peraturan premium

Bab 3 *Bidang*

perlindungan

49. Bidang perlindungan
50. Deposit dengan institusi bergabung, dsb
51. Deposit institusi anggota diperolehi oleh institusi bukan anggota
52. Deposit disifatkan
53. Bukan sebahagian deposit

Bab 4

Bayaran

54. Bayaran
55. Bayaran wajib
56. Bayaran budi bicara
57. Bayaran pendahuluan

Rang Undang-Undang

Fasal

58. Tarikh mengira liabiliti
59. Bagaimana pulangan atau faedah atas deposit dikira bagi bayaran wajib
60. Perbadanan boleh membayar pulangan atau faedah atas bayaran wajib
61. Bagaimana pulangan atau faedah deposit dikira bagi bayaran budi bicara
62. Pulangan atau faedah atas deposit berkaitan indeks
63. Pelepasan liabiliti
64. Subrogasi
65. Penyerahhakan
66. Batasan masa bagi tuntutan

BAHAGIAN V

PEMERIKSAAN INSTITUSI ANGGOTA

67. Bank Negara Malaysia mengemukakan maklumat
68. Pemeriksaan
69. Pemeriksaan khas

BAHAGIAN VI TINDAKAN OLEH

PERBADANAN

70. Pemberitahuan mengenai takberdaya maju
71. Kuasa Perbadanan dalam hal institusi anggota takberdaya maju
72. Penyelesaian ketetapan
73. Penubuhan Jawatankuasa Pentaksir
74. Peruntukan berhubung dengan pengambilalihan kawalan di bawah perenggan 71(1)(c)
75. Kuasa mengurangkan modal syer dan membatalkan syer institusi anggota di bawah perenggan 71(1)(c)
76. Penggantungan prosiding
77. Pelanjutan masa
78. Perjanjian diatasi bagi maksud perenggan 71(1)(c)
79. Perbekalan dan pendahuluan lanjutan
80. Perjanjian atau transaksi kewangan
81. Peruntukan berhubung dengan pelantikan di bawah perenggan 71(1)(c) dan (d)

Fasal

82. Keutamaan bayaran dalam hal penggulungan institusi anggota
83. Pemakaian Akta Bank dan Institusi-Institusi Kewangan 1989 atau Akta Bank Islam 1983

BAHAGIAN VII

KESALAHAN

84. Pengemukaan diri sebagai institusi anggota
85. Pernyataan palsu
86. Kegagalan memberi maklumat, dsb.
87. Kesalahan am
88. Kesalahan oleh pertubuhan perbadanan atau bukan perbadanan atau oleh pengarah, pegawai, pengawal, dsb.
89. Kuasa Perbadanan untuk mengkompaun kesalahan
90. Mahkamah boleh memerintahkan pematuhan
91. Hukuman kewangan tambahan
92. Perintah pematuhan atau penyekatan
93. Mendapatkan kembali denda

BAHAGIAN VIII

PERUNTUKAN AM

94. Pengemukaan maklumat kepada Perbadanan
95. Pengemukaan maklumat kepada Bank Negara Malaysia
96. Pengiktirafan kehakiman
97. Penggulungan Perbadanan
98. Imuniti
99. Pemakaian dan ketidakpakaian Akta lain
100. Kuasa untuk membuat peraturan-peraturan, kaedah-kaedah, perintah, undang-undang kecil, arahan, garis panduan, pekeliling atau nota

JADUAL

RANG UNDANG-UNDANG

bernama

Suatu Akta untuk mengadakan peruntukan bagi penubuhan Perbadanan Insurans Deposit Malaysia, bagi mentadbir sistem insurans deposit di bawah Akta ini dan bagi perkara yang bersampingan atau berkaitan dengannya.

BAHAWASANYA kestabilan sistem kewangan adalah kunci pemutus pembangunan dan kemakmuran ekonomi Malaysia:

DAN BAHAWASANYA sistem insurans deposit adalah suatu komponen penting bagi jaring keselamatan kewangan kerana ia menggalak dan menyumbang kepada kestabilan sistem kewangan:

DAN BAHAWASANYA maksud sistem deposit insurans adalah untuk melindungi pendeposit daripada kehilangan sebahagian atau kesemua deposit mereka dalam hal keadaan suatu kegagalan bank, bagi membolehkan Perbadanan Insurans Deposit Malaysia untuk ditubuhkan di bawah Akta bagi menjalankan fungsi yang dimandatkan dengan cepat dan berkesan dan untuk mengadakan pengurusan risiko yang kukuh dalam sistem itu:

DAN BAHAWASANYA peruntukan khusus diperlukan demi kepentingan orang awam bagi memberi kuasa kepada Perbadanan untuk melaksanakan dengan segera tindakan ketetapan yang dinyatakan dalam Akta ini bagi membolehkan kos minimum dicapai kepada sistem kewangan itu:

DIPERBUAT oleh Parlimen Malaysia seperti yang berikut:

BAHAGIAN 1

PERMULAAN

Tajuk ringkas dan permulaan kuat kuasa

1. (1) Akta ini bolehlah dinamakan Akta Perbadanan Insurans Deposit Malaysia 2005.

(2) Akta ini mula berkuat kuasa pada tarikh yang ditetapkan oleh Menteri melalui pemberitahuan dalam *Warta* dan Menteri boleh menetapkan tarikh yang berlainan bagi mula berkuatkuasanya peruntukan yang berlainan Akta ini.

Tafsiran

2. (1) Dalam Akta ini, melainkan jika konteksnya menghendaki makna yang lain—

"aset" termasuklah apa-apa kemudahan pembiayaan Islam, kemudahan kredit konvensional, harta dan perniagaan atau perusahaan dalam apa-apa jenis;

"aset Islam" ertinya aset yang disenggara atau dimiliki melalui suatu perniagaan perbankan Islam atau perniagaan kewangan Islam;

"aset konvensional" ertinya aset selain daripada aset Islam;

"Bank Negara Malaysia" ertinya Bank Negara Malaysia yang ditubuhkan di bawah Akta Bank Negara Malaysia 1958 [*Akta 519*];

"berkaitan", berhubungan dengan suatu perbadanan, ertinya berkaitan mengikut pengertian seksyen 6 Akta Syarikat 1965 [*Akta 125*];

"bersekutu" ertinya suatu perbadanan yang tidak kurang daripada dua puluh peratus dan tidak melebihi lima puluh peratus daripada syer perbadanan itu dipegang oleh perbadanan lain, perbadanan yang disebut pertama itu adalah menjadi suatu perbadanan bersekutu kepada perbadanan yang lain itu;

"cagaran" termasuklah suatu gadai janji atau gadaian, sama ada di sisi undang-undang atau ekuiti, debentur, bil pertukaran, nota janji hutang, jaminan, lien atau sandaran, sama ada sebenar atau konstruktif, surat hipotekasi, tanggungan rugi, akujanji atau lain-lain cara untuk menjamin pembayaran atau pelepasan hutang atau liabiliti, sama ada pada masa sekarang atau pada masa hadapan, atau sama ada terletak hak atau kontingen;

"deposit" ertinya—

- (a) suatu deposit konvensional; atau
- (b) suatu deposit Islam;

"deposit diinsuranskan" ertinya deposit yang secara berasingan diinsuranskan sebagai deposit Islam atau deposit konvensional menurut seksyen 49;

"deposit Islam" ertinya sejumlah wang atau nilai wang yang diterima atau dibayar menurut terma oleh mana-mana orang, yang penerimaan dan pembayaran balik hendaklah menurut terma sesuatu perjanjian Syariah atas apa-apa asas termasuklah jagaan atau perkongsian keuntungan;

"deposit konvensional" ertinya deposit sebagaimana yang ditakrifkan di bawah seksyen 2 Akta Bank dan Institusi-Institusi Kewangan 1989 [*Akta 372*] dan tidak termasuk suatu deposit Islam;

"depositori pusat" mempunyai erti yang sama sebagaimana ditakrifkan di bawah seksyen 2 Akta Perindustrian Sekuriti (Depositori Pusat) 1991 [*Akta 453*];

"ditentukan", jika tiada cara disebutkan, ertinya ditentukan dari semasa ke semasa secara bertulis;

"ditetapkan", jika tiada cara disebutkan, ertinya ditetapkan dari semasa ke semasa melalui perintah yang disiarkan dalam *Warta*;

"dokumen" mempunyai erti yang sama sebagaimana ditakrifkan di bawah seksyen 3 Akta Keterangan 1950 [*Akta 56*];

"dokumen konstituen", berhubungan dengan suatu pertubuhan, perbadanan atau bukan perbadanan, ertinya statut, piagam, memorandum persatuan, perkara persatuan, kaedah-kaedah, undang-

undang kecil, perjanjian perkongsian, atau surat cara lain, yang di bawahnya atau dengannya pertubuhan itu diperbadankan atau ditubuhkan, atau struktur pengelolaan dan pentadbirannya, bidang fungsi, perniagaan, kuasa atau tugasnya yang dinyatakan, sama ada terkandung dalam satu dokumen atau lebih;

"ejen depository yang dibenarkan" mempunyai erti yang sama sebagaimana ditakrifkan di bawah seksyen 2 Akta Perindustrian Sekuriti (Depositori Pusat) 1991;

"kumpulan perniagaan" ertinya suatu kumpulan syarikat yang sesuatu institusi anggota itu adalah berkaitan atau bersekutu dengan syarikat lain dalam kumpulan yang sama;

"Gabenor" ertinya Gabenor Bank Negara Malaysia;

"harta" ertinya apa-apa harta alih atau tak alih dan termasuklah—

- (a) apa-apa hak, kepentingan, hakmilik, tuntutan, hak dalam tindakan, kuasa atau keistimewaan, sama ada pada masa sekarang atau pada masa hadapan, atau sama ada terletak atau kontingen, berhubungan dengan mana-mana harta, atau yang selainnya mempunyai nilai;
- (b) apa-apa dokumen pemindahhakan yang disempurnakan bagi memindahhakan, menyerahhakan, memperuntukkan, menyerahkan, atau selainnya memindahkan atau melupuskan harta jika orang yang menyempurnakan dokumen pemindahhakan itu adalah tuan punya atau pemilik, atau jika di dalamnya dia berhak mendapat suatu hak kontingen, sama ada bagi keseluruhan atau sebahagian kepentingan itu;
- (c) apa-apa sekuriti, termasuklah apa-apa saham, syer, debentur, bon, pinjaman saham, hak langganan atau waran boleh dipindahmilik;
- (d) apa-apa surat cara boleh niaga, termasuklah apa-apa nota bank, nota pembawa, bil Perbendaharaan, waran dividen, bil pertukaran, nota janji hutang, cek dan perakuan deposit boleh niaga;
- (e) apa-apa gadai janji atau gadaian, sama ada di sisi undang-undang atau ekuiti, jaminan, lien atau sandaran, sama ada sebenar atau konstruktif, surat hipotekasi atau resit amanah, tanggungan rugi, akujanji atau lain-lain cara

yang menjaminkan pembayaran atau pelepasan suatu hutang atau liabiliti, sama ada pada masa sekarang atau pada masa hadapan, atau sama ada terletak atau kontingen; dan

(f) apa-apa harta ketara atau tak ketara lain;

"institusi kewangan" ertinya suatu bank berlesen atau syarikat kewangan berlesen sebagaimana ditakrifkan di bawah seksyen 2 Akta Bank dan Institusi-Institusi Kewangan 1989 atau suatu bank Islam sebagaimana ditakrifkan di bawah seksyen 2 Akta Bank Islam 1983 [*Akta 276*];

"institusi anggota" ertinya mana-mana institusi kewangan yang disifatkan sebagai institusi anggota di bawah seksyen 37 yang keanggotaannya tidak dibatalkan di bawah seksyen 39 atau ditamatkan di bawah seksyen 40;

"Jawatankuasa Pentaksir" ertinya jawatankuasa yang ditubuhkan di bawah seksyen 73;

"kemudahan kredit konvensional" ertinya—

- (a) pemberian apa-apa pendahuluan, pinjaman, kredit perdagangan atau kemudahan lain dalam apa-apa jua bentuk atau dengan apa-apa jua nama di mana orang yang kepadanya pendahuluan, pinjaman, kredit perdagangan atau kemudahan lain telah diberikan mempunyai akses, secara langsung atau tak langsung, kepada kumpulan wang atau harta orang yang memberinya;
- (b) pemberian suatu jaminan atau peruntukan apa-apa cagaran berkenaan dengan kewajipan mana-mana orang; atau
- (c) apa-apa urusan niaga atau transaksi seumpama itu sebagaimana yang ditetapkan oleh Perbadanan;

"ketua eksekutif", berhubungan dengan suatu perbadanan, ertinya seseorang, tidak kira dengan apa jua nama, yang, sama ada secara individu atau bersesama dengan seseorang atau lebih, bertanggungjawab, tertakluk kepada kuasa pengarah, bagi penjalanan perniagaan dan pentadbiran perbadanan itu;

"Ketua Pegawai Eksekutif" ertinya ketua eksekutif Perbadanan;

"Kumpulan Wang Disatukan" ertinya Kumpulan Wang Disatukan Persekutuan yang ditubuhkan oleh Perlembagaan Persekutuan;

"Lembaga" ertinya lembaga pengarah Perbadanan;

"Menteri" ertinya Menteri yang dipertanggungjawabkan dengan tanggungjawab bagi kewangan;

"meterai faksimili" ertinya suatu pendua kepada meterai biasa Perbadanan;

"orang terjejas" ertinya—

- (a) mana-mana syarikat yang mempunyai tugas atau liabiliti di bawah suatu kemudahan pembiayaan Islam atau kemudahan kredit konvensional kepada Perbadanan atau mana-mana subsidiari Perbadanan, sama ada pada masa sekarang, atau pada masa hadapan, atau sama ada terletak atau kontingen;
- (b) mana-mana subsidiari syarikat yang disebut dalam perenggan (a);
- (c) mana-mana syarikat yang telah menyediakan jaminan bagi pelaksanaan atau penunaian suatu tugas atau liabiliti yang terhutang oleh mana-mana orang kepada Perbadanan atau mana-mana subsidiari Perbadanan, sama ada pada masa sekarang, atau pada masa hadapan, atau sama ada terletak atau kontingen; atau
- (d) mana-mana syarikat yang sekurang-kurangnya lima peratus daripada modal syernya telah digadaikan, disandarkan atau digadaijanjikan oleh mana-mana orang untuk menjamin pelaksanaan atau pelepasan suatu tugas atau liabiliti yang terhutang oleh mana-mana orang kepada Perbadanan atau mana-mana subsidiari Perbadanan, sama ada pada masa sekarang atau pada masa hadapan, atau sama ada terletak atau kontingen;

"orang terjejas utama" ertinya mana-mana syarikat yang disebut dalam perenggan (a) takrifan "orang terjejas";

"pegawai", berhubungan dengan suatu institusi anggota atau seseorang terjejas, mempunyai maksud yang sama sebagaimana ditakrifkan di bawah seksyen 4 Akta Syarikat 1965 dan, sebagai tambahan kepadanya, termasuklah seorang yang dilantik di bawah perenggan 71(1)(c) untuk mengambil alih kuasa suatu institusi anggota atau seorang penerima, pengurus, penerima dan pengurus atau pelikuidasi yang dilantik oleh mahkamah;

"pejabat" termasuklah ibu pejabat, tempat utama perniagaan, cawangan, agensi, tempat perniagaan bergerak, tempat perniagaan yang diadakan dan disenggarakan bagi sesuatu tempoh terhadap sahaja dan mana-mana tempat perniagaan yang lain;

"kemudahan pembiayaan Islam" ertinya—

- (a) pemberian apa-apa pendahuluan, pinjaman, kredit perdagangan atau kemudahan lain dalam apa-apa bentuk atau dengan apa-apa nama di mana orang yang kepadanya pendahuluan, pinjaman, kredit perdagangan atau kemudahan lain telah diberikan mempunyai akses, secara langsung atau tak langsung, kepada kumpulan wang atau harta orang yang memberinya dan hendaklah termasuk, tanpa batasan, apa-apa perkiraan jual dan beli balik, perkiraan usahasama, jualan penangguhan bayaran, perkiraan perkongsian pulangan dan apa-apa perkiraan pembiayaan lain yang dibuat menurut konsep perbankan Islam dalam apa-apa bentuk atau dengan apa-apa nama;
- (b) sewa beli, sewa dan beli, pemajakan, pemfaktoran, perdagangan hutang dan urus niaga atau transaksi yang seumpamanya;
- (c) pemberian suatu jaminan atau apa-apa cagaran berhubungan dengan kewajipan mana-mana orang; atau
- (d) apa-apa urus niaga atau transaksi seumpama itu sebagaimana yang ditetapkan oleh Perbadanan;

"pendaftar kapal Malaysia" ertinya pendaftar kapal Malaysia yang dilantik di bawah subseksyen 14(1) Ordinan Perkapalan Saudagar 1952 [*Ord. 70/1952*] dan termasuklah Pendaftar Besar Kapal yang dilantik di bawah subseksyen 14(1) Ordinan itu;

"Pendaftar Syarikat" ertinya Pendaftar Syarikat yang telah ditetapkan di bawah subseksyen 7(1) Akta Syarikat 1965;

"pendaftar mahkamah" ertinya mana-mana Pendaftar, Timbalan Pendaftar, Penolong Pendaftar Kanan atau Penolong Pendaftar Mahkamah Tinggi yang dilantik di bawah seksyen 10 Akta Mahkamah Kehakiman 1964 [*Akta 91*];

"Pendaftar tanah" ertinya Pendaftar sebagaimana ditakrifkan di bawah seksyen 5 Kanun Tanah Negara [*Akta 561/1965*], Pendaftar sebagaimana ditakrifkan di bawah seksyen 4 Ordinan Tanah Sabah

[*Sabah Bab 68*] atau Pengarah sebagaimana ditakrifkan di bawah seksyen 2 Kanun Tanah Sarawak [*Sarawak Bab 81*], mengikut mana-mana yang berkenaan;

"pendeposit" ertinya seorang—

- (a) yang akaunnya telah atau akan dikreditkan berkenaan dengan wang yang menjadi suatu deposit Islam atau deposit konvensional atau sebahagian daripada deposit itu; atau
- (b) kepadanya suatu institusi anggota bertanggung berkenaan dengan suatu surat cara yang dikeluarkan bagi wang yang menjadi suatu deposit Islam atau deposit konvensional atau sebahagian daripada deposit itu;

"Pengerusi" ertinya pengerusi Lembaga;

"Perbadanan" ertinya Perbadanan Insurans Deposit Malaysia yang ditubuhkan di bawah seksyen 3;

"perbadanan" mempunyai erti yang sama sebagaimana ditakrifkan bawah seksyen 4 Akta Syarikat 1965;

"perniagaan kewangan Islam" ertinya mana-mana perniagaan kewangan yang tujuan dan operasinya tidak mengandungi apa-apa unsur yang tidak dibenarkan oleh agama Islam;

"perniagaan perbankan Islam" mempunyai erti yang sama sebagaimana ditakrifkan bawah seksyen 2 Akta Bank Islam 1983;

"pulangan" termasuklah apa-apa bentuk sewaan, keuntungan, dividen atau faedah, termasuk apa-apa fi atau hadiah, boleh dibayar atau akan diberikan berhubungan dengan apa-apa deposit, dokumen, perjanjian, perkiraan atau surat cara;

"sekuriti" mempunyai erti yang sama sebagaimana ditakrifkan di bawah seksyen 2 Akta Suruhanjaya Sekuriti 1993 [*Akta 498*];

"surat cara modal" ertinya syer keutamaan, pinjaman saham, hutang berjangka subordinat atau surat cara lain yang diluluskan oleh Bank Negara Malaysia sebagai layak untuk menjadi kumpulan wang modal bagi maksud di bawah Akta Bank dan Institusi-Institusi Kewangan 1989 dan Akta Bank Islam 1983;

"syarikat" mempunyai erti yang sama sebagaimana ditakrifkan di bawah seksyen 4 Akta Syarikat 1965;

"syer" mempunyai erti yang sama sebagaimana ditakrifkan di bawah seksyen 4 Akta Syarikat 1965;

"subsidiari" mempunyai erti yang sama sebagaimana ditakrifkan di bawah seksyen 5 Akta Syarikat 1965;

"tahun taksiran", berhubungan dengan pengiraan dan bayaran premium di bawah Akta ini, ertinya, tempoh yang bermula pada hari pertama bulan Januari dan berakhir pada tiga puluh satu Disember setiap tahun atau apa-apa tempoh lain yang diluluskan oleh Menteri;

"liabiliti" termasuklah hutang, kewajipan dan obligasi daripada setiap jenis, sama ada pada masa sekarang atau pada masa hadapan, atau sama ada terletakhak atau kontingen.

(2) Apa-apa sebutan dalam Akta ini mengenai "Akta ini" hendaklah, melainkan jika konteksnya menghendaki makna yang lain, disifatkan sebagai termasuk sebutan mengenai mana-mana kaedah-kaedah, peraturan-peraturan, undang-undang kecil, perintah, pemberitahuan, garis panduan, pekeliling, nota atau mana-mana perundangan subsidiari lain yang dibuat atau dikeluarkan di bawah Akta ini.

BAHAGIAN II

PERBADANAN INSURANS DEPOSIT MALAYSIA

Bab 1

Penubuhan

Penubuhan Perbadanan

3. Maka adalah dengan ini ditubuhkan suatu pertubuhan perbadanan dengan nama "Perbadanan Insurans Deposit Malaysia" yang kekal turun-temurun dan mempunyai suatu meterai biasa, dan boleh menyenangkan dan boleh disaman di atas nama perbadanannya.

Objektif Perbadanan

4. (1) Objektif Perbadanan adalah bagi—

- (a) mentadbir suatu sistem insurans deposit di bawah Akta ini;
- (b) memperuntukkan insurans terhadap kehilangan sebahagian atau kesemua deposit sesuatu institusi anggota;
- (c) memperuntukkan insentif untuk pengurusan risiko wajar dalam sistem kewangan; dan
- (d) menggalak atau menyumbang kepada kestabilan sistem kewangan.

(2) Dalam mencapai objektifnya di bawah perenggan (1)(b) dan (d), Perbadanan hendaklah bertindak dalam apa-apa cara bagi meminimumkan kos kepada sistem kewangan.

Meterai biasa dan meterai faksimili

5. (1) Meterai biasa dan meterai faksimili Perbadanan boleh dari semasa ke semasa dipecahkan, ditukar, diubah atau dibuat baru sebagaimana yang difikirkan patut oleh Perbadanan.

(2) Lembaga boleh mengadakan suatu meterai faksimili dan boleh membenarkan tanda tangan mana-mana pengarah dan setiausaha dibuat melalui cetakan atau cara mekanikal yang lain.

(3) Meterai biasa hendaklah digunakan dengan kebenaran Lembaga dan setiap surat cara yang meterai biasa itu dicapkan hendaklah ditandatangani oleh seorang pengarah dan hendaklah ditandatangani balas oleh setiausaha atau oleh seorang pengarah kedua atau oleh seorang lain yang dilantik oleh Lembaga, dan semua surat ikatan, dokumen dan surat cara lain yang berupa sebagai dimeteraikan dengan meterai biasa itu, disahkan sebagaimana yang disebut terdahulu, hendaklah disifatkan sebagai telah disempurnakan dengan sah sehingga dibuktikan sebaliknya.

(4) Setiap surat cara yang meterai faksimili dicapkan dan ditandatangani oleh seorang pengarah dan setiausaha melalui cetakan atau cara mekanikal lain hendaklah mempunyai kuasa yang sama dan sah seolah-olah meterai biasa itu telah dicapkan atas surat cara demikian dan surat cara itu telah ditandatangani menurut subseksyen (3).

(5) Semua mahkamah, hakim dan orang yang bertindak secara kehakiman hendaklah mengambil pengiktirafan kehakiman terhadap meterai biasa dan meterai faksimili.

(6) Meterai biasa dan meterai faksimili hendaklah disimpan dalam jagaan setiausaha atau seorang yang lain sebagaimana dibenarkan oleh Lembaga.

Penyempurnaan dokumen

6. Apa-apa dokumen atau surat cara yang, jika dilaksanakan oleh seorang yang bukan suatu pertubuhan perbadanan, tidak dikehendaki untuk berada di bawah meterai boleh dengan cara yang sama dilaksanakan oleh Perbadanan, dan apa-apa dokumen atau surat cara itu bolehlah dilaksanakan bagi pihak Perbadanan oleh mana-maha pegawai Perbadanan yang diberi kuasa bagi pihaknya oleh Lembaga secara am atau khusus.

Penubuhan jawatankuasa

7. Perbadanan boleh menubuhkan apa-apa jawatankuasa sebagaimana difikirkannya perlu atau suai manfaat untuk melaksanakan fungsinya.

Pejabat Perbadanan

8. Perbadanan boleh, di dalam atau di luar Malaysia, menubuhkan mana-mana pejabat sebagaimana difikirkannya perlu atau suai manfaat untuk melaksanakan fungsinya.

Kuasa untuk melantik Wakil dan ejen

9. (1) Perbadanan boleh, melalui surat cara di bawah meterai biasanya, melantik seseorang sama ada di Malaysia atau di suatu tempat di luar Malaysia untuk menjadi Wakilnya, dan orang yang dilantik itu boleh, tertakluk kepada surat cara itu, melakukan apa-apa tindakan atau melaksanakan apa-apa kuasa atau fungsi yang dia diberi kuasa oleh surat cara itu untuk melakukan atau melaksanakan.

(2) Perbadanan boleh, di dalam atau di luar, melantik mana-mana ejen sebagaimana difikirkannya perlu atau suai manfaat untuk melaksanakan fungsinya.

Penubuhan subsidiari

10. (1) Bagi maksud menjalankan fungsi, kuasa dan tugasnya di bawah Akta ini, Perbadanan boleh menubuhkan subsidiari sedemikian sebagaimana yang difikirkannya perlu atau suai manfaat.

(2) Mana-mana subsidiari Perbadanan yang ditetapkan olehnya hendaklah mempunyai kuasa dan imuniti Perbadanan, termasuklah kuasa dan imuniti yang diperuntukkan dalam seksyen 25, 26, 27, 28, perenggan 71(1)(b), Jadual Kedua, Ketiga dan Keempat sebagaimana yang ditetapkan oleh Perbadanan.

*Bab 2 Lembaga**Pengarah***Tugas dan komposisi**

11. (1) Maka hendaklah ada suatu lembaga pengarah yang bertanggungjawab bagi penjalanan urusan dan hal-ehwal Perbadanan dan hendaklah menjalankan segala kuasa dan melakukan segala tindakan yang boleh dijalankan atau dilakukan oleh Perbadanan.

(2) Lembaga hendaklah terdiri daripada pengarah yang berikut:

- (a) seorang Pengerusi yang dilantik oleh Menteri yang hendaklah mempunyai pengalaman dalam sektor swasta berkaitan;
- (b) Gabenor;
- (c) Ketua Setiausaha Perbendaharaan;
- (d) seorang pengarah yang dilantik oleh Menteri daripada sektor awam; dan
- (e) tidak lebih daripada tiga pengarah lain yang dilantik oleh Menteri yang hendaklah mempunyai pengalaman dalam sektor swasta berkaitan dan sekurang-kurangnya seorang daripada mereka hendaklah mempunyai pengalaman dalam sektor perbankan dan kewangan berkaitan.

(3) Tanpa menjejaskan subseksyen 18(2), tiada seorang pengarah pun dalam perenggan (b), (c), (d) atau (e) layak untuk dilantik sebagai Pengerusi oleh Menteri.

Undang-undang kecil Lembaga

12. (1) Lembaga boleh membuat dari semasa ke semasa mana-mana undang-undang kecil sebagaimana perlu atau suai manfaat berkenaan dengan pentadbiran, pengurusan, kawalan, urusan, aset dan hal-ehwal Perbadanan termasuklah—

- (a) fungsi, kuasa, tugas, saraan, faedah dan terma dan syarat-syarat perkhidmatan, kod kelakuan atau surcaj ke atas pegawai, pekerja dan ejen Perbadanan;
- (b) percanggahan kepentingan yang berhubungan dengan pengarah, pegawai dan pekerja Perbadanan yang sedang berkhidmat dan pengarah, pegawai dan pekerja yang telah meninggalkan perkhidmatan Perbadanan;
- (c) perlantikan, terma rujukan dan aktiviti jawatankuasa yang ditubuhkan oleh Perbadanan;
- (d) kaedah dan tata cara untuk dipatuhi oleh pengarah di mesyuarat Lembaga; atau
- (e) apa-apa perkara lain sebagaimana dikehendaki untuk diperuntukkan di bawah undang-undang kecil dalam Akta ini.

(2) Undang-undang kecil yang dibuat di bawah seksyen ini hendaklah mengikat semua orang yang undang-undang kecil itu terpakai.

(3) Mana-mana orang yang tidak mematuhi undang-undang kecil yang dibuat di bawah perenggan (1)(b) adalah melakukan suatu kesalahan di bawah Akta ini.

Tempoh jawatan pengarah

13. (1) Pengarah yang dilantik oleh Menteri di bawah subseksyen 11(2) hendaklah memegang jawatan selama suatu tempoh tidak melebihi tiga tahun dan adalah layak untuk dilantik semula.

(2) Gabenor dan Ketua Setiausaha Perbendaharaan, masing-masing hendaklah menjadi pengarah sepanjang tempoh mereka memegang jawatan sebagai Gabenor dan Ketua Setiausaha Perbendaharaan.

Kehilangan kelayakan dan penamatan pengarah Lembaga

14. (1) Tiada seorang pun boleh dilantik, atau dikekalkan, sebagai seorang pengarah Lembaga yang merupakan—

- (a) seorang ahli Dewan Negara atau Dewan Rakyat atau mana-mana Dewan Perundangan;
- (b) seorang pegawai sesuatu institusi anggota; atau
- (c) seorang ketua bahagian, atau mana-mana orang yang memegang mana-mana jawatan atau kedudukan seumpamanya dalam sesuatu parti politik.

(2) Menteri boleh menamatkan atau menggantung pelantikan mana-mana pengarah jika—

- (a) dia menjadi tak waras atau selainnya menjadi tak berupaya untuk menjalankan tugasnya;
- (b) telah dikenakan ke atas pengarah itu apa-apa bentuk sekatan atau pengawasan melalui bon atau selainnya, di bawah mana-mana undang-undang yang berhubungan dengan pencegahan jenayah, atau tahanan pencegahan bagi pencegahan jenayah atau pengedaran dadah, atau kediaman terhad, atau buang negeri atau imigresen;
- (c) dia menjadi seorang bankrap, menggantung pembayaran atau mencapai persetujuan dengan pemiutangnya;
- (d) dia telah dipertuduhkan dengan suatu kesalahan jenayah di bawah mana-mana undang-undang yang boleh dihukum pemenjaraan, sama ada hukuman pemenjaraan sahaja, atau sebagai ganti, atau sebagai tambahan kepada, suatu denda, di mana-mana mahkamah di dalam atau di luar Malaysia;
- (e) dia bersalah kerana salah laku serius berhubungan dengan tugasnya di bawah Akta ini; atau
- (f) dia tidak hadir, kecuali atas sebab cuti yang diberikan oleh Menteri dalam hal Pengerusi oleh Menteri atau oleh Pengerusi dalam hal semua pengarah lain daripada dua mesyuarat Lembaga dalam mana-mana tempoh dua belas bulan.

(3) Walau apa pun subseksyen (2), mana-mana pengarah yang dilantik oleh Menteri di bawah subseksyen 11(2) boleh pada bila-bila masa meletakkan jawatan dengan memberi notis bertulis tidak melebihi tiga puluh hari kepada Menteri.

Tindakan dan prosiding Lembaga tidak terjejas oleh kekosongan, dsb.

15. Lembaga boleh bertindak walau apa jua pun kekosongan, dan prosidingnya tidak boleh menjadi tak sah oleh—

- (a) ketidakhadiran mana-mana pengarah;
- (b) apa-apa kecacatan kemudiannya diketahui dalam pelantikan atau kelayakan mana-mana pengarah atau pembentukan Lembaga;
- (c) apa-apa tinggalan, kecacatan atau salah aturan dalam pengadaan atau penjalanan sesuatu mesyuarat; atau
- (d) kehadiran atau penyertaan seseorang yang bukan seorang pengarah Lembaga.

Saraan dan elaun bagi pengarah

16. Setiap pengarah yang menghadiri mana-mana mesyuarat Lembaga, hendaklah dibayar oleh Perbadanan apa-apa fi, saraan lain atau elaun sebagaimana yang diputuskan oleh Menteri, atas syor Lembaga.

Tugas pengarah

17. (1) Seorang pengarah Lembaga hendaklah, pada setiap masa, bertindak dengan jujur dan demi kepentingan Perbadanan dan menggunakan kebijaksanaan munasabah dalam melaksanakan tugas jawatannya.

(2) Seorang pengarah atau mana-mana orang yang pernah menjadi seorang pengarah tidaklah boleh—

- (a) menggunakan secara salah apa-apa maklumat yang didapati oleh sebab kedudukannya sebagai seorang pengarah untuk memperolehi, secara langsung atau tidak langsung, suatu faedah bagi dirinya atau bagi mana-mana orang lain; atau

(b) melakukan, memperkatakan atau menyiarkan apa-apa yang boleh memudaratkan kepentingan Perbadanan.

Mesyuarat

18. (1) Lembaga hendaklah bermesyuarat sekerap yang diperlukan tetapi tidak kurang daripada empat kali setahun.

(2) Pengerusi hendaklah mempengerusikan semua mesyuarat Lembaga dan semasa ketiadaannya, pengarah yang hadir hendaklah melantik seorang pengerusi di kalangan pengarah dalam perenggan 11(2)(e) daripada mereka untuk menjadi pengerusi dan orang yang dilantik itu hendaklah mempengerusikan dan mempunyai segala kuasa Pengerusi.

(3) Kuorum bagi mesyuarat Lembaga tidaklah boleh kurang daripada empat orang pengarah, sekurang-kurangnya dua daripadanya adalah terdiri daripada pengarah yang disebut dalam perenggan 11(2)(b), (c) atau (d).

(4) Keputusan Lembaga hendaklah diambil secara undi lebih suara pengarah yang hadir dan mengundi.

(5) Dalam hal suatu bilangan undi yang sama banyak, Pengerusi hendaklah mempunyai suatu undi pemutus.

(6) Suatu ketetapan secara bertulis, ditandatangani oleh semua pengarah yang pada masa itu berhak untuk menerima notis suatu mesyuarat pengarah, adalah sah dan berkesan seolah-olah ia telah diluluskan di suatu mesyuarat pengarah yang sewajarnya diadakan dan dijalankan dan apa-apa ketetapan boleh terdiri daripada beberapa dokumen dalam bentuk serupa, setiap satunya ditandatangani oleh seorang pengarah atau lebih.

(7) Tiada apa jua dalam seksyen ini boleh menghalang Pengerusi daripada membenarkan seorang pengarah untuk menggunakan video secara langsung, rangkaian televisyen atau kemudahan perhubungan atau multimedia lain yang sesuai untuk mengambil bahagian dalam mana-mana mesyuarat Lembaga jika, sebelum mesyuarat itu, pengarah itu, melalui pemberitahuan kepada Pengerusi, telah memohon bagi kebenaran itu.

Bab 3 Ketua Pegawai

Eksekutif

Pelantikan, fungsi dan kebertanggungjawapan

19. (1) Ketua Pegawai Eksekutif hendaklah dilantik oleh Menteri, atas syor Lembaga.

(2) Ketua Pegawai Eksekutif hendaklah bertanggungjawab dalam pentadbiran urusan dan hal-ehwal harian Perbadanan.

(3) Ketua Pegawai Eksekutif hendaklah bertanggungjawab menjawab dan bertanggungjawab menerangkan kepada Lembaga dalam penjalanan kuasa dan pelaksanaan tugasnya.

(4) Semasa ketiadaan atau ketakupayaan Ketua Pegawai Eksekutif, Lembaga boleh membenarkan seorang pegawai Perbadanan untuk melaksanakan tugas, fungsi dan tanggungjawab Ketua Pegawai Eksekutif.

Terma dan syarat perkhidmatan

20. Ketua Pegawai Eksekutif hendaklah—

- (a) bagi maksud Bab 4, disifatkan sebagai seorang pegawai atau pekerja Perbadanan dan tertakluk kepada terma dan syarat perkhidmatan; dan
- (b) menikmati apa-apa pampasan dan apa-apa kemudahan lain yang dibenarkan oleh Menteri, atas syor Lembaga.

Bab 4 Pegawai dan

pekerja

Pelantikan, terma dan syarat perkhidmatan

21. (1) Perbadanan boleh melantik mana-mana pegawai atau pekerja sebagaimana perlu untuk menjalankan urusan dan hal-ehwal Perbadanan dan pegawai atau pekerja sedemikian hendaklah memegang jawatan bagi apa-apa tempoh, menerima apa-apa saraan, elaun dan faedah, dan hendaklah tertakluk kepada apa-apa terma dan syarat perkhidmatan sebagaimana yang boleh diputuskan oleh Lembaga.

(2) Seorang pegawai atau pekerja Perbadanan hendaklah, pada setiap masa, bertindak secara suci hati dan mematuhi apa-apa kehendak, piawaian, tugas dan kod kelakuan termasuklah surcaj sebagaimana yang diperuntukkan dalam undang-undang kecil yang dibuat oleh Lembaga di bawah perenggan *I2(1)(a)*.

(3) Perbadanan boleh, dengan kelulusan Lembaga, menubuh dan menyenggara suatu kumpulan wang pencen atau simpanan bagi pegawai dan pekerjanya daripada wang Perbadanan.

Bantuan kewangan kepada pegawai, pekerja dan orang lain

22. Perbadanan boleh memperuntukkan—

- (a) subsidi, pemberian, kemudahan pembiayaan Islam atau kemudahan kredit konvensional, dengan atau tanpa pulangan atau faedah, bagi maksud perumahan, kenderaan, perubatan, dan pembiayaan atau pinjaman belas kasihan, kepada pegawai dan pekerjanya;
- (b) kemudahan pembiayaan Islam atau kemudahan kredit konvensional, dengan atau tanpa pulangan atau faedah, bagi maksud pendidikan atau biasiswa kepada pegawai dan pekerjanya atau mana-mana orang lain; dan
- (c) derma kepada mana-mana orang,

menurut apa-apa terma dan syarat sebagaimana yang boleh diputuskan oleh Lembaga.

Bab 5

Tugas dan kuasa

Sekatan menyiasat secara khusus mengenai hal-ehwal pelanggan tertentu

23. Tanpa menjejaskan kuasa penelitian, pemeriksaan, penyiasatan, siasatan atau ketetapan yang diberikan kepada Perbadanan, tiada apa-apa jua dalam Akta ini boleh—

- (a) membenarkan Menteri untuk mengarahkan Perbadanan; atau
- (b) membenarkan Perbadanan,

untuk menyiasat secara khusus mengenai hal-ehwal mana-mana pelanggan suatu institusi anggota.

Kerahsiaan

24. (1) Tiada pengarah, pegawai, pekerja atau ejen Perbadanan termasuklah seorang yang dilantik di bawah subseksyen 25(3) atau mana-mana orang yang kerana apa-apa jua sebab, mempunyai dengan apa-apa cara akses kepada apa-apa rekod, buku, daftar, surat-menyurat, atau apa-apa jua dokumen lain, atau bahan atau maklumat, yang berhubungan dengan urusan dan hal-ehwal Perbadanan, Bank Negara Malaysia, suatu institusi anggota atau seorang pelanggan Bank Negara Malaysia yang dia telah memperolehi semasa pelaksanaan tugasnya atau penjalanan fungsinya, boleh memberi, mengemukakan, menzahirkan, menyiarkan, atau selainnya mendedahkan, kepada mana-mana orang, dokumen, bahan atau maklumat demikian kecuali pendedahan itu diperlukan—

- (a) di bawah mana-mana undang-undang;
- (b) bagi pelaksanaan tugasnya atau penjalanan fungsinya di bawah Akta ini; atau
- (c) apabila dikehendaki berbuat demikian menurut undang-undang oleh mana-mana mahkamah.

(2) Seksyen ini tidaklah terpakai kepada apa-apa dokumen, bahan atau maklumat yang pada masa pendedahan itu adalah, ataupun telah dijadikan, tersedia ada menurut undang-undang kepada orang awam daripada apa-apa sumber.

(3) Tiada seorang pun yang mempunyai apa-apa dokumen, bahan atau maklumat yang pada pengetahuannya telah didedahkan dengan melanggar subseksyen (1) boleh dengan apa jua cara sekalipun mendedahkan dokumen, bahan atau maklumat kepada mana-mana orang lain.

(4) Jika Perbadanan dalam masa penjalanan mana-mana kuasanya, atau penunaian mana-mana tugasnya atau fungsinya, di bawah Akta ini atau di bawah mana-mana jua undang-undang lain, mengesyaki mana-mana orang telah melakukan mana-mana kesalahan di bawah Akta ini, atau mana-mana jua undang-undang lain, maka adalah sah di sisi undang-undang bagi Perbadanan untuk memberi maklumat mengenai pelakuan itu kepada seorang pegawai polis, atau menyampaikan mana-mana maklumat berhubungan dengan kesalahan itu kepada mana-mana institusi anggota atau orang lain yang terjejas oleh kesalahan itu atau kepada mana-mana pihak

berkuasa lain atau orang yang mempunyai kuasa untuk menyiasat di bawah, atau menguatkuasakan, peruntukan undang-undang yang di bawahnya kesalahan itu disyaki oleh Perbadanan telah dilakukan.

(5) Subseksyen (4) hendaklah berkuat kuasa dan berkesan sepenuhnya, walau apa pun ketakselarasan berkenaan dengannya, atau bertentangan dengannya, dalam Akta ini atau mana-mana undang-undang lain.

(6) Mana-mana orang yang melanggar subseksyen (1) atau (3) adalah melakukan suatu kesalahan dan boleh, apabila disabitkan, dikenakan suatu denda tidak melebihi tiga juta ringgit atau dipenjara bagi suatu tempoh tidak melebihi tiga tahun atau kedua-duanya.

Kuasa Perbadanan

25. (1) Perbadanan hendaklah mempunyai semua kuasa sebagaimana perlu untuk atau berkaitan dengan, atau semunasabahnya bersampingan kepada, bagi mencapai objektifnya, pelaksanaan fungsinya atau penunaian tugasnya.

(2) Tanpa menjejaskan keluasan subseksyen (1), bagi maksud Akta ini, Perbadanan boleh melakukan semua perkara yang perlu atau bersampingan kepada objektif Perbadanan dan, terutama sekali, Perbadanan boleh—

- (a) bagi maksud mengurangkan atau mengelakkan suatu risiko kepada sistem kewangan atau suatu kerugian terancam kepada Perbadanan—
 - (i) memperoleh aset daripada suatu institusi anggota;
 - (ii) membuat pinjaman atau pendahuluan dengan atau tanpa cagaran, atau jaminan dengan atau tanpa cagaran apa-apa pinjaman atau pendahuluan yang diperuntukkan, kepada suatu institusi anggota;
 - (iii) memperoleh, dengan cara cagaran atau selainnya, syer atau surat cara modal suatu institusi anggota dan memegang dan melupuskan syer atau surat cara modal itu; atau
 - (iv) membuat atau menjamin suatu deposit dengan suatu institusi anggota;

- (b) memegang, melupus atau selainnya berurusan dengan aset yang diperolehi daripada suatu institusi anggota;
- (c) meminjam atau meningkatkan kumpulan wang mengikut apa-apa cara yang difikirkan patut oleh Perbadanan;
- (d) memperolehi dan memegang apa-apa harta alih atau harta tak alih bagi kegunaannya sendiri dan melupuskan atau selainnya berurusan dengan harta demikian;
- (e) menjamin, menanggung rugi atau menjadi bertanggung bagi bayaran wang atau pelaksanaan apa-apa kewajipan;
- (f) menggadai janji, menggadai atau mewujudkan suatu lien untuk memastikan atau menjamin pelaksanaan kewajipannya atau kewajipan mana-mana orang lain;
- (g) membuat apa-apa perjanjian dengan mana-mana orang untuk mencapai objektifnya atau berhubungan dengan pelaksanaan fungsinya termasuklah suatu perjanjian perikatan strategik dengan Bank Negara Malaysia;
- (h) menyelesaikan atau mengkompromi apa-apa tuntutan oleh atau terhadap Perbadanan; atau
- (i) melakukan semua perkara yang lain yang perlu untuk menjalankan apa-apa kuasa Perbadanan.

(3) Perbadanan boleh, sama ada secara am atau dalam mana-mana hal tertentu, melantik mana-mana orang yang bukan seorang pengarah, pegawai atau pekerja Perbadanan, untuk memberi apa-apa bantuan sebagaimana yang ditentukan olehnya dalam penjalanan kuasanya, pelaksanaan fungsinya atau penunaian tugasnya, di bawah Akta ini, atau untuk menjalankan, melaksanakan atau menunaikan kuasa, fungsi atau tugas demikian sebagaimana yang ditentukan oleh Perbadanan dan tertakluk kepada pengawasan Lembaga bagi pihak dan atas nama Perbadanan.

Pemerolehan dan pelupusan melibatkan Perbadanan

26. (1) Bagi maksud Akta ini, Perbadanan boleh memperoleh atau melupuskan mana-mana aset—

- (a) menurut peruntukan peletakhakan statutori yang dinyatakan dalam Jadual Kedua; atau
- (b) mengikut undang-undang am.

(2) Suatu perakuan peletakhakan yang dikeluarkan menurut Jadual Kedua hendaklah mempunyai kesan yang dinyatakan dalam Jadual Kedua itu dan hendaklah mengikat mana-mana orang yang terjejas dengannya.

Kuasa untuk melantik konservator dan konservator tambahan, dsb.

27. (1) Bagi maksud Akta ini, Perbadanan boleh melantik seorang konservator untuk mentadbir seorang terjejas jika ia berpuas hati bahawa—

- (a) orang terjejas utama—
 - (i) tidak berupaya atau berkemungkinan tidak berupaya untuk membayar hutangnya; atau
 - (ii) tidak berupaya atau berkemungkinan tidak berupaya untuk memenuhi kewajipannya kepada pemiutangnya;
- (b) kemandirian orang terjejas utama dan keseluruhan atau mana-mana bahagian asetnya sebagai usaha berterusan boleh tercapai;
- (c) penghasilan yang lebih menguntungkan akan aset orang terjejas utama boleh dicapai selain daripada suatu penggulungan; atau
- (d) perlantikan itu boleh mencapai penghasilan yang lebih menguntungkan atau suatu penyelesaian yang lebih cepat akan suatu tugas atau liabiliti yang terhutang oleh mana-mana orang kepada Perbadanan atau mana-mana subsidiari Perbadanan, sama ada pada masa akan datang atau sekarang, atau sama ada terletak atau kontingen.

(2) Perbadanan boleh melantik seorang atau lebih konservator bagi orang terjejas.

(3) Perbadanan boleh pada bila-bila masa selepas perlantikan mana-mana konservator di bawah subseksyen (2) melantik konservator tambahan dan boleh, pada bila-bila masa, menamatkan mana-mana konservator sedia ada dan melantik seorang konservator baru untuk menggantikannya.

(4) Tiada apa-apa dalam subseksyen (3) boleh digunakan untuk menamatkan pentadbiran mana-mana orang terjejas melainkan ditamatkan oleh Perbadanan di bawah Jadual Ketiga.

(5) Apa-apa keputusan Perbadanan berhubungan dengan perlantikan seorang konservator, seorang konservator tambahan, penamatan mana-mana konservator sedia ada dan perlantikan seorang konservator baru bagi menggantikannya, adalah muktamad.

(6) Perlantikan seorang konservator hendaklah mempunyai kesan yang dinyatakan dalam Jadual Ketiga.

(7) Mana-mana konservator termasuklah seorang konservator tambahan yang dilantik di bawah seksyen ini hendaklah mempunyai kuasa dan tugas yang dinyatakan dalam Jadual Ketiga.

(8) Seorang konservator, dalam penjalanan kuasanya di bawah Jadual Ketiga, tidak dikehendaki untuk memaklumkan atau mendapatkan kelulusan pemegang saham atau pemiutang orang terjejas dalam suatu mesyuarat agung atau selainnya walau apa jua pun apa-apa kaedah undang-undang, kontrak atau apa-apa jua dalam mana-mana undang-undang termasuklah seksyen 132c, 132D, 132E dan 132G Akta Syarikat 1965 atau apa-apa jua dalam dokumen konstituen orang terjejas itu.

(9) Mana-mana orang yang melanggar—

(a) perenggan 9, 11 atau 15; atau

(b) subperenggan 8(1), 12(1), 13(2), 14(1), 17(1) atau 20(1),

Jadual Ketiga adalah melakukan suatu kesalahan dan boleh, apabila disabitkan, didenda tidak melebihi tiga juta ringgit atau dipenjarakan selama suatu tempoh tidak melebihi tiga tahun atau kedua-duanya.

Hak untuk melupus dan mengekalkan nilai harta

28. (1) Walau apa pun undang-undang dan sebagai tambahan kepada mana-mana kuasa lain yang Perbadanan boleh mempunyai di bawah mana-mana kontrak atau undang-undang—

(a) Perbadanan; dan

(b) mana-mana orang yang memperolehi suatu aset daripada Perbadanan,

sebagai pemegang jaminan atas apa-apa harta, sama ada sebagai pemegang gadaian, pemegang gadai janji, pemegang serah hak, pemegang lien atau selainnya, hendaklah berhak—

- (i) untuk melupuskan harta itu atau mana-mana bahagian harta itu secara triti persendirian menurut Jadual Keempat; dan
- (ii) jika harta itu terdiri daripada tanah, untuk mengambil semua langkah yang ia rasakan patut untuk mengekalkan nilai tanah itu atau memudahkan pelupusan tanah itu secara triti persendirian mengikut Jadual Keempat, termasuklah memasuki tanah itu, sama ada secara bersendirian atau dengan mana-mana orang yang dibenarkan olehnya, untuk memeriksa, melindungi, menjamin, menyenggara atau membaiki tanah itu.

(2) Pemerolehan dan pelupusan harta mengikut Jadual Keempat hendaklah mempunyai kesan yang dinyatakan dalam Jadual itu.

BAHAGIAN

III

KEWANGAN

Kumpulan wang dan sumber kumpulan wang

29. (1) Bagi maksud Akta ini, Perbadanan hendaklah menyenggara dan mentadbir dua kumpulan wang berasingan—

- (a) suatu kumpulan wang Islam, yang hendaklah terdiri daripada—
 - (i) segala premium yang diterima oleh Perbadanan di bawah Akta ini; dan
 - (ii) segala wang atau aset lain yang boleh dalam apa-apa cara sekalipun cara boleh kena dibayar dengan sah, kepada, diterima oleh atau diletakhak atas

Perbadanan berhubungan dengan mana-mana perkara yang bersampingan kepada kuasa, tugas dan fungsinya,

berkenaan dengan deposit Islam; dan

(b) suatu kumpulan wang konvensional, yang kepadanya hendaklah terdiri daripada dikreditkan—

(i) segala premium yang diterima oleh Perbadanan di bawah Akta ini; dan

(ii) segala wang atau aset lain yang boleh dalam apa cara sekalipun boleh kena dibayar dengan sah kepada, diterima oleh atau diletakhak atas Perbadanan berhubungan dengan mana-mana perkara yang bersampingan kepada kuasa, tugas dan fungsinya,

berkenaan dengan deposit konvensional.

(2) Perbadanan diberi kuasa untuk mengkredit secara langsung segala pendapatan pengendalian langsung kepada, atau mengecaj mendebit segala perbelanjaan, kos dan kerugian terhadap daripada, kumpulan wang Islam atau kumpulan wang konvensional, mengikut mana-mana yang berkenaan, atau jika pendapatan, perbelanjaan, kos atau kerugian itu tidak dapat ditentukan secara khusus berpunca sama ada kumpulan wang Islam atau kumpulan wang konvensional, apa kredit atau caj debit itu hendaklah berkadar dengan jumlah premium Islam dan konvensional yang dipungut dalam tahun taksiran sebelum tahun yang di mana pengkreditan atau pengecajan pendebitan itu dibuat.

(3) Berhubungan dengan tahun taksiran pertama Perbadanan, pengkreditan atau pengecajan pendebitan itu hendaklah diputuskan oleh Perbadanan.

Peminjaman wang kepada Perbadanan

30. (1) Menteri boleh, atas permintaan Perbadanan, meminjamkan wang kepada Perbadanan menurut terma dan syarat sebagaimana yang diputuskan oleh Menteri.

(2) Apa-apa peminjaman wang menurut subseksyen (1) hendaklah dibuat daripada Kumpulan Wang Disatukan dan jika peminjaman sedemikian dibuat, Menteri hendaklah mengadakan suatu penyata mengenai peminjaman itu untuk dibentangkan di hadapan Dewan Rakyat seawal peluang yang mungkin.

Pelaburan dibenarkan

31. (1) Perbadanan boleh melabur dalam yang berikut:

- (i) sekuriti denominasi ringgit yang dikeluarkan atau dijamin oleh Kerajaan atau Bank Negara Malaysia atau daripada gred pelaburan tinggi sebagaimana yang dinilai oleh suatu agensi penilaian yang mempunyai reputasi;
- (ii) deposit dengan Bank Negara Malaysia atau mana-mana institusi kewangan; atau
- (iii) apa-apa pelaburan lain yang diluluskan oleh Menteri, atas syor Lembaga.

(2) Perbadanan boleh, hanya untuk maksud melindungi apa-apa pendedahan yang berbangkit daripada perenggan(1)(i), (ii) atau (iii), membuat transaksi terbitan kewangan, sama ada diniagakan di bursa atau di kaunter termasuklah kontrak swap, niaga hadapan, opsyen dan hadapan.

(3) Apa-apa pelaburan yang dibuat oleh Perbadanan di bawah subseksyen (1) daripada kumpulan wang Islam hendaklah dibuat mengikut prinsip Syariah.

Tahun kewangan

32. Melainkan jika diarahkan selainnya oleh Menteri, tahun kewangan Perbadanan hendaklah bermula pada hari pertama Januari dan berakhir pada hari ke tiga puluh satu Disember pada setiap tahun.

Keperluan untuk menyimpan buku, rekod, akaun atau dokumen lain

33. Perbadanan hendaklah menyebabkan buku, rekod, akaun atau dokumen lain disimpan dan hendaklah, dengan seberapa segera yang boleh dilaksanakan mungkin setelah berakhir setiap tahun kewangan, menyebabkan. disediakan bagi tahun kewangan itu penyata kewangan yang sesuai mengikut Akta Badan Berkanun (Akaun dan Laporan Tahunan) 1980 [*Akta 240*].

Juruaudit

34. Akaun Perbadanan hendaklah diaudit oleh Juruaudit Negara.

Penyata kewangan dan laporan tahunan

35. Perbadanan hendaklah dalam masa tiga bulan daripada penutupan tahun kewangannya menghantar suatu salinan akaun tahunan yang diperakui oleh Juruaudit Negara dan suatu laporan tahunan mengenai perjalanan kerja Perbadanan sepanjang tahun itu kepada Menteri, yang hendaklah, dengan seberapa segera yang mungkin, menyebabkan ianya dibentangkan di hadapan Dewan Negara dan Dewan Rakyat.

BAHAGIAN IV
INSURANS DEPOSIT

Bab 1

Keanggotaan, pembatalan dan penamatan

Takrif

36. Bagi maksud Bahagian ini—

(a) "deposit" ertinya baki belum dibayar daripada agregat deposit sebagaimana ditakrifkan dalam subseksyen 2(1) yang diterima atau dipegang oleh suatu institusi anggota daripada atau bagi pihak seseorang dalam perjalanan biasa perniagaan pengambilan deposit institusi anggota itu dan hendaklah termasuk—

(i) suatu draf bank, cek diperakui atau surat cara seumpama yang lain atau arahan bayaran, yang dikeluarkan atau dibuat terhadap suatu akaun deposit yang institusi anggota itu menjadi bertanggung terutamanya;

(ii) suatu cek yang dimasukkan ke dalam suatu sistem pembayaran yang ditetapkan di bawah subseksyen 6(1) Akta Sistem Pembayaran 2003 [*Akta 627*] walau apa pun apa-apa penangguhan atau kegagalan oleh institusi anggota itu untuk mengkreditkan akaun itu; atau

(iii) apa-apa liabiliti lain atau surat cara kewangan sebagaimana yang boleh ditentukan oleh Perbadanan,

tetapi tidak termasuk—

- (A) suatu deposit yang tidak boleh kena dibayar di Malaysia;
 - (B) deposit mata wang asing;
 - (C) deposit pasaran kewangan;
 - (D) deposit surat cara boleh niaga dan deposit pembawa lain;
 - (E) perjanjian beli balik; dan
 - (F) apa-apa liabiliti lain atau surat cara kewangan sebagaimana boleh yang ditentukan oleh Perbadanan; dan
- (b) "akaun amanah" termasuklah wang yang dipegang dalam akaun bagi maksud suatu amanah.

Keanggotaan disifatkan

37. (1) Tiap-tiap institusi kewangan adalah disifatkan sebagai suatu institusi anggota dari tarikh mula berkuat kuasa Akta ini.

(2) Mana-mana institusi kewangan yang dilesenkan setelah berkuat kuasanya Akta ini hendaklah disifatkan sebagai suatu institusi anggota dari tarikh ia diberikan lesen di bawah Akta Bank dan Institusi-Institusi Kewangan 1989 atau Akta Bank Islam 1983, mengikut mana-mana yang berkenaan.

Terma dan syarat-syarat keanggotaan

38. (1) Terma dan syarat-syarat keanggotaan suatu institusi anggota hendaklah ditetapkan melalui peraturan-peraturan yang dibuat di bawah seksyen 100.

(2) Suatu institusi anggota hendaklah mematuhi terma dan syarat-syarat sebagaimana yang boleh ditetapkan di bawah subseksyen (1).

(3) Mana-mana orang yang melanggar subseksyen (2) adalah melakukan suatu kesalahan dan boleh, apabila disabitkan, dikenakan denda tidak melebihi lima juta ringgit atau dipenjara bagi suatu tempoh tidak melebihi lima tahun atau kedua-duanya sekali dan hendaklah, sebagai tambahan, boleh dikenakan denda harian tidak melebihi lima puluh ribu ringgit bagi tiap-tiap hari kesalahan itu berterusan selepas sabitan dilakukan.

Pembatalan keanggotaan

39. Perbadanan hendaklah membatalkan keanggotaan suatu institusi anggota dengan memaklumkan institusi anggota itu secara bertulis jika lesen institusi anggota itu telah diserahkan balik atau dibatalkan di bawah Akta Bank dan Institusi-Institusi Kewangan 1989 atau, dalam hal institusi anggota yang merupakan suatu bank Islam, dibatalkan di bawah Akta Bank Islam 1983.

Penamatan keanggotaan

40. (1) Lembaga boleh, pada bila-bila masa selepas Perbadanan menerima suatu pemberitahuan di bawah seksyen 70 dan sama ada atau tidak Perbadanan telah menjalankan mana-mana kuasanya di bawah seksyen 71, mengadakan suatu mesyuarat untuk memutuskan sama ada keanggotaan institusi anggota itu patut ditamatkan.

(2) Jika Lembaga bercadang untuk menamatkan keanggotaan institusi anggota itu, Perbadanan hendaklah memberi notis bertulis mengenai cadangannya kepada institusi anggota itu dan hendaklah memberikan institusi anggota itu suatu peluang untuk membuat representasi dalam masa lima hari dari tarikh notis itu, terhadapnya atau selainnya, berkenaan dengan cadangan itu.

(3) Jika representasi telah diterima oleh Perbadanan daripada institusi anggota itu, Lembaga hendaklah menimbang representasi itu dan hendaklah membuat suatu keputusan untuk mengesahkan atau tidak mengesahkan cadangan untuk menamatkan keanggotaan institusi anggota itu.

(4) Jika Lembaga telah mengesahkan cadangannya untuk menamatkan keanggotaan institusi anggota itu, ia hendaklah memaklumkan Menteri mengenai pemutusannya secara bertulis.

(5) Jika Menteri tidak bersetuju dengan keputusan oleh Lembaga, Menteri hendaklah dalam masa lima belas hari dari tarikh penerimaan notis itu memaklumkan kepada Lembaga mengenai keputusannya secara bertulis berhubung dengan keputusan itu, dan arahan itu hendaklah mengikat Lembaga.

(6) Jika Menteri tidak memaklumkan kepada Lembaga mengenai keputusannya dalam tempoh yang dinyatakan di bawah subseksyen (5), Menteri hendaklah disifatkan sebagai telah meluluskan cadangan Lembaga untuk menamatkan keanggotaan itu dan Perbadanan hendaklah—

- (a) dengan serta-merta memaklumkan Bank Negara Malaysia sewajarnya; dan
- (b) mengeluarkan suatu notis bertulis mengenai penamatan keanggotaan kepada institusi anggota itu dan keanggotaannya hendaklah ditamatkan pada masa selepas habisnya tempoh yang ditentukan di dalam notis itu.

(7) Jika, pada bila-bila masa selepas suatu notis penamatan telah diberikan kepada suatu institusi anggota di bawah subseksyen (6), Perbadanan berpuas hati bahawa sebagai akibat daripada apa-apa tindakan oleh institusi anggota itu, atau mana-mana orang lain, risiko kepada pendeposit atau kepada Perbadanan telah dielakkan atau telah dikurangkan secara substansial, Perbadanan boleh membatalkan notis penamatannya itu dan memaklumkan Menteri sewajarnya.

(8) Penamatan suatu keanggotaan oleh Perbadanan adalah muktamad.

Kesan pembatalan atau penamatan

41. (1) Jika keanggotaan suatu institusi anggota telah dibatalkan di bawah seksyen 39 atau ditamatkan di bawah seksyen 40 —

- (a) institusi itu tidak boleh memakai atau menggunakan perkataan "insurans deposit" atau apa-apa terbitan daripada perkataan itu dalam apa-apa bahasa atau apa-apa perkataan lain dalam apa-apa bahasa yang boleh ditafsirkan bahawa institusi itu adalah suatu institusi anggota;

- (b) institusi itu hendaklah memaklumkan pendepositnya secara bertulis bahawa baki deposit yang belum dijelaskan dengan institusi itu hendaklah terus diinsuranskan selama tempoh dua tahun dari tarikh kuat kuasa pembatalan atau penamatan itu, melainkan jika deposit itu telah dikeluarkan kesemuanya atau telah mencapai kematangannya, mengikut mana-mana yang terawal;
- (c) dalam hal suatu pembatalan disebabkan suatu institusi anggota menyerahkan lesennya, institusi itu dikehendaki memberitahu pendepositnya mengenai pembatalan keanggotaannya mengikut cara yang ditetapkan oleh Perbadanan;
- (d) institusi itu tidak boleh dikira sebagai suatu institusi anggota dengan sebab hanya depositnya terus diinsuranskan di bawah perenggan (b), seksyen 50 atau 51; dan
- (e) institusi itu tidaklah boleh dilepaskan daripada kewajipan atau liabilitinya kepada Perbadanan yang telah terakru sebelum pembatalan atau penamatan keanggotaannya.

(2) Bagi maksud perenggan (1)(b), pembatalan atau penamatan keanggotaan tidak boleh kewajipan, hak dan kebolehan Perbadanan untuk menjejaskan membuat suatu bayaran di bawah Bab 4 Bahagian ini.

(3) Bagi maksud perenggan (1)(c), institusi anggota itu hendaklah menanggung rugi Perbadanan dalam hal keadaan apa-apa bayaran yang telah dibuat oleh Perbadanan kepada pendeposit, berkenaan dengan depositnya sebagaimana telah dipindahmilik atau diperolehi oleh institusi anggota lain atau mana-mana orang lain sebagaimana yang dibenarkan oleh Menteri.

(4) Perbadanan boleh, mengikut apa-apa cara dan melalui mana-mana media sebagaimana yang disifatkannya suai manfaat, memberi notis awam mengenai pembatalan atau penamatan mana-mana keanggotaan suatu institusi anggota jika pada pendapat Perbadanan, kepentingan awam menghendaki supaya notis itu diberikan.

(5) Jika suatu institusi anggota berkewajipan untuk membayar semula kepada seseorang apa-apa wang yang telah diterima atau dipegang oleh institusi anggota itu, wang itu hendaklah disifatkan sebagai tidak menjadi sebahagian daripada suatu deposit bagi maksud insurans deposit dengan Perbadanan jika tarikh pada masa orang

yang memperolehi kepentingannya dalam wang itu adalah suatu tarikh selepas tarikh yang pada masa keanggotaan institusi anggota itu dibatalkan atau ditamatkan oleh Perbadanan.

(6) Mana-mana institusi anggota yang melanggar perenggan (1) (a), (b) atau (c) adalah melakukan suatu kesalahan dan boleh, apabila disabitkan, dikenakan denda tidak melebihi lima juta ringgit dan boleh, sebagai tambahan, dikenakan denda harian tidak melebihi lima puluh ribu ringgit bagi tiap-tiap hari kesalahan itu berterusan selepas sabitan.

Bab 2

Premium

Premium pertama

42. (1) Perbadanan hendaklah mentaksir dan memungut premium yang kena dibayar oleh suatu institusi anggota bagi tahun taksiran yang ia menjadi suatu institusi anggota (selepas ini disebut "premium pertama") seperti yang berikut:

- (a) dua ratus lima puluh ribu ringgit; atau
- (b) suatu kadar yang boleh ditetapkan oleh Perbadanan dengan kelulusan bertulis terlebih dahulu oleh Menteri,

mengikut mana-mana yang lebih tinggi.

(2) Tiada premium pertama dikehendaki untuk dibayar berhubungan dengan mana-mana deposit yang dipindahkan daripada suatu institusi anggota kepada suatu institusi anggota lain dalam suatu kumpulan perniagaan yang premium telahpun dibayar bagi tahun taksiran itu bila mana yang institusi anggota itu menjadi suatu anggota.

(3) Suatu institusi anggota hendaklah membayar premium pertama kepada Perbadanan di ibu pejabat Perbadanan dalam masa tiga puluh hari dari tarikh ia menjadi suatu anggota.

Premium tahunan

43. (1) Tiap-tiap institusi anggota hendaklah, bagi setiap tahun taksiran berikutan tahun taksiran yang ia menjadi institusi anggota, membayar premium tahunan secara berasingan bagi deposit Islam dan deposit konvensional yang diletakkan dengannya.

(2) Kadar premium tahunan maksimum di bawah Akta ini adalah seperti yang berikut:

- (a) 0.5 peratus bagi deposit Islam diinsuranskan; dan
- (b) 0.5 peratus bagi deposit konvensional diinsuranskan,

atau mana-mana kadar atau kadar-kadar yang lebih rendah sebagaimana yang boleh ditetapkan oleh Perbadanan, dengan kelulusan Menteri.

(3) Kuantum apa-apa premium tahunan yang dibayar di bawah perenggan (2)(a) dan (b), secara agregat, hendaklah tidak kurang daripada dua ratus lima puluh ribu ringgit.

(4) Mana-mana institusi anggota yang melanggar subseksyen (1) adalah melakukan suatu kesalahan dan boleh, apabila disabitkan, dikenakan suatu denda tidak melebihi tiga juta ringgit dan boleh, sebagai tambahan, dikenakan suatu denda harian tidak melebihi tiga puluh ribu ringgit bagi tiap-tiap hari kesalahan itu berterusan selepas sabitan.

Pengiraan premium tahunan

44. (1) Premium tahunan hendaklah dikira seperti yang berikut:

- (a) kadar premium untuk diguna pakai kepada suatu institusi anggota hendaklah berdasarkan kepada jumlah deposit diinsuranskan yang dipegang oleh institusi anggota itu pada 31 Disember tahun taksiran yang sebelumnya;
- (b) premium tahunan deposit Islam dan konvensional hendaklah dikira secara berasingan; dan
- (c) kadar premium yang kena dipakai bagi setiap institusi anggota hendaklah berdasarkan apa-apa kriteria sebagaimana yang boleh ditetapkan dalam peraturan.

(2) Premium kena dibayar oleh suatu institusi anggota hendaklah berdasarkan kepada penyata yang diperakui oleh ketua eksekutif institusi anggota itu yang hendaklah dikemukakan mengikut apa-apa bentuk dan dalam apa-apa tempoh sebagaimana yang dikehendaki oleh Perbadanan.

Tiada tolakan atas bayaran premium

45. Melainkan jika Perbadanan bersetuju sebaliknya dalam mana-mana hal tertentu, tiada bayaran premium boleh dibuat kepada Perbadanan oleh suatu institusi anggota yang telah dikurangkan

atau selainnya diselaraskan berdasarkan kepada mana-mana tuntutan oleh suatu institusi anggota terhadap Perbadanan.

Surcaj premium

46. (1) Walau apa pun bayaran premium pertama berhubungan dengan tahun taksiran pertama atau premium tahunan berhubungan dengan mana-mana tahun taksiran tertentu, Perbadanan boleh mentaksir dan memungut daripada institusi anggota suatu surcaj premium ke atas keseluruhan deposit diinsuranskan oleh suatu institusi anggota berhubungan dengan tahun taksiran itu atau mana-mana bahagian daripadanya.

(2) Agregat premium yang telah dibayar dan surcaj premium di bawah subseksyen (1) dalam mana-mana tahun taksiran tertentu hendaklah tidak melebihi 0.5 peratus setahun daripada keseluruhan deposit diinsuranskan oleh institusi anggota itu.

(3) Jika pada pendapat Perbadanan bahawa suatu institusi anggota telah gagal atau gagal untuk—

- (a) menepati mana-mana peraturan, kaedah, perintah, undang-undang kecil, pemberitahuan, garis panduan, pekeling atau nota berkaitan dengan amalan kewangan dan perniagaan yang kukuh yang dikeluarkan oleh Bank Negara Malaysia;
- (b) menepati terma dan syarat keanggotaan, dan apa-apa peraturan, kaedah, perintah, undang-undang kecil, pemberitahuan, garis panduan, pekeling atau nota Perbadanan berkenaan dengan insurans deposit;
- (c) mematuhi permintaan bagi maklumat atau menyekat hak untuk akses kepada maklumat oleh Perbadanan, Bank Negara Malaysia atau mana-mana orang yang bertindak bagi pihak Perbadanan, di bawah Akta ini; atau
- (d) menyenggara rekod deposit sewajarnya atau ia salah nyata, sama ada melalui tindakan atau tinggalan, mana-mana maklumat, termasuklah maklumat mengenai deposit diinsuranskan, yang digunakan sebagai suatu asas bagi pentaksiran premium,

Perbadanan hendaklah—

- (i) berunding dengan Bank Negara Malaysia tentang jumlah surcaj premium dan sebab mengenakan apa-apa surcaj premium itu; dan

- (ii) memberi institusi anggota itu suatu peluang untuk didengar atas cadangan surcaj premium itu.

(3) Perbadanan hendaklah mendapatkan kebenaran bertulis daripada Menteri sebelum mengenakan surcaj premium kepada institusi anggota yang telah gagal atau gagal untuk mematuhi atau menepati keperluan di bawah subseksyen (3).

Caj lampau tempoh

47. Jika mana-mana premium atau surcaj premium yang perlu dibayar dan kena dibayar di bawah seksyen 42, 43 atau 46 belum dibayar oleh institusi anggota pada tarikh kena dibayar, premium belum dibayar itu hendaklah, tanpa notis lanjutan disampaikan kepada institusi anggota itu, untuk dinaikkan ke suatu jumlah sebagaimana yang boleh ditetapkan dalam peraturan mengenai premium belum dibayar itu.

Peraturan premium

48. Perbadanan boleh membuat apa-apa peraturan berkenaan dengan pemutusan premium pertama dan premium tahunan termasuklah—

- (a) penubuhan suatu sistem pengkelasan institusi anggota dalam kategori berlainan;
- (b) kriteria atau faktor untuk diambil kira, tata cara untuk diikuti oleh Perbadanan dalam memutuskan kategori yang di dalamnya suatu institusi anggota itu dikelaskan; dan
- (c) mana-mana perkara lain yang berkaitan dengannya.

Bab 3

Bidang perlindungan

Bidang perlindungan

49. (1) Perbadanan hendaklah secara berasingan menginsuranskan kategori deposit berikut yang diletakkan dengan institusi anggota—

- (a) deposit Islam; dan
- (b) deposit konvensional.

(2) Bagi maksud subseksyen (1), jika seorang pendeposit memiliki lebih daripada satu deposit dengan sesuatu institusi anggota, agregat deposit itu hendaklah diinsuranskan—

- (a) berkenaan dengan wang pokok dan pulangan bagi deposit Islam, setakat jumlah maksimum enam puluh ribu ringgit; dan
- (b) berkenaan dengan wang pokok dan faedah bagi deposit konvensional, setakat jumlah maksimum enam puluh ribu ringgit.

(3) Tertakluk kepada peraturan yang dibuat di bawah seksyen 100 —

- (a) jika suatu institusi anggota berkewajipan untuk membayar balik wang kepada seorang pendeposit yang bertindak sebagai seorang pemegang amanah untuk seorang yang lain atau sebagai pemunya bersama dengan seorang yang lain, dan peramanahan atau pemunyaan bersama itu telah didedahkan dalam rekod institusi anggota itu—
 - (i) deposit pendeposit itu sebagai pemegang amanah atau sebagai seorang pemunya bersama, hendaklah disifatkan sebagai suatu deposit berasingan daripada mana-mana deposit pendeposit itu yang bertindak bagi haknya sendiri atau bertindak sebagai pemegang bagi amanah lain atau keupayaan bersama dengan institusi anggota itu;
 - (ii) jika seorang pemegang amanah bertindak bagi dua atau lebih benefisiari, deposit yang dipegang olehnya sebagai amanah bagi setiap benefisiari, hendaklah setiap satu disifatkan sebagai suatu deposit yang berasingan; dan
 - (iii) deposit yang dipegang sebagai amanah oleh seorang pemegang amanah bagi seorang benefisiari dalam suatu institusi anggota hendaklah disifatkan sebagai suatu deposit berasingan daripada suatu deposit benefisiari itu dengan institusi anggota bagi pihak dirinya sendiri dan hendaklah juga disifatkan sebagai berasingan daripada mana-mana deposit yang dipegang sebagai diamanahkan oleh pemegang amanah yang lain untuk benefisiari itu dalam institusi anggota;

- (b) bagi mengelakkan keraguan, jika seorang pendeposit adalah pemunya bersama bagi suatu deposit dalam suatu institusi anggota dengan seorang yang lain, kesemua deposit pendeposit itu dengan orang itu hendaklah diagregatkan dan disifatkan sebagai satu deposit dan diinsuranskan ke takat jumlah maksimum enam puluh ribu ringgit; atau
- (c) bagi maksud perenggan 3(a) dan (b) —
- (i) institusi anggota itu hendaklah menyatakan dalam rekodnya—
 - (A) bagi suatu akaun amanah, bahawa akaun itu dipegang oleh pemegang amanah bagi benefisiari yang dinamakan; atau
 - (B) bagi suatu akaun bersama, nama-nama individu pemegang akaun bersama;
 - (ii) pemegang amanah hendaklah—
 - (A) menyenggara rekod terperinci sebagaimana yang boleh ditetapkan oleh Perbadanan mengenai akaun amanah itu;
 - (B) mengemukakan kepada institusi anggota itu apa-apa rekod sebagaimana yang diperlukan oleh institusi anggota dari semasa ke semasa di bawah Akta ini; dan
 - (C) memfailkan suatu akuan berkanun yang memperakui ketepatan rekod yang dikemukakan di bawah subsubperenggan (B) apabila diperlukan oleh institusi anggota itu;
 - (iii) pemegang amanah dalam menyenggara dan mengemukakan mana-mana rekod mengenai akaun amanah yang dikehendaki di bawah subperenggan (3)(c)(ii) hendaklah memastikan bahawa maklumat yang diberikan itu adalah betul, tepat dan lengkap dan tidak mengandungi maklumat yang salah atau mengelirukan dan institusi anggota itu hendaklah bergantung kepada apa-apa rekod bagi maksud subperenggan (3)(c)(i) dan pemegang amanah hendaklah menanggung rugi institusi anggota itu dalam hal keadaan apa-apa tindakan prosiding undang-undang berhubung dengan rekod itu.

(4) Walau apa jua pun apa-apa jua dalam perenggan (3)(a), Perbadanan tidak boleh menginsuranskan secara berasingan deposit yang dipegang sebagai amanah bagi mana-mana benefisiari sekiranya, pada pendapat Perbadanan, amanah itu diwujudkan terutamanya bagi maksud mendapatkan atau menaikkan insurans deposit.

(5) Bagi maksud subperenggan (3)(a)(iii), mana-mana deposit yang dipegang sebagai amanah oleh seorang pemegang amanah yang sama untuk benefisiari yang sama hendaklah diagregatkan dan disifatkan sebagai satu deposit.

(6) Tertakluk kepada peraturan yang dibuat di bawah seksyen 100 dan pendedahan yang dibuat oleh pemegang amanah di bawah subperenggan (3)(c)(ii), jika seorang pendeposit—

- (a) mengendalikan satu perniagaan sebagai tuan punya tunggal atau seorang rakan kongsi suatu perkongsian; atau
- (b) menjalankan mana-mana amalan profesional,

yang telah didedahkan dalam rekod institusi anggota, suatu deposit perniagaan itu atau amalan profesional itu hendaklah disifatkan sebagai berasingan daripada deposit pendeposit bagi pihak dirinya sendiri atau sebagai pemegang amanah atau pemunya bersama.

Deposit dengan institusi bergabung, dsb.

50. (1) Jika seseorang yang mempunyai deposit dengan dua atau lebih institusi anggota yang bergabung dan terus beroperasi sebagai satu institusi anggota (dalam Bab ini disebut sebagai "institusi digabung"), deposit orang itu dengan institusi yang bergabung pada hari yang institusi digabung itu terbentuk, ditolak apa-apa pengeluaran daripada deposit itu, hendaklah disifatkan sebagai dan terus diinsuranskan secara berasingan oleh Perbadanan bagi tempoh dua tahun, atau sekiranya matang atau sehingga dikeluarkan, mengikut mana-mana yang lebih awal, setelah institusi yang akan bergabung itu menjadi sebahagian daripada institusi digabung itu.

(2) Suatu deposit yang dibuat oleh seorang yang disebut di bawah subseksyen (1) dengan institusi digabung selepas sehari institusi digabung itu terbentuk hendaklah diinsuranskan oleh Perbadanan hanya sehingga takat agregat deposit orang itu dengan institusi digabung itu tidak kurang daripada enam puluh ribu ringgit.

(3) Jika suatu institusi anggota memperoleh deposit daripada institusi anggota lain atau institusi yang bergabung, deposit itu, ditolak apa-apa pengeluaran daripada deposit itu, hendaklah terus diinsuranskan berasingan daripada mana-mana deposit sehingga tahap perlindungan enam puluh ribu ringgit bagi tempoh dua tahun, atau sekiranya matang atau sehingga dikeluarkan, mengikut mana-mana yang lebih awal, selepas dari tarikh pemerolehan.

(4) Suatu institusi anggota hendaklah menyenggara apa-apa rekod sebagaimana yang perlu bagi maksud subseksyen (1) dan (2).

Deposit institusi anggota diperolehi oleh institusi bukan anggota

51. (1) Jika deposit dengan suatu institusi anggota akan diperolehi oleh seorang yang bukan institusi anggota, deposit itu sedemikian hendaklah disifatkan sebagai dan terus diinsuranskan oleh Perbadanan sehingga had enam puluh ribu ringgit bagi baki tahun taksiran itu, atau sehingga matang atau sehingga dikeluarkan, mengikut mana-mana yang lebih awal, selepas pemerolehan deposit itu oleh pemeroleh institusi bukan anggota itu.

(2) Bagi maksud subseksyen (1), dan menurut mana-mana kaedah sebagaimana yang dibuat oleh Perbadanan—

- (a) berhubungan dengan pendeposit, institusi anggota itu hendaklah—
 - (i) mendapatkan kebenaran bertulis sekurang-kurangnya tujuh puluh lima peratus daripada semua pendeposit atau wakil persendirian mereka untuk memindahkan deposit;
 - (ii) mendapatkan perakuan bertulis daripada setiap pendeposit bahawa pendeposit sedar bahawa mengambil maklum bahawa deposit yang dipindahkan kepada institusi bukan anggota akan diinsuranskan bagi baki tahun taksiran itu, atau sehingga matang atau sehingga dikeluarkan, mengikut mana-mana yang lebih awal, deposit yang diletakkan dengan institusi bukan anggota digabung tidaklah lagi diinsuranskan secara keseluruhan atau secara sebahagian oleh Perbadanan;

- (iii) apabila dikehendaki secara bertulis, membayar kepada seorang pendeposit, jumlah wang pokok deposit itu dan pulangan atau faedah, yang dikira sehingga ke tarikh pengeluaran dan tiada caj atau penalti boleh dikenakan berkenaan dengan pembayaran itu; dan
 - (iv) menyediakan suatu penyata bahawa kewajipan institusi anggota yang diperolehi itu untuk membayar deposit akan diambil alih oleh institusi bukan anggota itu; dan
- (b) berhubungan dengan institusi bukan anggota yang memperolehi, memasuki suatu perjanjian bertulis untuk mengambil alih liabiliti institusi anggota yang diperolehi berhubungan dengan deposit itu pada terma dan syarat yang sama.

(3) Bagi maksud perenggan (2)(b), institusi anggota itu hendaklah menanggung rugi Perbadanan dalam hal keadaan apa-apa bayaran yang dibuat oleh Perbadanan kepada pendeposit, berkaitan dengan deposit berkenaan yang telah dipindahkan atau diperolehi oleh pemeroleh institusi bukan anggota.

Deposit disifatkan

52. Jika suatu institusi anggota mengambil alih deposit daripada institusi anggota lain di bawah seksyen 50, deposit itu adalah bagi maksud seksyen 42 dan 43, disifatkan telah diletakkan dengan institusi anggota yang mengambilalihnya pada hari ia diambil alih.

Bukan sebahagian deposit

53. Jika wang yang atau telah diterima oleh suatu institusi anggota yang institusi itu telah mengeluarkan atau mempunyai kewajipan untuk mengeluarkan suatu surat cara membuktikan suatu deposit, selain daripada suatu draf bank, cek diperakui, cek kembara, surat kredit bayar dahulu atau perintah kiriman wang—

- (a) wang itu tidak menjadi suatu deposit kecuali surat cara dan rekod institusi itu menentukan orang yang berhak, pada tarikh pengeluaran surat cara itu, bagi pembayaran balik wang yang dibuktikan itu;

- (b) orang yang disebut dalam perenggan (a) hendaklah disifatkan sebagai pendeposit berkenaan dengan wang itu kecuali butiran suatu pindahmilik surat cara itu dicatatkan dalam rekod institusi itu, dalam hal ini penerima pindahmilik terkini ditunjukkan dalam rekod itu hendaklah disifatkan sebagai pendeposit; dan
- (c) catatan suatu pindahmilik dalam rekod suatu institusi anggota itu adalah tidak berkesan bagi maksud perenggan (b), jika catatan itu dibuat selepas pembatalan atau penamatan keanggotaan institusi anggota itu.

Bab 4

Bayaran

Bayaran

54. (1) Semua bayaran yang dibuat oleh Perbadanan berkenaan dengan—

- (a) deposit Islam dan segala kos bersekutu di atasnya hendaklah dibuat daripada kumpulan wang Islam; dan
- (b) deposit konvensional dan segala kos bersekutu di atasnya hendaklah dibuat daripada kumpulan wang konvensional.

(2) Semua bayaran yang dibuat oleh Perbadanan hendaklah berdasarkan kepada rekod deposit institusi anggota sebagaimana pada pendapat Perbadanan didapati berhak ke atasnya.

Bayaran wajib

55. Perbadanan hendaklah, menurut cara yang diperihalkan dalam subseksyen (2), membuat bayaran berkenaan dengan mana-mana deposit diinsuranskan dengan Perbadanan jika suatu perintah penggulungan telah dibuat berkenaan dengan—

- (a) suatu institusi anggota yang memegang deposit itu; atau
- (b) mana-mana orang yang deposit itu telah dipindahkan kepadanya—
 - (i) di bawah perenggan 41(1)(c) daripada suatu institusi anggota yang telah menyerah balik lesennya; atau

- (ii) di bawah subseksyen 51(1) daripada suatu institusi anggota yang bergabung dengan orang itu.

(2) Jika Perbadanan berkewajipan untuk membuat bayaran di bawah subseksyen (1) berkenaan dengan mana-mana deposit, Perbadanan hendaklah secepat yang mungkin dan dalam apa-apa hal tidak kurang daripada tiga bulan dari tarikh perintah penggulungan membuat bayaran kepada orang itu berdasarkan kepada rekod institusi anggota sebagaimana pada pendapat Perbadanan didapati berhak ke atasnya mengikut apa-apa cara yang disifatkan sesuai oleh Perbadanan.

Bayaran budi bicara

56. Perbadanan boleh, dengan kebenaran bertulis terlebih dahulu oleh Menteri, membuat bayaran berkenaan dengan mana-mana deposit diinsuranskan oleh Perbadanan jika—

- (a) institusi anggota yang memegang deposit itu atau mana-mana orang yang deposit itu telah dipindahkan kepadanya di bawah perenggan 41(1)(c) daripada suatu institusi anggota yang telah menyerah balik lesennya atau di bawah subseksyen 51(1) daripada suatu institusi anggota yang bergabung dengan mana-mana orang, tidak dapat membuat apa-apa bayaran berkenaan dengan deposit itu, disebabkan oleh—
 - (i) suatu perintah mahkamah;
 - (ii) apa-apa tindakan yang diambil oleh suatu badan pengawalselia atau Perbadanan; atau
 - (iii) apa-apa tindakan yang telah diambil oleh penerima, pengurus atau penerima dan pengurus semasa tempoh bila suatu institusi anggota itu berada dalam penerimaan;
- (b) suatu petisyen bagi penggulungan telah diserahkan kepada mahkamah terhadap institusi anggota yang memegang deposit atau mana-mana orang yang deposit itu telah dipindahkan kepadanya di bawah perenggan 41(1)(c) daripada suatu institusi anggota yang telah menyerah balik lesennya atau di bawah subseksyen 51(1) daripada suatu institusi anggota yang bergabung dengan orang itu; dan

- (c) keanggotaan institusi anggota yang memegang deposit itu telah dibatalkan atau ditamatkan.

Bayaran pendahuluan

57. Perbadanan boleh menjalankan budi bicaranya berkenaan dengan seksyen 55 dan 56 untuk membuat bayaran pendahuluan kepada pendeposit.

Tarikh mengira liabiliti

58. (1) Tarikh bagi mengira liabiliti bagi bayaran wajib oleh Perbadanan hendaklah pada tarikh penggulungan itu mula berkuat kuasa.

(2) Tarikh bagi mengira liabiliti bagi bayaran budi bicara berkenaan dengan suatu keadaan di bawah seksyen 56 hendaklah pada tarikh keadaan itu pertama kali berlaku.

Bagaimana pulangan atau faedah atas deposit dikira bagi bayaran wajib

59. Bagi maksud mengira bayaran wajib oleh Perbadanan berkenaan dengan mana-mana deposit diinsuranskan oleh Perbadanan jika suatu perintah penggulungan telah dibuat berkenaan dengan suatu institusi anggota yang memegang deposit itu, wang pokok, termasuklah pulangan atau faedah terakru, mengikut mana-mana yang berkenaan, berhubungan dengan deposit itu hendaklah dimasukkan hanya sehingga tarikh penggulungan itu mula berkuat kuasa.

Perbadanan boleh membayar pulangan atau faedah atas bayaran wajib

60. Jika Perbadanan membuat suatu bayaran wajib di bawah seksyen 55, Perbadanan boleh atas budi bicaranya sendiri membayar, sebagai tambahan kepada jumlah yang Perbadanan wajib untuk membayar, pulangan atau faedah, mengikut mana-mana yang berkenaan, ke atas jumlah itu pada suatu kadar yang diputuskan oleh Perbadanan bagi tempoh bermula pada tarikh penggulungan itu mula berkuat kuasa berhubungan dengan suatu institusi anggota yang memegang deposit itu dan berakhir pada tarikh bayaran itu dibuat berkenaan dengan deposit itu, tetapi agregat bayaran yang

dibuat di bawah seksyen ini dan seksyen 55 berhubungan dengan deposit itu hendaklah dalam apa-apa hal tidak melebihi enam puluh ribu ringgit.

Bagaimana pulangan atau faedah atas deposit dikira bagi bayaran budi bicara

61. Bagi maksud mengira bayaran oleh Perbadanan berkenaan dengan mana-mana deposit diinsuranskan oleh Perbadanan di mana Perbadanan membuat suatu bayaran budi bicara—

- (a) tertakluk kepada perenggan (b), pulangan atau faedah terakru, mengikut mana-mana yang berkenaan, berhubungan dengan deposit itu hendaklah dimasukkan hanya sehingga ke tarikh bayaran oleh Perbadanan; atau
- (b) jika suatu prosiding bagi penggulungan suatu institusi anggota yang memegang deposit itu telah dimulakan sebelum tarikh bayaran oleh Perbadanan tetapi suatu perintah penggulungan belum lagi dibuat, pulangan atau faedah terakru, mengikut mana-mana yang berkenaan, berhubungan dengan deposit itu hendaklah dimasukkan hanya sehingga ke tarikh kuat kuasa penggulungan itu mula berkuat kuasa.

Pulangan atau faedah atas deposit berkaitan indeks

62. Apa-apa pulangan atau faedah, mengikut mana-mana yang berkenaan, yang disebut dalam seksyen 59 atau 61 berhubungan dengan suatu deposit yang dipegang oleh suatu institusi anggota hendaklah diputuskan mengikut kaedah yang ditetapkan oleh Perbadanan jika suatu bayaran yang perlu dibuat oleh institusi anggota itu berkenaan dengan deposit itu akan diputuskan secara keseluruhan atau sebahagian, dengan merujuk dalam apa-apa cara kepada—

- (a) harga pasaran sesuatu sekuriti, komoditi atau surat cara kewangan;
- (b) kadar pertukaran antara dua mata wang;
- (c) suatu kadar rujukan yang diputuskan dengan merujuk kepada mana-mana satu atau lebih harga atau kadar itu;
- (d) suatu kadar rujukan yang diputuskan dengan merujuk kepada mana-mana satu atau lebih keadaan bukan kewangan; atau

(e) apa-apa indeks boleh ubah lain atau sumber rujukan sebagaimana yang boleh ditentukan oleh Perbadanan.

Pelepasan liabiliti

63. Bayaran di bawah Bab ini oleh Perbadanan dikenakan dengan mana-mana deposit diinsuranskan oleh Perbadanan melepaskan Perbadanan daripada semua liabiliti sehingga takat jumlah bayaran yang dibuat * dikenakan dengan deposit itu, dan tiada dalam apa-apa hal keadaan pun Perbadanan tidak mempunyai apa-apa kewajipan untuk memastikan pemakaian wajar dalam apa-apa cara atas bayaran yang dibuat itu.

Subrogasi

64. Jika Perbadanan membuat suatu bayaran di bawah Bab ini dikenakan dengan mana-mana deposit, Perbadanan adalah disubrogasi, sehingga takat jumlah bayaran yang dibuat, terhadap semua hak dan kepentingan pendeposit dan boleh mengambil suatu tindakan berkenaan dengan hak dan kepentingan itu atas nama pendeposit atau atas nama Perbadanan.

Penyerahhakan

65. Jika Perbadanan menyifatkannya sebagai wajar, Perbadanan boleh menahan bayaran berkenaan dengan mana-mana deposit dengan sesuatu institusi anggota sehingga ia telah menerima suatu penyerahhakan bertulis akan semua hak dan kepentingan pendeposit berhubungan dengan deposit itu.

Batasan masa bagi tuntutan

66. Tiada tindakan boleh diambil terhadap Perbadanan berkenaan dengan kewajipan Perbadanan untuk membuat bayaran berhubungan dengan suatu deposit yang dipegang oleh suatu institusi anggota yang sedang digulungkan melainkan jika tindakan itu dimulakan dalam masa sepuluh tahun selepas tarikh penggulungan itu mula berkuat kuasa.

Bank Negara Malaysia untuk mengemukakan maklumat

67. Bank Negara Malaysia boleh, dalam masa yang sesuai mengemukakan kepada Perbadanan—

- (a) laporan bertulis susulan daripada pemeriksaan yang dijalankan di bawah seksyen 69 Akta Bank dan Institusi-Institusi Kewangan 1989 atau seksyen 31 Akta Bank Islam 1983 atau mana-mana undang-undang berkaitan lain yang suatu institusi anggota itu adalah tertakluk;
- (b) suatu perkadaran atau melalui mana-mana cara lain, suatu pentaksiran mengenai keselamatan dan kukuhannya institusi anggota, termasuklah keadaan kewangannya;
- (c) apa-apa maklumat yang Bank Negara Malaysia merasakan berkaitan mengenai apa-apa perkara yang disebut dalam perenggan (a) atau (b); atau
- (d) apa-apa maklumat yang didapati daripada perhatian Bank Negara Malaysia mengenai apa-apa perubahan dalam hal keadaan institusi anggota yang boleh memberi kesan secara material kepada kedudukan Perbadanan sebagai penanggung insurans.

Pemeriksaan

68. (1) Bagi maksud Akta ini, Bank Negara Malaysia boleh memeriksa operasi sesuatu institusi anggota atas permintaan Perbadanan.

(2) Bidang pemeriksaan di bawah subseksyen (1) boleh meliputi pemeriksaan mengenai —

- (a) sama ada rekod deposit yang disenggarakan oleh suatu institusi anggota adalah wajar dan mencukupi;
- (b) sama ada laporan yang dibuat oleh suatu institusi anggota mengenai premiumnya adalah betul secara substansial;
- (c) pematuhan terhadap terma dan syarat atau apa-apa keperluan lain bagi keanggotaan; atau

(d) mana-mana hal lain yang dipersetujui secara bersama dengan Bank Negara Malaysia.

(3) Perbadanan boleh, dengan kebenaran bertulis terlebih dahulu oleh Bank Negara Malaysia, menugaskan suatu audit bebas berkenaan dengan pemeriksaan di bawah subseksyen (1) atau subseksyen 69(1).

(4) Suatu salinan apa-apa laporan yang dibuat di bawah subseksyen (3) hendaklah dikemukakan oleh Perbadanan kepada Bank Negara Malaysia dalam suatu tempoh selama tiga bulan selepas penyajian laporan.

(5) Perbadanan boleh mendapatkan mana-mana kos yang ditanggung di bawah seksyen ini daripada suatu institusi anggota sebagai suatu hutang yang kena dibayar dan boleh dibayar kepada Perbadanan.

Pemeriksaan khas

69. (1) Jika Perbadanan mempunyai sebab untuk mempercayai bahawa suatu bayaran yang dibuat di bawah Bab 4 Bahagian IV hampir berlaku Perbadanan boleh menjalankan pemeriksaan khas menurut mana-mana perjanjian perikatan strategik yang dibuat dengan Bank Negara Malaysia di bawah perenggan 25(2)(g).

(2) Bidang pemeriksaan khas di bawah subseksyen (1) boleh meliputi pemeriksaan rekod, buku, akaun atau dokumen dan transaksi lain suatu institusi anggota.

(3) Bagi maksud seksyen ini, pegawai atau pekerja Perbadanan atau mana-mana orang lain yang dilantik oleh Perbadanan adalah berhak untuk menghendaki pegawai, juruaudit, penerima, pengurus, penerima dan pengurus, pelikuidasi, ejen atau mana-mana orang lain daripada institusi anggota itu untuk mengemukakan apa-apa dokumen, bahan, maklumat atau penjelasan sebagaimana yang dikehendaki oleh Perbadanan.

(4) Perbadanan boleh mendapatkan apa-apa kos pemeriksaan khas daripada suatu institusi anggota sebagai suatu hutang yang kena dibayar dan boleh dibayar kepada Perbadanan.

(5) Perbadanan hendaklah membuat suatu laporan kepada Bank Negara Malaysia apabila selesainya pemeriksaan khas itu.

BAHAGIAN VI

TINDAKAN OLEH PERBADANAN

Pemberitahuan mengenai takberdaya maju

70. Bank Negara Malaysia boleh memberitahu Perbadanan secara bertulis jika suatu institusi anggota telah terhenti, atau, berkemungkinan untuk terhenti, menjadi berdaya maju.

Kuasa Perbadanan dalam hal institusi anggota takberdaya maju

71. (1) Jika Perbadanan telah menerima suatu pemberitahuan di bawah seksyen 70, ia boleh menjalankan satu atau lebih kuasa yang berikut:

- (a) menghendaki institusi anggota itu—
 - (i) mengambil apa-apa langkah, atau apa-apa tindakan, atau untuk melakukan atau tidak melakukan apa-apa tindakan atau perkara, berhubungan dengan dirinya, perniagaannya atau pegawainya dalam masa sebagaimana yang dirasakan perlu atau suai manfaat oleh Perbadanan;
 - (ii) untuk berhenti daripada menerima, mengambil, menyetujui atau membayar deposit atau daripada menjalankan keseluruhan perniagaannya atau sebahagian daripadanya; atau
 - (iii) untuk menyusun semula keseluruhan atau sebahagian daripada perniagaan institusi anggota itu,sebagaimana yang boleh ditentukan oleh Perbadanan;
- (b) walau apa jua pun perenggan 25(2)(a), memperolehi syer institusi anggota itu daripada pemegang syernya yang sedia ada atau melanggan syer yang dikeluarkan oleh institusi anggota itu menurut dokumen konstituen institusi anggota itu;
- (c) mengambil alih kawalan keseluruhan aset, liabiliti, urusan dan hal-ehwal institusi anggota itu, dan menjalankan kesemua perniagaan dan mengurus aset, liabiliti dan hal-ehwal, atau mengambil alih kawalan apa-apa bahagian aset, liabiliti, urusan dan hal-ehwalnya, termasuklah melupuskan aset dan menjalankan apa-apa bahagian urusan

dan hal-ehwalnya atau melantik mana-mana orang untuk berbuat demikian bagi pihaknya (selepas ini dalam Bahagian ini disebut sebagai "orang yang dilantik"), dan terma dan syarat orang yang dilantik hendaklah, tertakluk kepada arahan yang pelantikan itu dibuat, diputuskan oleh Perbadanan dan hendaklah mengikat institusi anggota berkenaan; dan membayar kos dan perbelanjaan Perbadanan atau saraan orang yang dilantik itu, mengikut mana-mana yang berkenaan, daripada kumpulan wang dan aset institusi anggota itu sebagai gadaian pertama ke atasnya;

- (d) memohon kepada Mahkamah Tinggi untuk melantik seorang penerima, pengurus atau penerima dan pengurus untuk mengurus kesemua atau sebahagian aset, liabiliti, urusan dan hal-ehwal institusi anggota itu; atau
- (e) tertakluk kepada kebenaran Menteri, mengemukakan suatu petisyen kepada Mahkamah Tinggi bagi menggulung institusi anggota itu atau mana-mana institusi kewangan yang keanggotaannya telah dibatalkan di bawah seksyen 39 atau ditamatkan di bawah seksyen 40.

(2) Perbadanan atau orang yang dilantik, dalam melaksanakan mana-mana transaksi di bawah Bahagian ini—

- (a) tidaklah perlu memaklumkan atau mendapatkan kelulusan pemegang syer atau pemiutang institusi anggota itu dalam suatu mesyuarat agung atau selainnya walau apa jua pun apa-apa kaedah undang-undang, kontrak atau apa-apa jua dalam mana-mana undang-undang termasuklah seksyen 132c, 132D, 132E dan 132G Akta Syarikat 1965 atau apa-apa jua dalam dokumen konstituen institusi anggota itu; dan
- (b) tidaklah perlu untuk membuat suatu tawaran ambil alih atau dikehendaki untuk memperoleh syer pemegang syer lain mana-mana institusi anggota atau peminjamnya walau apa jua pun apa-apa kaedah undang-undang, kontrak atau apa-apa jua dalam mana-mana undang-undang.

(3) Mana-mana orang yang gagal untuk mematuhi apa-apa kehendak seksyen ini adalah melakukan suatu kesalahan dan boleh, apabila disabitkan, didenda tidak melebihi lima juta ringgit atau dipenjarakan selama suatu tempoh tidak melebihi lima tahun atau

kedua-duanya, dan boleh, sebagai tambahan, didenda tidak melebihi lima puluh ribu ringgit bagi setiap hari kesalahan itu berterusan selepas sabitan.

Penyelesaian ketetapan

72. (1) Jika Perbadanan telah mengambil alih kawalan atau melantik seseorang untuk berbuat demikian bagi pihaknya di bawah perenggan 71(1)(c), Perbadanan dan orang yang dilantik itu boleh, sebagai tambahan kepada mana-mana hak dan kuasanya, menjalankan mana-mana ketetapan yang meliputi—

- (a) satu transaksi atau beberapa siri transaksi yang melibatkan jualan atau pelupusan lain oleh institusi anggota itu ke atas kesemua atau sebahagian daripada asetnya atau pengambilalihan oleh seorang yang lain ke atas keseluruhan atau sebahagian daripada liabilitinya atau kedua-duanya; atau
- (b) apa-apa transaksi lain atau beberapa siri transaksi lain bagi maksud untuk menyusun semula kesemua atau sebahagian urusan institusi anggota itu.

(2) Jika Perbadanan menimbangkan bahawa mana-mana ketetapan yang disebutkan dalam subseksyen (1) telah diselesaikan secara substansial, ia hendaklah menyebabkan satu notis atas hal itu yang menyatakan tarikh ketetapan itu telah, pada pendapat Perbadanan, diselesaikan secara substansial untuk disiarkan dalam *Warta*.

(3) Perbadanan hendaklah membuat petisyen bagi suatu penggulangan terhadap institusi anggota itu sekiranya, pada pendapat Perbadanan, mana-mana ketetapan yang disebut dalam subseksyen (1) tidak lengkap secara substansial pada atau sebelum tarikh iaitu—

- (a) dua tahun selepas tarikh Perbadanan atau orang yang dilantik mengambil alih kawalan institusi anggota itu; atau
- (b) tamat tempoh bagi mana-mana lanjutan tempoh yang dinyatakan dalam subseksyen (4).

(4) Menteri boleh, atas syor Perbadanan, membenarkan satu atau lebih lanjutan ke atas tempoh yang dinyatakan dalam

perenggan (3)(b) bagi sesuatu tempoh lanjutan yang tidak melebihi tiga tahun dan setiap lanjutan tidak boleh melebihi satu tahun.

(5) Tempoh yang dinyatakan di bawah subseksyen (3) dan (4) tidak boleh melebihi lima tahun dari tarikh Perbadanan atau orang yang dilantik itu mengambil alih kawalan institusi anggota itu.

Penubuhan Jawatankuasa Pentaksir

73. (1) Maka adalah dengan ini ditubuhkan satu jawatankuasa dengan nama "Jawatankuasa Pentaksir" yang fungsinya adalah seperti yang dinyatakan dalam Jadual Pertama.

(2) Mana-mana keputusan yang dibuat oleh Jawatankuasa Pentaksir ke atas suatu permohonan pemegang syer yang menentang di bawah Jadual Pertama adalah muktamad dan mengikat.

(3) Sehingga Perbadanan menetapkan kaedah di bawah subseksyen (4), Jawatankuasa Pentaksir boleh memutuskan tata cara dan kelakuannya sendiri bagi prosidingnya.

(4) Perbadanan boleh menetapkan kaedah berkaitan dengan tata cara dan kelakuan prosiding atau di hadapan Jawatankuasa Pentaksir dan kaedah itu hendaklah mengatasi apa-apa tata cara dan kelakuan yang diputuskan terlebih dahulu oleh Jawatankuasa Pentaksir di bawah subseksyen (3).

Peruntukan berhubungan dengan pengambilalihan kawalan di bawah perenggan 71(l)(c)

74. (1) Jika kawalan sesuatu institusi anggota telah diambil alih di bawah perenggan 71(l)(c), institusi anggota dan pegawainya hendaklah serta merta mengemukakan aset, liabiliti, urusan dan hal-ehwalnya kepada kawalan itu, dan hendaklah memperuntukkan Perbadanan dan, jika kawalan itu diambil alih oleh orang yang dilantik, juga kepada orang yang dilantik, segala kemudahan yang boleh dikehendaki untuk menjalankan perniagaan dan menguruskan aset, liabiliti dan hal-ehwal, termasuklah melupuskan aset, institusi anggota itu.

(2) Jika kawalan sesuatu institusi anggota telah diambil alih di bawah perenggan 71(l)(c), Perbadanan atau orang yang dilantik,

mengikut mana-mana yang berkenaan, hendaklah kekal mengawal aset, liabiliti, urusan dan hal-ehwal institusi anggota berkenaan, dan menjalankan urusan dan menguruskan aset, liabiliti dan hal-ehwal, termasuklah melupuskan aset, institusi itu atas nama dan bagi pihak institusi itu sehingga pelantikan itu dibatalkan oleh Perbadanan.

(3) Sepanjang tempoh kawalan sesuatu institusi anggota di bawah perenggan 71(1)(c), maka hendaklah terletak pada Perbadanan atau pada orang yang dilantik, mengikut mana-mana yang berkenaan, semua kuasa institusi anggota, dan pengarahnya, di bawah dokumen konstituen institusi itu, atau yang boleh dijalankan oleh institusi anggota atau pengarahnya di bawah mana-mana undang-undang, atau bagaimana jua pun selainnya, tidak kira sama ada kuasa itu boleh dilaksanakan melalui ketetapan, ketetapan khas, atau mengikut apa-apa jua cara lain.

(4) Selama tempoh kawalan sesuatu institusi anggota di bawah perenggan 71(1)(c) masih berkuat kuasa, tiada pengarah institusi anggota boleh, sama ada secara langsung atau tak langsung, terlibat dalam apa-apa aktiviti yang berkaitan dengan institusi anggota itu, kecuali sebagaimana yang dikehendaki atau dibenarkan oleh Perbadanan, atau orang yang dilantik, mengikut mana-mana yang berkenaan, dan tiada saraan daripada apa-apa jua jenis boleh terakru atau boleh dibayar kepada mana-mana pengarah institusi anggota itu, kecuali sebagaimana yang diluluskan secara bertulis oleh Perbadanan atau orang yang dilantik, mengikut mana-mana yang berkenaan, yang berhubungan dengan apa-apa aktiviti yang dikehendaki atau dibenarkan sebagaimana yang disebutkan di atas oleh Perbadanan atau orang yang dilantik, mengikut mana-mana yang berkenaan.

(5) Bagi mengelakkan keraguan, adalah dengan ini diisytiharkan bahawa suatu pelaksanaan kuasa di bawah perenggan 71(1)(c) tidaklah mempunyai kesan sebagai memberi kepada, atau meletakkan pada, Perbadanan atau orang yang dilantik, mengikut mana-mana yang berkenaan, apa-apa hak kepada, atau apa-apa kepentingan benefisial dalam, mana-mana aset institusi anggota itu.

(6) Jika Perbadanan atau orang yang dilantik telah mengambil alih kawalan suatu institusi anggota di bawah perenggan 71(1)(c), Perbadanan atau orang yang dilantik—

- (a) dalam menjalankan urusan dan menguruskan aset, liabiliti dan hal-ehwal institusi anggota atau dalam menjalankan

mana-mana transaksi yang berkaitan dengan institusi anggota itu atau aset, urusan dan hal-ehwalnya, termasuklah melupuskan aset, hendaklah disifatkan bertindak sebagai ejen kepada institusi anggota itu; dan

- (b) tidak boleh, dengan alasan mengambil alih kawalan institusi anggota itu atau apa-apa tindakan yang diambil olehnya, bertanggung sebagai telah mengambil alih atau telah menanggung apa-apa kewajipan atau liabiliti institusi anggota itu atas dirinya sendiri.

(7) Mana-mana orang yang gagal untuk mematuhi subseksyen (1) atau (4) adalah melakukan suatu kesalahan dan boleh, apabila disabitkan, didenda tidak melebihi lima juta ringgit atau dipenjarakan selama suatu tempoh tidak melebihi lima tahun atau kedua-duanya, dan boleh, sebagai tambahan, didenda tidak melebihi lima puluh ribu ringgit bagi setiap hari kesalahan itu berterusan selepas sabitan.

Kuasa mengurangkan modal syer dan membatalkan syer institusi anggota di bawah perenggan 71(1)(c)

75. (1) Jika Perbadanan atau seorang yang dilantik, telah mengambil alih kawalan institusi anggota di bawah perenggan 71(1)(c) dan Perbadanan atau orang yang dilantik, berpendapat bahawa modal berbayar institusi itu telah kerugian atau tidak digambarkan oleh aset yang ada, Perbadanan atau orang yang dilantik, mengikut mana-mana yang berkenaan, boleh memohon kepada Mahkamah Tinggi untuk suatu perintah bagi mengurangkan modal syer institusi itu dengan membatalkan apa-apa bahagian modal berbayarnya yang telah kerugian atau tidak digambarkan oleh aset yang ada.

(2) Jika Mahkamah Tinggi membuat suatu perintah di bawah subseksyen (1) untuk mengurangkan modal syer sesuatu institusi anggota, Mahkamah boleh—

- (a) atas suatu permohonan oleh Perbadanan atau orang yang dilantik, mengikut mana-mana yang berkenaan; dan
- (b) jika, apabila tamatnya tempoh tiga puluh hari dari tarikh apa-apa panggilan yang dibuat oleh institusi anggota itu kepada pemegang syernya supaya membayar syer mereka masing-masing, bayaran bagi apa-apa syer itu belum lagi dibuat,

juga memerintahkan supaya syer itu yang bayarannya belum lagi dibuat dibatalkan dengan sewajarnya.

(3) Jika modal syer sesuatu institusi anggota dikurangkan di bawah subseksyen (1), atau mana-mana syernya telah dibatalkan di bawah subseksyen (2), Perbadanan atau orang dilantik, mengikut mana-mana yang berkenaan, boleh menyebabkan dokumen konstituen institusi itu diubah dengan/ sewajarnya.

(4) Kuasa yang diberikan kepada Perbadanan atau orang yang dilantik di bawah peruntukan yang disebut di atas dalam seksyen ini hendaklah sebagai tambahan kepada apa-apa kuasa yang boleh dijalankan di bawah subseksyen 64(1) Akta Syarikat 1965, dan jika sesuatu permohonan dibuat kepada Mahkamah Tinggi di bawah subseksyen (1) —

- (a) Mahkamah Tinggi boleh menjalankan mana-mana kuasa yang diberikan kepadanya di bawah seksyen 64 Akta Syarikat 1965 berhubungan dengan suatu permohonan bagi pengesahan yang disebutkan di dalam permohonan itu; dan
- (b) subseksyen 64(9) dan (10) Akta Syarikat 1965 hendaklah terpakai berhubungan dengan permohonan itu.

Penggantungan prosiding

76. (1) Jika Perbadanan atau orang yang dilantik, mengikut mana-mana yang berkenaan, telah mengambil alih kawalan sesuatu institusi anggota di bawah perenggan 71(1)(c)—

- (a) tiada injunksi boleh dibenarkan atau mana-mana tindakan atau prosiding guaman lain boleh dimulakan terhadap Perbadanan atau orang yang dilantik berkenaan dengan pengambilalihan kawalan;
- (b) tiada injunksi boleh dibenarkan atau mana-mana tindakan atau prosiding guaman lain boleh dimulakan atau diteruskan terhadap institusi anggota atau berhubungan dengan asetnya;
- (c) tiada penahanan, garnisan, pelaksanaan atau cara penguatkuasaan lain suatu penghakiman atau perintah terhadap institusi anggota atau asetnya boleh diambil atau diteruskan;

- (d) tiada pemiutang institusi anggota mempunyai apa-apa remedi terhadap institusi anggota atau asetnya;
- (e) tiada pemiutang mempunyai apa-apa hak tolakan terhadap institusi anggota, bagi lebih pasti, tidaklah termasuk penyatuan akaun yang disenggara dalam perjalanan biasa bagi maksud memperuntukkan perkhidmatan penjelasan dan penyelesaian atau perkhidmatan yang disebut dalam seksyen 79; dan
- (f) tiada seseorang pun boleh menamatkan atau meminda apa-apa perjanjian dengan institusi anggota atau menuntut suatu bayaran dipercepatkan di bawah apa-apa perjanjian sedemikian dengan institusi anggota itu hanya oleh sebab—
 - (i) ketaksolvenan institusi anggota itu;
 - (ii) suatu keingkaran, sebelum pengambilalihan kawalan di bawah perenggan 71(l)(c) oleh Perbadanan atau orang yang dilantik, mengikut mana-mana yang berkenaan, berkuat kuasa, oleh institusi anggota itu dalam melaksanakan kewajibannya di bawah perjanjian itu; atau
 - (iii) pengambilalihan kawalan di bawah perenggan 71(l)(c) oleh Perbadanan atau orang yang dilantik, mengikut mana-mana yang berkenaan,

dari tarikh pengambilalihan kawalan institusi anggota itu oleh Perbadanan atau orang yang dilantik, mengikut mana-mana yang berkenaan.

(2) Subseksyen (1) tidak boleh menghalang mana-mana orang yang menanggung kerugian daripada apa-apa tindakan Perbadanan atau orang yang dilantik daripada memulakan suatu tindakan bagi ganti rugi untuk kerugian yang dialami oleh orang itu.

(3) Walau apa-apa jua pun tindakan yang dimulakan menurut subseksyen (2), Perbadanan atau orang yang dilantik boleh meneruskan pelaksanaan mana-mana atau kesemua kuasanya di bawah Akta ini.

Pelanjutan masa

77. Jika-

- (a) bagi apa-apa maksud suatu tindakan dikehendaki dilakukan dalam suatu tempoh yang tertentu atau sebelum suatu masa yang tertentu di bawah peruntukan mana-mana undang-undang atau mana-mana perjanjian; dan
- (b) Akta ini menghalang tindakan itu daripada dilakukan dalam tempoh atau sebelum masa itu,

maka tempoh itu disifatkan sebagai dilanjutkan atau masa itu disifatkan sebagai ditangguhkan selama tempoh tindakan itu dihalang oleh Akta ini daripada dilakukan.

Perjanjian diatasi bagi maksud perenggan 71(1)(c)

78. Jika Perbadanan atau orang yang dilantik, mengikut mana-mana yang berkenaan, telah mengambil alih kawalan suatu institusi anggota di bawah perenggan 71(1)(c), apa-apa ketentuan dalam mana-mana perjanjian yang dibuat oleh institusi anggota itu sebelum pengambilalihan kawalan tidak mempunyai kuat kuasa atau kesan sekiranya ia—

- (a) mempunyai kesan untuk memperuntukkan bagi, atau membenarkan, apa-apa jua pun, dalam perkara matan, yang bertentangan dengan seksyen 76; atau
- (b) memperuntukkan, dalam perkara matan, bahawa atas —
 - (i) ketaksolvenan institusi anggota itu;
 - (ii) keingkaran oleh institusi anggota itu dalam pelaksanaan suatu kewajipan; atau
 - (iii) pengambilalihan kawalan,

institusi anggota itu terhenti untuk mempunyai hak untuk menggunakan atau berurusan dengan aset yang jika tidak institusi anggota itu sepatutnya ada.

Perbekalan dan pendahuluan lanjutan

79. Tiada apa pun dalam seksyen 76 dan 78 boleh ditafsirkan sebagai—

- (a) melarang seseorang daripada menghendaki bayaran dibuat secara tunai bagi barangan, perkhidmatan, penggunaan

harta dipajakkan atau dilesenkan atau balasan berharga lain yang diperuntukkan selepas pengambilalihan kawalan di bawah perenggan 71(1)(c) atau pelantikan seorang penerima, pengurus atau penerima dan pengurus di bawah perenggan 71(1)(d), mengikut mana-mana yang berkenaan;

- (b) menghendaki pendahuluan wang atau kredit kepada suatu institusi anggota selepas pengambilalihan kawalan di bawah perenggan 71(1)(c) atau pelantikan seorang penerima, pengurus atau penerima dan pengurus di bawah perenggan , mengikut mana-mana yang berkenaan; atau
- (c) menghendakki peruntukan kepada sesuatu institusi anggota, selepas pengambilalihan kawalan di bawah perenggan 71(1)(c) atau pelantikan seorang penerima, pengurus atau penerima dan pengurus di bawah perenggan 71(1)(d) bagi mana-mana perkhidmatan berikut jika dilakukan berkemungkinan, mengikut mana-mana yang berkenaan, pada pendapat munasabah orang yang memberikan perkhidmatan itu, akan menyebabkan orang yang mendahulukan wang atau kredit kepada suatu institusi anggota setelah pengambilalihan kawalan atau pelantikan atau yang membawa kepada, selepas pengambilalihan kawalan atau pelantikan berkenaan, kepada suatu tuntutan oleh orang itu terhadap suatu institusi anggota, iaitu—
 - (i) perkhidmatan pengurusan wang tunai;
 - (ii) perkhidmatan berhubungan dengan penebusan surat cara hutang;
 - (iii) perkhidmatan berhubungan dengan pengeluaran surat kredit atau jaminan;
 - (iv) perkhidmatan perakuan cek;
 - (v) perkhidmatan perbekalan mata wang;
 - (vi) perkhidmatan pemindahan kumpulan wang dan perintah pengiriman wang;
 - (vii) perkhidmatan hantar serah sekuriti dan penyelesaian;
 - (viii) perkhidmatan kad caj, kad kredit, kad debit dan kad bayaran;
 - (ix) perkhidmatan perbankan automatik dan mesin teler;
 - (x) perkhidmatan pemindahan kumpulan wang secara elektronik di tempat jualan;

- (xi) perkhidmatan cek konsainan;
- (xii) perkhidmatan lain yang seumpama dengan yang disebutkan dalam subperenggan (i) hingga (xi);
- (xiii) mana-mana perkhidmatan sejenis yang ditetapkan dalam peraturan; dan
- (xiv) suatu jaminan liabiliti berkenaan dengan mana-mana perkhidmatan yang disebut dalam subperenggan (i) hingga (xiii).

Perjanjian atau transaksi kewangan

80. Tiada apa pun dalam seksyen 76 boleh menghalang penamatan mana-mana perjanjian atau transaksi berikut mengikut termannya atau penolakan suatu jumlah boleh dibayar dalam perjanjian atau transaksi itu termasuklah:

- (a) suatu perjanjian mata wang atau swap kadar faedah;
- (b) suatu perjanjian semerta, niaga hadapan, hadapan atau pertukaran mata wang asing lain;
- (c) suatu swap komoditi;
- (d) suatu perjanjian belian semula;
- (e) mana-mana terbitan, gabungan atau opsyen berkenaan dengan atau perjanjian yang seumpama dengan, suatu perjanjian atau transaksi yang disebut dalam perenggan (a) hingga (d);
- (f) mana-mana perjanjian induk berkenaan dengan mana-mana perjanjian atau transaksi yang disebut dalam perenggan (a) hingga (d);
- (g) suatu jaminan liabiliti di bawah suatu perjanjian atau transaksi yang disebut dalam perenggan (a) hingga (d); atau
- (h) mana-mana perjanjian atau transaksi daripada suatu jenis yang ditetapkan dalam peraturan.

Peruntukan berhubung dengan pelantikan di bawah perenggan 71(1)(c) dan (d)

81. (1) Berhubung dengan suatu institusi anggota yang Perbadanan atau orang yang dilantik, mengikut mana-mana yang berkenaan, telah mengambil alih kawalan di bawah perenggan 71(1)(c) atau seorang penerima, pengurus atau penerima dan pengurus telah dilantik di bawah perenggan 71(1)(d), Perbadanan, orang yang dilantik, penerima, pengurus atau penerima dan pengurus, mengikut mana-mana yang berkenaan, hendaklah mempunyai kuasa—

- (a) (i) untuk memasuki ke dalam mana-mana premis suatu institusi anggota dan mengambil milik dan kawalan atas aset dan menghendaki mana-mana orang di dalam premis itu untuk bertanggungjawab dan menyerahkan kepada Perbadanan, orang yang dilantik, penerima, pengurus atau penerima dan pengurus, mengikut mana-mana yang berkenaan, milikan dan kawalan atas aset itu;
- (ii) tertakluk kepada subperenggan (iii), untuk menjual atau selainnya melupuskan aset dan akujanji perniagaan institusi anggota itu melalui triti persendirian atau jualan awam atau dengan apa-apa cara lain pada terma dan syarat sebagaimana Perbadanan, orang yang dilantik, penerima, pengurus atau penerima dan pengurus, mengikut mana-mana yang berkenaan, menyifatkannya sesuai;
- (iii) untuk menjual atau selainnya melupuskan mana-mana aset yang tertakluk kepada sesuatu perjanjian yang mewujudkan suatu kepentingan cagaran kepada mana-mana orang yang bersetuju untuk mengambil alih kewajipan terjamin oleh kepentingan cagaran itu;
- (iv) untuk mengatur bagi pengambilalihan semua atau mana-mana bahagian liabiliti suatu institusi anggota oleh seseorang;
- (v) untuk menjalankan urusan sesuatu institusi anggota setakat yang Perbadanan, orang yang dilantik, penerima, pengurus atau penerima dan pengurus, mengikut mana-mana yang berkenaan, menyifatkannya perlu dan berfaedah;

- (vi) untuk menyaman bagi, membela, mengkompromi dan menyelesaikan, atas nama suatu institusi anggota, apa-apa tuntutan yang dibuat oleh atau terhadapnya;
 - (vii) atas nama suatu institusi anggota, membuat semua tindakan dan melaksanakan semua penerimaan dan dokumen lain dan bagi maksud itu, apabila perlu, menggunakan meterai biasanya; atau
 - (viii) membuat semua perkara lain sebagaimana yang mungkin perlu atau bersampingan dalam penjalanan hak, kuasa, keistimewaan dan imuniti Perbadanan, orang yang dilantik, penerima, pengurus atau penerima dan pengurus; atau
- (b) untuk mendapatkan kembali daripada aset suatu institusi anggota semua kos, caj dan perbelanjaan, termasuklah saraan, yang sepatutnya dibelanjakan oleh Perbadanan, orang yang dilantik, penerima, pengurus atau penerima dan pengurus dalam penjalanan kuasa di bawah perenggan (a), mendahului semua tuntutan lain.

(2) Tanpa membataskan subseksyen 74(6), jika Perbadanan, orang yang dilantik, penerima, pengurus atau penerima dan pengurus menjalankan satu atau lebih kuasa di bawah subseksyen (1), Perbadanan, orang yang dilantik, penerima, pengurus atau penerima dan pengurus itu tidak boleh, dengan alasan penjalanan kuasa demikian, dipertanggungkan sebagai telah mengambil alih atau dipertanggungkan apa-apa kewajipan atau liabiliti sesuatu institusi anggota itu bagi dirinya sendiri.

Keutamaan bayaran dalam hal keadaan penggulungan institusi anggota

- 82.** (1) (a) Jika sesuatu institusi anggota digulung di bawah perenggan 71(1)(e), hasil likuidasi institusi anggota itu hendaklah, tertakluk kepada seksyen 10 Akta Prosiding Kerajaan 1956 [*Akta 359*] dan perenggan (b), dibayar kepada pendeposit mendahului semua liabiliti tak bercagar yang lain:

Dengan syarat bahawa hasil daripada likuidasi—

- (i) aset Islam hendaklah digunakan untuk membayar deposit Islam; dan
- (ii) aset konvensional hendaklah digunakan untuk membayar deposit konvensional;

Dengan syarat selanjutnya bahawa mana-mana lebihan selepas membayar—

- (A) deposit Islam di bawah subperenggan (i) hendaklah digunakan untuk membayar deposit konvensional; dan
 - (B) deposit konvensional di bawah subperenggan (ii) hendaklah digunakan untuk membayar deposit Islam; dan
- (b) jika seseorang penerima, pengurus atau penerima dan pengurus telah dilantik di bawah perenggan 71(1)(d) atau suatu institusi anggota telah digulung di bawah perenggan 71(1)(e), semua kos, caj dan perbelanjaan sepatutnya, termasuklah saraan, bagi penerima, pengurus, penerima dan pengurus atau pelikudiasi yang dilantik hendaklah kena dibayar daripada aset institusi anggota itu mendahului daripada semua tuntutan lain.

(2) Tertakluk kepada peraturan yang dibuat di bawah seksyen 100 dan berhubungan dengan perenggan 71(1)(e), keutamaan bayaran bagi deposit Islam hendaklah mengikut cara yang berikut:

- (a) deposit Islam berasaskan jagaan; dan
- (b) deposit Islam lain.

Pemakaian Akta Bank dan Institusi-Institusi Kewangan 1989 Akta Bank Islam 1983

83. (1) Perbadanan dalam menggunakan mana-mana kuasanya di bawah Akta ini terhadap sesuatu institusi anggota yang dilesenkan di bawah Akta Bank dan Institusi-Institusi Kewangan 1989 atau di bawah Akta Bank Islam 1983, mengikut mana-mana yang berkenaan, hendaklah tertakluk kepada peruntukan Akta itu sebagai tambahan kepada peruntukan Akta ini dan tidak mengurangkan Akta itu.

(2) Jika terdapat apa-apa percanggahan atau ketakselarasan di antara peruntukan Akta Bank dan Institusi-Institusi Kewangan 1989 atau Akta Bank Islam 1983 dengan Akta ini, Akta-akta itu hendaklah terpakai.

BAHAGIAN VII

KESALAHAN

Pengemukakan diri sebagai institusi anggota

84. (1) Tiada seseorang pun boleh mengemukakan dirinya sebagai suatu institusi anggota, atau menggambarkan yang ia atau mana-mana orang lain adalah diinsuranskan di bawah sistem insurans deposit melainkan jika orang lain itu adalah suatu institusi anggota.

(2) Mana-mana orang yang melanggar subseksyen (1) adalah melakukan suatu kesalahan, dan boleh, apabila disabitkan, didenda tidak melebihi lima juta ringgit atau dipenjarakan selama suatu tempoh tidak melebihi lima tahun atau kedua-duanya dan boleh, sebagai tambahan, didenda harian tidak melebihi lima puluh ribu ringgit bagi setiap hari kesalahan itu berterusan selepas sabitan.

Pernyataan palsu

85. Mana-mana orang yang menyediakan, menandatangani, meluluskan atau menyetujui dalam mana-mana—

- (a) akaun, pernyataan, penyata, laporan atau dokumen lain yang dikehendaki untuk dikemukakan kepada Perbadanan di bawah Akta ini yang dia tahu atau mempunyai sebab untuk mempercayai adalah palsu, atau mengandungi maklumat palsu atau mengelirukan; atau
- (b) penyata yang tidak menunjukkan maklumat berpatutan yang dikehendaki untuk dikemukakan kepada Perbadanan di bawah Akta ini,

adalah melakukan suatu kesalahan dan boleh, apabila disabitkan, didenda tidak melebihi tiga juta ringgit atau dipenjarakan selama suatu tempoh tidak melebihi tiga tahun atau kedua-duanya dan

boleh, sebagai tambahan, didenda harian tidak melebihi tiga puluh ribu ringgit bagi setiap hari kesalahan itu berterusan selepas sabitan.

Kegagalan untuk memberi maklumat, dsb.

86. Setiap institusi anggota yang gagal atau cuai—

- (a) dalam tempoh masa yang ditentukan bagi berbuat demikian, untuk memberi Perbadanan apa-apa akaun, rekod, pernyataan, penyata, laporan atau dokumen lain berkenaan dengan urusan atau hal-ehwal suatu institusi anggota yang dikehendaki untuk dikemukakan kepada Perbadanan di bawah Akta ini; atau
- (b) untuk memberi maklum balas, dalam masa yang ditentukan di dalam notis, kepada suatu permintaan bagi maklumat atau penjelasan berkenaan dengan suatu institusi anggota yang dibuat oleh atau bagi pihak Perbadanan di bawah Akta ini,

adalah melakukan suatu kesalahan dan boleh, apabila disabitkan, didenda tidak melebihi satu juta ringgit atau dipenjarakan selama suatu tempoh tidak melebihi satu tahun atau kedua-duanya dan boleh, sebagai tambahan, didenda harian tidak melebihi sepuluh ribu ringgit bagi setiap hari kesalahan itu berterusan selepas sabitan.

Kesalahan am

87. Melainkan jika diperuntukkan selainnya dalam Akta ini, mana-mana orang, selain daripada Perbadanan, yang melanggar atau tidak mematuhi mana-mana peruntukan Akta ini atau apa-apa penentuan atau kehendak yang dibuat, atau apa-apa perintah bertulis, arahan, petunjuk, atau notis yang diberi, atau apa-apa batasan, terma, syarat atau sekatan yang dikenakan, atau apa-apa perkara lain bagaimana jua pun dilakukan, pada perjalanan mana-mana kuasa yang diberi di bawah, menurut, atau menurut kuasa, mana-mana peruntukan Akta ini adalah melakukan suatu kesalahan dan boleh, apabila disabitkan—

- (a) dalam hal orang sebenar, didenda tidak melebihi lima ratus ribu ringgit atau dipenjarakan selama suatu tempoh tidak melebihi enam bulan atau kedua-duanya dan boleh,

sebagai tambahan, didenda harian tidak melebihi lima ribu ringgit bagi setiap hari kesalahan itu berterusan selepas sabitan; atau

- (b) dalam mana-mana hal lain, didenda tidak melebihi satu juta ringgit.

Kesalahan oleh pertubuhan perbadanan atau bukan perbadanan atau oleh pengarah, pegawai, pengawal, dsb.

88. (1) Jika suatu kesalahan telah dilakukan oleh mana-mana pertubuhan perbadanan atau bukan perbadanan di bawah Akta ini, mana-mana orang yang pada masa kesalahan itu dilakukan merupakan seorang pengarah, pegawai atau pengawal pertubuhan perbadanan atau bukan perbadanan itu atau berupa sebagai bertindak atas apa-apa sifat sedemikian, atau telah dengan apa jua cara atau apa-apa takat bertanggungjawab bagi pelaksanaan apa-apa urusan atau bagi pengurusan apa-apa aset, liabiliti atau hal-ehwal pertubuhan perbadanan atau bukan perbadanan itu, atau telah membantu dalam pengurusan sedemikian, adalah melakukan kesalahan itu melainkan jika dia membuktikan bahawa kesalahan itu telah dilakukan tanpa persetujuan atau pembiarannya dan bahawa dia telah menjalankan segala usaha untuk mengelakkan berlakunya kesalahan itu sebagaimana yang sepatutnya telah dijalankannya, mengambil kira kepada jenis fungsinya atas sifat itu dan kepada segala hal keadaan.

(2) Jika mana-mana orang (selepas ini disebut sebagai "prinsipal" dalam subseksyen ini) adalah bertanggungjawab di bawah Akta ini bagi apa-apa hukuman atau penalti bagi setiap perbuatan, tinggalkan, pengabaian atau keingkaran, dia boleh dikenakan hukuman atau penalti yang sama bagi setiap perbuatan, tinggalkan, pengabaian atau keingkaran demikian yang dilakukan oleh mana-mana kerani, pengkhidmat atau ejennya, atau oleh kerani atau pengkhidmat ejen itu.

(3) Subseksyen (2) hendaklah terpakai jika perbuatan, tinggalkan, pengabaian atau keingkaran itu telah dilakukan oleh kerani atau pengkhidmat prinsipal itu dalam menjalankan kerjanya, atau oleh ejen itu semasa bertindak bagi pihak prinsipal, atau oleh kerani atau pengkhidmat ejen itu dalam menjalankan kerjanya dengan ejen itu atau selainnya bagi pihak ejen itu.

(4) Bagi maksud seksyen ini, "pengawal" hendaklah mempunyai erti yang diberikan di bawah subseksyen 2(1) Akta Bank dan Institusi-Institusi Kewangan 1989.

Kuasa Perbadanan untuk mengkompaun kesalahan

89. (1) Perbadanan, dengan persetujuan Pendakwa Raya, boleh dalam hal yang difikirkannya layak dan patut untuk berbuat sedemikian, mengkompaun apa-apa kesalahan yang dilakukan oleh mana-mana orang yang boleh dihukum di bawah Akta ini, dengan membuat suatu tawaran bertulis kepada orang itu untuk mengkompaun kesalahan dengan membayar kepada Perbadanan dalam masa yang ditentukan dalam tawaran itu apa-apa jumlah wang sebagaimana yang ditentukan dalam tawaran itu yang tidak boleh melebihi lima puluh peratus daripada denda maksimum termasuk denda harian, jika ada, dalam hal suatu kesalahan berterusan, yang akan dikenakan kepada orang itu jika dia telah disabitkan atas kesalahan itu.

(2) Apa-apa wang yang dibayar kepada Perbadanan menurut peruntukan subseksyen (1) hendaklah dibayar ke dalam dan menjadi sebahagian daripada Kumpulan Wang Disatukan.

(3) Sesuatu tawaran di bawah subseksyen (1) boleh dibuat pada bila-bila masa selepas kesalahan itu dilakukan tetapi sebelum apa-apa pendakwaan baginya telah dimulakan, dan jika amaun yang ditentukan dalam tawaran itu tidak dibayar dalam masa yang ditentukan dalam tawaran itu, atau apa-apa pelanjutan masa yang diberikan oleh Perbadanan, pendakwaan bagi kesalahan itu boleh dimulakan pada bila-bila masa selepas itu terhadap orang yang kepadanya tawaran itu dibuat.

(4) Jika sesuatu kesalahan telah dikompaun di bawah subseksyen (1), tiada pendakwaan boleh selepas itu dimulakan berkenaan dengan kesalahan itu terhadap orang yang kepadanya tawaran mengkompaun kesalahan itu dibuat.

Mahkamah boleh memerintahkan pematuhan

90. Jika seseorang telah disabitkan dengan suatu kesalahan di bawah Akta ini, mahkamah boleh, sebagai tambahan kepada mana-mana denda atau tempoh pemenjaraan yang boleh dikenakan, memerintahkan orang itu untuk membetulkan pelanggaran Akta ini yang berkenaan dengannya orang itu telah disabitkan.

Hukuman kewangan tambahan

91. Jika seseorang telah pun disabitkan dengan suatu kesalahan di bawah Akta ini, mahkamah boleh, jika ia berpuas hati bahawa sebagai akibat daripada pelakuan kesalahan itu orang yang disabitkan itu memperolehi suatu faedah kewangan atau bahawa suatu faedah kewangan telah terakru kepada orang itu, memerintahkan orang yang disabitkan itu untuk membayar, walau apa jua pun amaun maksimum mana-mana denda yang selainnya boleh dikenakan di bawah Akta ini, suatu denda tambahan dalam suatu amaun yang sama dengan anggaran mahkamah mengenai amaun faedah kewangan itu.

Perintah pematuhan atau penyekatan

92. Jika seseorang tidak mematuhi mana-mana peruntukan Akta ini yang terpakai berkenaan dengan orang itu, Perbadanan boleh memohon kepada suatu Mahkamah Tinggi untuk suatu perintah mengarahkan orang itu mematuhi atau menyekat orang itu daripada bertindak melanggar peruntukan itu dan, atas permohonan itu, mahkamah boleh memerintahkan sedemikian dan membuat apa-apa perintah lanjut yang difikirkannya patut.

Mendapatkan kembali denda

93. Segala denda yang boleh dibayar di bawah Akta ini boleh didapatkan kembali dan dikuatkuasakan, dengan kos, atas tindakan guaman oleh Perbadanan, dimulakan oleh Perbadanan dan, jika didapatkan kembali, hendaklah untuk dibayar ke dalam dan menjadi sebahagian daripada Kumpulan Wang Disatukan.

BAHAGIAN VIII

PERUNTUKAN AM

Pengemukaan maklumat kepada Perbadanan

94. (1) Melainkan diperuntukkan sebaliknya secara nyata dalam Akta ini, jika, bagi maksud penjalanan mana-mana kuasanya, pelaksanaan mana-mana fungsinya, atau penunaian mana-mana tugasnya, di bawah Akta ini, Perbadanan menghendaki apa-apa

maklumat daripada mana-mana institusi anggota atau daripada mana-mana perbadanan yang berkaitan dengan mana-mana institusi anggota, dalam apa-apa perkara berhubungan dengan urusan atau hal-ehwal institusi anggota atau perbadanan yang berkaitan itu, institusi anggota atau perbadanan yang berkaitan itu hendaklah, walau apa jua pun subseksyen 97(1) Akta Bank dan Institusi-Institusi Kewangan 1989 atau subseksyen 34(1) Akta Bank Islam 1983, mengemukakan maklumat itu kepada Perbadanan.

(2) Mana-mana pegawai atau ejen institusi anggota atau perbadanan yang berkaitan atau mana-mana orang lain yang mempunyai akses atau memegang atau memiliki buku, rekod, akaun atau dokumen lain suatu institusi anggota atau perbadanan yang berkaitan hendaklah, jika pada bila-bila masa diminta secara bertulis oleh Perbadanan untuk melakukan sedemikian, mengemukakan buku, rekod, akaun atau dokumen lain itu kepada Perbadanan sebagaimana yang ia kehendaki.

(3) Jika maklumat yang didapati oleh Perbadanan di bawah subseksyen (1) atau (2) berhubungan dengan akaun, urusan atau hal-ehwal mana-mana pelanggan mana-mana institusi anggota atau perbadanan yang berkaitan yang membekalkan maklumat, maka maklumat itu hendaklah menjadi rahsia di antara Perbadanan dengan institusi anggota itu atau perbadanan yang berkaitan yang membekalkannya.

(4) Mana-mana orang yang gagal untuk mematuhi apa-apa kehendak di bawah seksyen ini adalah melakukan suatu kesalahan dan boleh, apabila disabitkan, didenda tidak melebihi tiga juta ringgit dan boleh, sebagai tambahan, didenda harian tidak melebihi tiga puluh ribu ringgit bagi setiap hari kesalahan itu berterusan selepas sabitan.

Pengemukakan maklumat kepada Bank Negara Malaysia

95. Bank Negara Malaysia berhak kepada semua maklumat yang didapati oleh atau dikemukakan kepada Perbadanan, sama ada semasa menjalankan suatu pemeriksaan, penelitian atau selainnya, berkenaan dengan urusan dan hal-ehwal institusi anggota atau mana-mana subsidiarinya atau gabungannya atau mana-mana orang yang berurusan dengan institusi anggota itu atau mana-mana subsidiari atau gabungannya, yang berkaitan dengan keselamatan dan kekukuhan, atau pengendalian, institusi anggota itu.

Pengiktirafan kehakiman

96. Mahkamah hendaklah mengambil pengiktirafan kehakiman mengenai—

- (a) apa-apa fakta atau perkara yang dikehendaki disiarkan di bawah Akta ini; dan
- (b) apa-apa fakta atau perkara yang dinyatakan dalam apa-apa perakuan yang dikeluarkan di bawah Akta ini.

Penggulungan Perbadanan

97. Tiada statut berkaitan dengan ketaksolvenan atau penggulungan mana-mana pertubuhan perbadanan terpakai kepada Perbadanan dan tiada dalam apa jua keadaan urusan atau hal-ehwal Perbadanan boleh digulungkan.

Imuniti

98. (1) Tiada tindakan, guaman, pendakwaan atau apa-apa jua pun prosiding lain boleh dibuat, dibawa, dimulakan atau dikekalkan dalam mana-mana mahkamah atau di hadapan mana-mana pihak berkuasa lain terhadap—

- (a) Kerajaan Malaysia atau sesuatu Kerajaan Negeri;
- (b) Menteri;
- (c) Perbadanan;
- (d) Bank Negara Malaysia;
- (e) mana-mana pengarah, pegawai, pekerja atau ejen mana-mana Kerajaan, Perbadanan atau Bank Negara Malaysia, sama ada secara peribadi atau atas sifat rasminya;
- (f) penerima, pengurus, penerima dan pengurus, pelikuidasi atau konservator yang dilantik menurut Akta ini; atau
- (g) mana-mana orang yang bertindak secara sah bagi pihak mana-mana Kerajaan, Perbadanan, Bank Negara Malaysia, mana-mana pengarah, pegawai, pekerja atau ejen, sama ada secara peribadi atau atas sifatnya sebagai seorang yang bertindak bagi pihak sedemikian,

bagi atau oleh kerana, atau berkenaan dengan, apa-apa perbuatan yang dilakukan atau pernyataan yang dibuat atau ditinggalkan daripada dilakukan atau dibuat, atau yang berupa sebagai dilakukan atau dibuat atau ditinggalkan daripada dilakukan atau dibuat, menurut atau pada melaksanakan, atau penurutan atau pelaksanaan yang dimaksudkan, akan Akta ini, atau apa-apa perintah bertulis, arahan, petunjuk, notis atau apa-apa jua pun perkara lain yang dikeluarkan di bawah Akta ini:

Dengan syarat bahawa perbuatan atau pernyataan itu telah dilakukan atau dibuat, atau ditinggal daripada dilakukan atau dibuat, dengan suci hati.

(2) Bagi maksud seksyen ini, mana-mana anggota pentadbiran Kerajaan Malaysia atau Kerajaan Negeri hendaklah disifatkan sebagai seorang pegawai Kerajaan masing-masing.

(3) Tiada apa pun dalam subseksyen (1) boleh ditafsirkan untuk melepaskan Perbadanan daripada kewajipan untuk membuat bayaran berkenaan dengan suatu deposit diinsurans di bawah Akta ini.

Pemakaian dan ketakpemakaian Akta lain

99. (1) Akta Perlindungan Pihak Berkuasa Awam 1948 [*Akta 198*] hendaklah terpakai kepada mana-mana tindakan, guaman, pendakwaan atau prosiding terhadap Perbadanan atau pengarah, pegawai, pekerja atau ejen Perbadanan berkenaan dengan mana-mana perbuatan, tinggalkan, pengabaian atau pengingkaran yang dibuat atau dilakukan olehnya atas sifat rasminya.

(2) Akta Pemberi Pinjam Wang 1951 [*Akta 400*] tidaklah terpakai kepada Perbadanan.

Kuasa untuk membuat peraturan-peraturan, kaedah-kaedah, perintah, undang-undang kecil, arahan, garis panduan, pekeliling atau nota

100. (1) Perbadanan boleh membuat, dari semasa ke semasa—

(a) dengan kebenaran Menteri, apa-apa peraturan-peraturan, kaedah-kaedah atau perintah; atau

- (b) undang-undang kecil, arahan, garis panduan, pekeliling atau nota,

sebagaimana yang perlu atau suai manfaat untuk memberi kesan penuh kepada peruntukan Akta ini, untuk menjalankan atau mencapai objektif dan maksud Akta ini, atau mana-mana peruntukannya, atau untuk melaksanakan peruntukan Akta ini selanjutnya, dengan lebih baik atau lebih mudah.

(2) Mana-mana peraturan, kaedah, perintah, undang-undang kecil, arahan, garis panduan, pekeliling atau nota yang dibuat di bawah seksyen ini boleh berhubungan dengan semua, atau mana-mana kelas, kategori atau perihal orang dan peruntukan berlainan boleh dibuat bagi orang, kelas, kategori atau perihal orang yang berlainan.

(3) Tanpa menjejaskan keluasan subseksyen (1), apa-apa peraturan, kaedah, perintah, undang-undang kecil, arahan, garis panduan, pekeliling atau nota boleh dibuat berkenaan dengan—

- (a) borang, termasuklah borang pemberitahuan, notis dan perakuan, bagi maksud Akta ini;
- (b) kelakuan, urusan dan hal-ehwal Perbadanan;
- (c) deposit seorang pemegang amanah, pemilik bersama atau suatu deposit bagi suatu perniagaan atau amalan profesional di bawah seksyen 49;
- (d) perlindungan deposit dan hal berkaitan dengannya mengenai yang berikut:
 - (i) jika seseorang telah mendepositkan dengan dua atau lebih institusi anggota yang bergabung dan terus beroperasi sebagai suatu institusi anggota di bawah seksyen 50; atau
 - (ii) jika deposit itu akan diperolehi oleh seorang yang bukan suatu institusi anggota di bawah seksyen 51;
- (e) keutamaan bayaran bagi deposit Islam yang berkaitan dengan deposit Islam berdasarkan jagaan dan deposit Islam yang lain;

- (f) pulangan atau faedah yang boleh dibayar di bawah subsubperenggan 1(12)(j) Jadual Kedua;
- (g) borang, kaedah dan tata cara bagi mengkompaun kesalahan; atau
- (h) apa-apa jua di bawah Akta ini yang dikehendakki untuk dibuat sebagai peraturan-peraturan, kaedah-kaedah, perintah, undang-undang kecil, arahan, garis panduan, pekeliling atau nota.

(4) Apa-apa peraturan-peraturan atau perintah yang dibuat di bawah seksyen ini hendaklah disiarkan dalam *Warta* dan hendaklah dibentangkan di hadapan Dewan Rakyat secepat yang boleh dibuat selepas penyiarannya.

JADUAL PERTAMA

[Seksyen 73]

JAWATANKUASA PENTAKSIR

Takrif

1.(1) Dalam seksyen 73 dan Jadual ini —

"pemegang saham menentang" ertinya pemegang saham suatu institusi anggota, sama ada secara berseorangan atau secara kolektif memegang agregat syer tidak kurang daripada lima peratus daripada modal dikeluarkan dan berbayar institusi anggota, yang mempertikaikan harga diperniagakan;

"harga diperniagakan" ertinya harga pada mana suatu jualan atau pelupusan apa-apa aset atau perniagaan substansial suatu institusi anggota yang Perbadanan atau orang yang dilantik itu, mengikut mana-mana yang berkenaan, telah mengambil alih kawalan di bawah perenggan 71(1)(c) yang telah diperniagakan di bawah perenggan 2.

Notis

2. (1) Jika Perbadanan atau orang yang dilantik, mengikut mana-mana yang berkenaan, telah mengambil alih kawalan mana-mana institusi anggota di bawah perenggan 71(1)(c) dan Perbadanan atau orang yang dilantik itu mengurus niaga mana-mana aset atau perniagaan substansial institusi anggota itu secara jualan atau pelupusan, Perbadanan atau orang yang dilantik itu, mengikut mana-mana yang berkenaan, hendaklah memberi notis mengenai jualan atau pelupusan itu dalam sekurang-kurangnya dua akhbar harian yang disiarkan di Malaysia, satu daripadanya hendaklah dalam bahasa kebangsaan.

(2) Notis di bawah subperenggan (1) hendaklah—

- (i) menyatakan harga diperniagakan; dan
- (ii) menentukan bahawa mana-mana pemegang syer menentang boleh, tidak kurang daripada dua puluh satu hari dari tarikh notis di bawah subperenggan (1), memohon secara bertulis kepada Perbadanan bagi suatu kajian semula mengenai kemunasabahan harga diperniagakan oleh Jawatankuasa Pentaksir.

(3) Suatu permohonan di bawah subsubperenggan (2)(ii) hendaklah dalam bentuk sebagaimana yang ditetapkan oleh Perbadanan dari semasa ke semasa.

Kajian semula harga jualan aset atau perniagaan substansial oleh Jawatankuasa Pentaksir

3. (1) Jika Perbadanan menerima mana-mana permohonan daripada mana-mana pemegang syer menentang di bawah subsubperenggan 2(2)(ii), ia hendaklah dalam masa yang munasabah menubuhkan Jawatankuasa Pentaksir dan merujuk permohonan itu kepada Jawatankuasa itu.

(2) Jawatankuasa Pentaksir hendaklah terdiri daripada tiga orang, yang dipilih daripada suatu panel yang mengandungi sepuluh orang yang dilantik oleh Menteri, atas syor Perbadanan.

(3) Tiada tindakan atau prosiding oleh Jawatankuasa Pentaksir menjadi tak sah semata-mata oleh sebab—

- (a) apa-apa kecacatan dalam penubuhan Jawatankuasa Pentaksir; atau
- (b) apa-apa tinggalan, kecacatan atau luar aturan dalam prosiding Jawatankuasa Pentaksir.

Kuasa Jawatankuasa Pentaksir untuk mengkaji semula kemunasabahan harga diperniagakan

4. (1) Apabila suatu permohonan pemegang syer menentang dirujukkan kepada Jawatankuasa Pentaksir di bawah subperenggan 3(1), ia hendaklah mengkaji semula kemunasabahan harga diperniagakan itu.

(2) Dalam mengkaji semula kemunasabahan harga diperniagakan itu, Jawatankuasa Pentaksir hendaklah mengambil kira perkara berikut:

- (a) apa-apa perkara yang ia rasakan berkaitan termasuklah fakta bahawa suatu notis dalam perenggan 2 telah dikeluarkan; dan
- (b) keadaan pasaran yang terpakai bagi jualan atau pelupusan aset yang seumpama atau urusan di bawah suatu penerimaan atau likuidasi,

dan dalam semua keadaan ia hendaklah menolak faedah yang diperolehi daripada mana-mana bantuan kewangan khas yang diperuntukkan, secara langsung atau tak langsung, kepada institusi anggota oleh Perbadanan atau Bank Negara Malaysia.

(3) Walau apa pun subperenggan (2), jika suatu institusi anggota adalah taksolven, balasan sebanyak satu ringgit adalah disifatkan sebagai munasabah.

(4) Jika Jawatankuasa Pentaksir memutuskan bahawa—

- (i) harga diperniagakan adalah rendah daripada harga yang pada pendapatnya adalah balasan munasabah bagi aset atau perniagaan substansial (dalam subperenggan ini disebut sebagai "harga munasabah"), ia hendaklah menasihatkan Perbadanan supaya membayar kepada institusi anggota itu perbezaan di antara harga diperniagakan dengan harga munasabah itu dan Perbadanan hendaklah dalam apa-apa tempoh yang ditentukan oleh Jawatankuasa Pentaksir membayar harga perbezaan itu kepada institusi anggota itu; atau
- (ii) harga diperniagakan adalah harga munasabah, ia hendaklah menasihatkan Perbadanan sewajarnya.

(5) Suatu perakuan yang ditandatangani oleh anggota Jawatankuasa Pentaksir yang mengesahkan mana-mana keputusan Jawatankuasa Pentaksir hendaklah menjadi keterangan muktamad bagi keputusan itu.

Pemegang syer menentang hendaklah diberitahu keputusan Jawatankuasa Pentaksir

5. Perbadanan hendaklah dengan seberapa segera yang boleh dibuat memberitahu pemegang syer menentang mengenai keputusan Jawatankuasa Pentaksir di bawah subperenggan 4(5).

Honorarium dan elaun

6. Pentaksir yang dilantik di bawah perenggan 3 hendaklah dibayar dengan apa-apa honorarium dan elaun perjalanan dan sara hidup sebagaimana yang diputuskan oleh Lembaga.

JADUAL KEDUA

[Seksyen 26]

PELETAKHAKAN STATUTORI

Perakuan peletakhakan

1.(1) Dalam Jadual ini, melainkan jika konteksnya menghendaki makna yang lain—

"kepentingan berdaftar" ertinya apa-apa hak atau kepentingan dalam—

- (a) suatu gadaian yang subseksyen 108(3) Akta Syarikat 1965 terpakai dan yang didaftarkan sewajarnya menurut subseksyen itu; dan
- (b) tanah yang telah didaftarkan sewajarnya di bawah Akta Hakmilik Strata 1985 [*Akta 318*], Kanun Tanah Negara, Ordinan Tanah Sabah atau Kanun Tanah Sarawak;

"kepentingan dalam tanah" ertinya—

- (a) apa-apa kepentingan dalam tanah, sama ada berdaftar atau boleh didaftar, termasuklah kepentingan yang baginya Akta Hakmilik Strata 1985 terpakai dan yang boleh dipindahmilikkan di bawah Bahagian Empat Belas Kanun Tanah Negara atau Bahagian V Ordinan Tanah Sabah atau Bahagian VII Kanun Tanah Sarawak;
- (b) apa-apa kaveat pemegang lien atau kaveat lain; dan
- (c) apa-apa hak dan kelayakan lain yang berhubungan dengan tanah;

"kewajipan yang didedahkan" ertinya sesuatu kewajipan atau liabiliti yang terhutang kepada penanggung kewajipan oleh penjual di bawah atau berkenaan dengan aset dan kewajipan atau liabiliti itu didedahkan oleh penjual kepada pembeli secara bertulis sebelum tarikh peletakhakan;

"pembeli" digunakan dalam rujukan kepada—

- (a) suatu pemerolehan di bawah subperenggan 25(2)(a)(i) atau menurut perenggan 4 Jadual Keempat ertinya Perbadanan atau subsidiarinya yang subsidiari itu telah ditetapkan di bawah subseksyen 10(2); dan
- (b) suatu pelupusan di bawah perenggan 25(2)(b) atau 28(1)(b) ertinya seseorang yang kepadanya aset itu dilupuskan di bawah perenggan itu;

"penanggung kewajipan" ertinya mana-mana orang yang berhutang suatu tugas atau kewajipan dalam apa-apa bentuk, sama ada pada masa sekarang atau di masa hadapan, atau sama ada terletak atau kontingen, kepada penjual di bawah atau berkenaan dengan sesuatu aset, termasuklah tanpa batas, seseorang penanggung kewajipan di bawah suatu kemudahan pembiayaan Islam, kemudahan kredit konvensional, cagaran atau hak dalam tindakan yang lain;

"penjual" digunakan dalam rujukan kepada—

- (a) perenggan 25(2)(a) ertinya suatu institusi anggota yang disebut dalam perenggan itu; dan
- (b) perenggan 25(2)(b) atau 28(1)(b) ertinya Perbadanan;

"perakuan peletakhakan" ertinya suatu perakuan yang dikeluarkan di bawah subperenggan 1 (3) dan termasuklah suatu perakuan peletakhakan gantian yang dikeluarkan di bawah perenggan 3;

"tarikh peletakhakan" ertinya tarikh yang dinyatakan dalam suatu perakuan peletakhakan sebagai tarikh yang mana suatu aset terletak atas pembeli;

"tuntutan yang didedahkan" ertinya apa-apa tuntutan khusus yang didedahkan kepada pembeli oleh penjual secara bertulis sebelum tarikh peletakhakan;

(2) Suatu perakuan peletakhakan boleh dalam apa-apa bentuk sebagaimana yang diputuskan oleh Perbadanan dari semasa ke semasa.

(3) Jika Perbadanan bercadang memperolehi atau melupuskan suatu aset menurut peruntukan peletakhakan statutori yang dinyatakan dalam Jadual ini, Perbadanan hendaklah mengeluarkan suatu perakuan peletakhakan menurut Jadual ini.

(4) Suatu perakuan peletakhakan hendaklah dikeluarkan di bawah meterai biasa atau meterai faksimili Perbadanan.

(5) Suatu perakuan peletakhakan boleh dikeluarkan oleh Perbadanan sebelum, semasa atau selepas tarikh peletakhakan.

(6) Jika Perbadanan memperolehi atau melupuskan suatu aset dengan mengeluarkan suatu perakuan peletakhakan—

- (a) dalam hal sekiranya aset itu dipegang berseorangan oleh penjual, aset itu hendaklah pada dan dari tarikh peletakhakan itu terletak kepada pembeli; dan
- (b) dalam hal sekiranya aset itu dipegang bersesama oleh penjual dan seorang yang lain, aset itu hendaklah pada dan dari tarikh peletakhakan itu terletak kepada pembeli bersesama dengan seorang yang lain itu.

(7) Suatu perakuan peletakhakan yang menyatakan bahawa suatu aset telah diletakhakan ke atas pembeli hendaklah menjadi keterangan muktamad mengenai peletakhakan itu pada tarikh peletakhakan.

(8) Tiada peruntukan dalam mana-mana undang-undang termasuklah subseksyen 4(3) Akta Undang-Undang Sivil 1956 [*Akta 67*], kaedah undang-undang atau perjanjian yang membataskan atau melarang hak penjual atau menghendaki apa-apa persetujuan untuk menyerahkan, menjual, melupus atau memindah aset itu hendaklah terpakai atau mempunyai apa-apa kuat kuasa berkenaan dengan apa-apa pemerolehan oleh pembeli atau pelupusan oleh penjual, kecuali bahawa sesuatu pelupusan aset oleh penjual itu hendaklah tertakluk kepada kelulusan badan kawal selia yang berkaitan atau Pihak Berkuasa Negeri yang berkaitan yang mempunyai bidang kuasa atas pelupusan itu.

(9) Jika aset yang diperolehi oleh pembeli menurut Jadual ini adalah suatu kemudahan pembiayaan Islam atau kemudahan kredit konvensional, pembeli adalah disifatkan telah memberi pembiayaan, pendahuluan, pinjaman atau kemudahan lain atau memberi jaminan, mengikut mana-mana yang berkenaan, walau apa jua pun pembiayaan, pendahuluan, pinjaman atau kemudahan lain atau jaminan yang telah digunakan atau dikeluarkan oleh penjual.

(10) Jika cagaran bagi suatu kemudahan pembiayaan Islam atau kemudahan kredit konvensional yang diletakhakan di bawah Jadual ini pada pembeli termasuklah suatu syer—

- (a) bagi maksud perenggan 6A(9)(b) Akta Syarikat 1965, pembeli itu hendaklah disifatkan memegang suatu kepentingan dalam syer hanya melalui cagaran bagi maksud suatu transaksi yang dalam perjalanan perniagaan biasa berhubung dengan peminjaman wang; dan

- (b) kepentingan pembeli dalam syer hendaklah diabaikan bagi maksud seksyen 6A Akta Syarikat 1965.

(11) Pembeli hendaklah, pada dan dari tarikh peletakhakan sesuatu aset, memperoleh segala hak, hakmilik dan kepentingan penjual, pada masa sekarang dan di masa hadapan, dan kewajipan yang didedahkan oleh penjual pada masa sekarang dan di masa hadapan berkaitan dengan, aset itu, bebas daripada apa-apa bebanan atau tuntutan kecuali apa-apa kepentingan berdaftar yang terpakai pada tarikh peletakhakan dan tuntutan yang didedahkan.

(12) Tanpa menjejaskan subperenggan (6), (7), (8), (9), (10) dan (11), berhubungan dengan sesuatu aset yang terletak pada pembeli—

- (a) tiap-tiap penanggung kewajipan berkenaan dengan aset itu hendaklah disifatkan telah membebaskan dan melepaskan penjual daripada kewajipan yang didedahkan berkenaan dengan aset itu;
- (b) tiap-tiap penanggung kewajipan dan tiap-tiap orang lain yang mempunyai apa-apa hak, hakmilik atau kepentingan dalam aset itu hendaklah disifatkan telah bersetuju dengan dan menerima pengambilalihan oleh pembeli bagi semua kewajipan yang didedahkan berkenaan dengan aset itu;
- (c) sesuatu surat cara sedia ada, sama ada dalam bentuk suatu surat ikatan, wasiat atau selainnya, atau perintah mana-mana mahkamah, di bawah atau menurut kuasanya, penjual mempunyai hakmilik atau pemunyaan atau hak ke atas aset itu, hendaklah ditafsirkan dan mempunyai kuat kuasa seolah-olah apa-apa sebutan di dalamnya mengenai penjual telah digantikan dengan sebutan mengenai pembeli;
- (d) sesuatu surat cara sedia ada berhubungan dengan apa-apa aset yang penjual adalah suatu pihak kepadanya hendaklah mempunyai kuat kuasa setakat yang ia terpakai kepada kewajipan yang didedahkan, tuntutan yang didedahkan dan kepentingan berdaftar seolah-olah pembeli adalah menjadi suatu pihak kepada surat cara itu dan bukannya penjual;
- (e) sesuatu mandat, surat kuasa wakil, kuasa, akujanji atau persetujuan sedia ada yang berhubungan dengan apa-apa aset yang telah diberikan kepada penjual, sama ada bersendirian atau secara berse sama dengan orang lain, hendaklah disifatkan mempunyai kuat kuasa, seolah-olah diberikan kepada pembeli sama ada bersendirian atau dengan orang lain itu, mengikut mana-mana yang berkenaan;
- (f) jika apa-apa aset ialah cagaran yang dipegang sebaik sebelum tarikh peletakhakan oleh penjual, atau oleh seorang penama atau oleh pemegang amanah bagi penjual, sebagai cagaran untuk pembayaran atau pelepasan apa-apa liabiliti, termasuklah apa-apa liabiliti yang berbangkit daripada pendahuluan masa depan, oleh mana-mana orang, cagaran itu hendaklah dipegang oleh pembeli, penama itu atau pemegang amanah itu sebagai penama, atau pemegang amanah bagi, pembeli, mengikut mana-mana yang berkenaan, dengan keutamaan yang sama seperti penjual, dan setakat liabiliti itu, hendaklah tersedia kepada pembeli sebagai cagaran bagi pembayaran atau pelepasan liabiliti itu;

- (g) sebagai tambahan kepada apa-apa hak, kuasa atau remedi lain yang diberikan kepada pembeli dalam Jadual ini, pembeli hendaklah mempunyai hak, kuasa dan remedi (dan khususnya hak dan kuasa yang sama tentang pengambilan atau penentangan undang-undang atau prosiding lain atau pembuatan atau penentangan permohonan kepada mana-mana pihak berkuasa) untuk menentukan, melindungi atau menguatkuasakan hak, hakmilik, kepentingan atau kewajipan yang didedahkan terletak kepada pembeli termasuklah hak, hakmilik, kepentingan atau kewajipan itu berhubungan dengan mana-mana undang-undang atau prosiding lain atau permohonan kepada mana-mana pihak berkuasa yang belum selesai sebaik sebelum tarikh peletakhakan oleh atau terhadap penjual, dan penentangan mana-mana tuntutan yang didedahkan atau kepentingan berdaftar seolah-olah mereka pada setiap masa mempunyai hak, hakmilik, kepentingan atau kewajipan pembeli;
- (h) sesuatu penghakiman atau award yang didapati oleh penjual berhubungan dengan aset itu dan tidak diselesaikan sepenuhnya sebelum tarikh peletakhakan hendaklah dikuatkuasakan oleh pembeli;
- (i) tiada pemerolehan oleh pembeli, atau pelupusan oleh penjual, akan aset itu menjadi tak sah atau boleh jadi tak sah disebabkan oleh pemakaian mana-mana undang-undang; atau
- (j) jika apa-apa—
 - (i) bentuk pulangan atas kemudahan pembiayaan Islam; atau
 - (ii) faedah,

yang kena dibayar di bawah mana-mana perjanjian berkenaan dengan aset itu tidak lagi boleh diputuskan sebagaimana diperuntukkan dalam perjanjian itu, pulangan atau faedah kena dibayar itu hendaklah sebagaimana ditetapkan di bawah seksyen 100 atau dalam apa-apa hal tertentu, sebagaimana pembeli bersetuju dengan penanggung kewajipan.

(13) Tanpa menjejaskan subperenggan (6), (7), (8), (9), (10), (11) dan (12), sesuatu peletakhakan apa-apa aset kepada pembeli tidak boleh—

- (a) dianggap sebagai meletakkan—
 - (i) pembeli itu;
 - (ii) penjual itu;
 - (iii) mana-mana orang yang mendapat hakmilik daripada pembeli; atau
 - (iv) mana-mana orang lain;yang mungkir atau ingkar di bawah, apa-apa kontrak atau pecah kepercayaan;
- (b) dianggap sebagai menimbulkan suatu hak atau tugas bagi mana-mana orang untuk—
 - (i) menamatkan, membatalkan atau mengubahsuaikan sesuatu perjanjian;

- (ii) menguatkuasakan atau mempercepatkan pelaksanaan sesuatu kewajipan; atau
- (iii) menghendaki pelaksanaan sesuatu kewajipan yang tidak secara lain berbangkit untuk pelaksanaan;
- (c) dianggap sebagai meletakkan penjual, pembeli atau mana-mana orang lain dalam melanggar mana-mana undang-undang, kaedah undang-undang atau perjanjian yang melarang, menyekat atau mengawal selia penyerahhakan, jualan, pelupusan atau pindahmilik apa-apa aset atau pendedahan maklumat;
- (d) melepaskan seorang penjamin daripada sesuatu kewajipan;
- (e) mentaksahkan atau melepaskan sesuatu kontrak atau cagarang; atau
- (f) dianggap sebagai menamatkan, membatalkan atau mengubah apa-apa hak, keistimewaan, pengecualian (termasuklah apa-apa pengecualian cukai) atau keutamaan yang penjual berhak kepadanya dan yang menurut kuasa perenggan ini telah meletakhak kepada pembeli.

(14) Tanpa menjejaskan keluasan subperenggan (6), (7), (8), (9), (10), (11), (12) dan (13) tetapi tertakluk kepada perenggan 2, dalam mana-mana prosiding yang dibawa oleh atau terhadap pembeli berkenaan dengan apa-apa aset yang terletak pada pembeli menurut Jadual ini, seseorang tidak boleh, melainkan jika tuntutan itu adalah suatu tuntutan yang didedahkan, menimbulkan apa-apa tuntutan atau pembelaan kepada prosiding itu mana-mana perkara yang berikut:

- (a) orang itu ada atau mungkin ada suatu tolakan atau tuntutan balas terhadap penjual atau mana-mana orang lain;
- (b) mana-mana orang yang mempunyai kepentingan terdahulu, sama ada di sisi undang-undang atau ekuiti, dalam aset itu;
- (c) mana-mana orang yang menjadi pihak kepada atau mengambil bahagian dengan apa-apa fraud, desakan, paksaan, pengaruh tak wajar atau salahnya;
- (d) terdapat kesilapan undang-undang atau fakta;
- (e) mana-mana perjanjian yang berkaitan dengan aset itu adalah bagi melaksanakan maksud yang menyalahi undang-undang atau apa-apa balasan yang diberikan atau diterima di bawahnya adalah menyalahi undang-undang, atau objektif perjanjian itu yang membentuk atau menjadi sebahagian daripada aset itu adalah menyalahi undang-undang;
- (f) terdapat kegagalan balasan secara menyeluruh atau tiada balasan atau terdapat apa-apa balasan yang gagal sebahagiannya;
- (g) orang yang menyempurnakan, disifatkan telah menyempurnakan atau menjadi pihak kepada, mana-mana dokumen hakmilik bagi aset itu atau kontrak bertulis yang menjadi keterangan, membangkitkan atau menjamin aset itu, tidak memahami dokumen itu;

- (h) orang yang menyempurnakan, disifatkan telah menyempurnakan atau menjadi pihak kepada, dokumen hakmilik bagi aset itu atau kontrak bertulis yang menjadi keterangan, membangkitkan atau menjamin aset itu, tidak mempunyai keupayaan atau kuasa untuk melakukannya; dan
- (i) terdapat suatu kekhilafan dalam mana-mana penyata akaun yang dikeluarkan oleh penjual atau seseorang lain berkenaan dengan apa-apa hutang berhubungan dengan aset itu.

Pengekalan hak

2.(1) Seseorang yang dihalang daripada membuat suatu tuntutan terhadap mana-mana pembeli atau dihalang daripada membangkitkan suatu pembelaan terhadap pembeli di bawah Jadual ini, hendaklah berhak meminta pampasan terhadap penjual berkaitan dengan tuntutan itu.

(2) Jika Mahkamah berpuas hati bahawa orang yang disebut dalam subperenggan (1) mempunyai tuntutan terhadap penjual termasuklah mana-mana kepentingan ekuiti terdahulu dalam aset itu yang mungkin dapat dibangkitkan atau dituntut oleh orang itu tetapi dihalang oleh subperenggan 1(14) orang itu hendaklah berhak mendapat pampasan daripada penjual berkenaan dengan tuntutan itu yang pada pertimbangan Mahkamah adalah adil dan munasabah.

Perakuan peletakhakan gantian

3.(1) Perbadanan boleh mengeluarkan suatu perakuan peletakhakan baru untuk menggantikan mana-mana perakuan peletakhakan yang telah dikeluarkannya sebelum ini bagi maksud untuk merektifikasi apa-apa tinggalan atau khilaf dalam perakuan peletakhakan itu.

(2) Apa-apa perakuan peletakhakan gantian yang dikeluarkan di bawah subperenggan (1) disempurnakan di bawah meterai biasa atau meterai faksimili Perbadanan menyatakan bahawa suatu aset telah diletakhak pada pembeli hendaklah menjadi keterangan muktamad akan peletakhakan itu pada masa tarikh peletakhakan dinyatakan dalam perakuan peletakhakan gantian itu.

(3) Jika mana-mana undang-undang menyatakan suatu tempoh waktu yang mana suatu pindahmilik apa-apa aset yang dinyatakan sebagai subjek suatu perakuan peletakhakan gantian yang dikeluarkan di bawah subperenggan (1) hendaklah didaftarkan atau difailkan, tempoh itu hendaklah bermula dari tarikh perakuan peletakhakan gantian itu dikeluarkan.

(4) Apa-apa tindakan dilakukan oleh pembeli, penjual, konservator atau mana-mana orang lain, dalam pergantungan kepada suatu perakuan peletakhakan yang sebelumnya dikeluarkan hendaklah tidak terjejas oleh mana-mana tinggalan atau khilaf yang direktifikasikan dalam suatu perakuan peletakhakan gantian yang dikeluarkan di bawah subperenggan (1).

(5) Bagi maksud Akta ini, apa-apa rujukan kepada suatu perakuan peletakhakan hendaklah disifatkan termasuk suatu rujukan kepada suatu perakuan peletakhakan gantian yang dikeluarkan di bawah subperenggan (1).

Peruntukan tambahan mengenai tanah

4. (1) Walau apa jua pun peruntukan Kanun Tanah Negara, Ordinan Tanah Sabah, Kanun Tanah Sarawak atau mana-mana undang-undang lain, apa-apa kaveat atau perintah larangan yang telah dimasukkan, didaftarkan atau diserahkan simpan, sebelum, pada atau selepas, atau diserahkan untuk kemasukan, pendaftaran atau serahan simpan pada atau selepas, tarikh peletakhakan itu tidaklah boleh menghalang suatu pindahmilik apa-apa kepentingan dalam tanah penjual kepada pembeli.

(2) Jika suatu perakuan peletakhakan meletakhak pada pembeli apa-apa kepentingan dalam tanah—

(a) di Semenanjung Malaysia, apabila diterima—

(i) bayaran fi yang ditetapkan; dan

(ii) perakuan peletakhakan,

Pendaftar di bawah Kanun Tanah Negara hendaklah, tanpa keperluan bagi apa-apa permohonan lanjut atau pemfailan apa-apa dokumen lanjut, membuat suatu memorial pada dokumen hakmilik daftaran dan membuat apa-apa catatan lain dan pada amnya melaksanakan segala hal yang diperlukan untuk menguatkuasakan peletakhakan itu;

(b) di Sabah, apabila diterima—

(i) bayaran fi yang ditetapkan; dan

(ii) perakuan peletakhakan,

Pendaftar di bawah Ordinan Tanah Sabah hendaklah, tanpa keperluan bagi apa-apa permohonan lanjut atau pemfailan apa-apa dokumen lanjut, membuat suatu memorial pada dokumen hakmilik daftaran dan membuat apa-apa catatan lain dan pada amnya melaksanakan segala hal yang diperlukan untuk menguatkuasakan peletakhakan itu; atau

(c) di Sarawak, apabila diterima—

(i) bayaran fi yang ditetapkan; dan

(ii) perakuan peletakhakan,

Pendaftar di bawah Kanun Tanah Sarawak hendaklah, tanpa keperluan bagi apa-apa permohonan lanjut atau pemfailan apa-apa dokumen lanjut, membuat suatu memorial pada dokumen hakmilik daftaran dan membuat apa-apa catatan lain dan pada amnya melaksanakan segala hal yang diperlukan untuk menguatkuasakan peletakhakan itu.

(3) Bagi maksud Kanun Tanah Negara, Ordinan Tanah Sabah, Kanun Tanah Sarawak atau mana-mana undang-undang lain, suatu perakuan peletakhakan hendaklah menjadi keterangan muktamad tentang suatu peletakhakan akan sesuatu kepentingan dalam tanah pada pembeli.

Pendaftar lain hendaklah memberi kuat kuasa kepada perakuan peletakhakan

5.(1) Walau apa jua pun peruntukan mana-mana undang-undang lain, Pendaftar Syarikat, pendaftar kapal Malaysia, depository pusat, ejen depository yang diberi kuasa dan mana-mana orang yang menyenggarakan suatu daftar atau rekod pemilikan, kepentingan atau cagaran, mengikut mana-mana yang berkenaan, (dalam perenggan ini disebut sebagai "Pendaftar") hendaklah, apabila diterima—

- (a) bayaran fi yang ditetapkan; dan
- (b) perakuan peletakhakan,

tanpa keperluan bagi apa-apa permohonan lanjut atau pemfailan apa-apa dokumen lanjut, melaksanakan segala hal dan membuat segala catatan atau memorial pada mana-mana daftar atau rekod yang disimpan oleh Pendaftar sebagaimana yang perlu untuk memberi kuat kuasa kepada peletakhakan aset yang berkaitan dengan perakuan peletakhakan itu.

(2) Bagi maksud perenggan ini, subseksyen 112A(1) Akta Syarikat 1965 hendaklah disifatkan terpakai bagi pembeli seolah-olah perkataan "tiga puluh" dalam subseksyen itu telah digantikan dengan perkataan "seratus lapan puluh".

Imuniti Pendaftar

6. Seseorang Pendaftar di bawah perenggan 4 atau 5 tidaklah bertanggungjawab kepada mana-mana orang berkenaan dengan pembuatan apa-apa memorial lain pada dokumen hakmilik daftaran atau apa-apa catatan atau memorial dalam daftar atau rekod yang bergantung pada perakuan peletakhakan itu.

Gantian automatik dalam mana-mana prosiding undang-undang atau lain

7. Walau apa jua pun peruntukan mana-mana undang-undang lain, setiap pendaftar mahkamah hendaklah secara automatik apabila menerima sesalinan perakuan peletakhakan melaksanakan semua hal dan membuat semua catatan dalam mana-mana daftar atau rekod yang disimpan oleh pendaftar itu sebagaimana yang perlu untuk memberi kesan kepada penggantian pembeli di tempat penjual sebagai pihak dalam mana-mana prosiding undang-undang atau yang lain.

JADUAL KETIGA

[Seksyen 27]

Kuasa dan Tugas Konservator

Tafsiran

1.(1) Dalam Jadual ini, melainkan jika konteksnya menghendaki makna yang lain—

"Bursa Malaysia" ertinya Bursa Malaysia Berhad, suatu syarikat awam berhad yang ditubuhkan di bawah Akta Syarikat 1965 dan diluluskan sebagai suatu bursa saham di bawah Akta Perindustrian Sekuriti 1983;

"pemiutang bercagar" ertinya seorang yang memegang sebagai cagaran bagi suatu liabiliti orang terjejas—

- (a) suatu gadaian yang didaftarkan sewajarnya di bawah Kanun Tanah Negara, Ordinan Tanah Sabah atau Kanun Tanah Sarawak ke atas tanah yang dimiliki oleh orang terjejas;
- (b) suatu gadaian tetap atau terapung atas akujanji atau aset orang terjejas dan yang, jika diperlukan oleh subseksyen 108(3) Akta Syarikat 1965, adalah telah didaftarkan dengan sewajarnya menurut subseksyen 108(1) Akta Syarikat 1965;
- (c) suatu penyerahhakan oleh orang terjejas atas haknya di bawah suatu perjanjian untuk membeli tanah atau suatu petak bagi suatu bangunan yang dokumen hak milik keluaran kepada tanah atau hak milik strata kepada petak bagi bangunan itu belum lagi dikeluarkan pada masa penyerahhakan;
- (d) dokumen hak milik keluaran kepada mana-mana tanah atau pajakan pendua yang dimiliki oleh orang terjejas dan berkenaan dengan suatu pemegang kaveat lien yang telah dimasukkan sewajarnya menurut peruntukan Kanun Tanah Negara;
- (e) suatu gadaian, gadai janji, sandaran atau lien ke atas sekuriti boleh dipasarkan (sebagaimana ditakrifkan dalam Akta Syarikat 1965) yang dimiliki oleh orang terjejas dan yang, sekiranya diperlukan sewajarnya oleh subseksyen 108(3) Akta Syarikat 1965, telah didaftarkan sewajarnya menurut subseksyen 108(1) Akta Syarikat 1965; atau
- (f) suatu gadaian, gadai janji, sandaran atau lien ke atas wang yang diletakkan atas deposit tetap oleh orang terjejas telah didaftarkan sewajarnya di bawah subseksyen 108(1) Akta Syarikat 1965.

(2) Menteri boleh, atas syor Perbadanan, meminda takrif "pemiutang bercagar" dalam subperenggan (1) melalui notis yang disiarkan dalam *Warta*.

Tempoh pentadbiran

2.(1) Pentadbiran orang terjejas oleh konservator hendaklah bermula dari tarikh perlantikan konservator dan hendaklah berterusan sehingga ditamatkan oleh Perbadanan.

(2) Lembaga boleh melantik suatu jawatankuasanya sendiri yang dipengerusikan oleh salah seorang daripada pengarahnya dan mengandungi seorang atau lebih dua orang pengarah dan orang lain yang mempunyai kepakaran berkaitan atau dengan pengalaman berkaitan untuk mengawasi, memantau dan menilai prestasi mana-mana atau kesemua konservator yang dilantik oleh Perbadanan.

(3) Jawatankuasa yang dilantik di bawah subseksyen (2) hendaklah, dari semasa ke semasa, membuat apa-apa cadangan atau syor termasuklah suatu cadangan bagi penamatan konservator bagi pertimbangan Perbadanan.

(4) Seorang konservator hendaklah dilepaskan daripada pelantikannya apabila penamatan pelantikannya oleh Perbadanan.

(5) Jika perlantikan seorang konservator telah dilepaskan di bawah perenggan ini atau subperenggan 26(2), dia hendaklah, berkuat kuasa daripada pelepasan itu, dilepaskan daripada segala tugas dan liabiliti berkenaan dengan pentadbirannya atau selainnya berhubungan dengan kelakuannya sebagai seorang konservator.

(6) Tiada apa-apa dalam perenggan ini boleh menghalang suatu tindakan atau prosiding lain oleh mana-mana orang bagi kerugian atau kerosakan disebabkan oleh perbuatan salah laku yang sengaja atau kecuaiian melampau oleh konservator.

Pemberitahuan perlantikan konservator

3. (1) Jika seorang konservator telah dilantik, konservator itu hendaklah—
- (a) dalam masa dua hari selepas pelantikan sedemikian memberi notis bertulis kepada orang terjejas;
 - (b) dalam masa tujuh hari selepas pelantikan sedemikian menyerah simpan suatu notis mengenai pelantikan konservator dengan—
 - (i) Suruhanjaya Syarikat Malaysia; dan (ii) dalam hal suatu syarikat awam tersenarai, Bursa Malaysia,
- dalam borang yang ditetapkan di bawah Akta ini; dan
- (c) dalam masa tujuh hari selepas perlantikan itu menyebabkan suatu notis mengenai perlantikan konservator disiarkan dalam sekurang-kurangnya dua akhbar harian di Malaysia, satu daripadanya hendaklah dalam bahasa kebangsaan.

(2) Setiap invois, pesanan barangan atau perkhidmatan, surat perniagaan, cek, nota kredit atau surat cara boleh niaga atau dokumen lain yang, selepas perlantikan seorang konservator berhubungan dengan orang terjejas, telah dikeluarkan oleh atau bagi pihak orang terjejas atau konservator, adalah suatu dokumen di atas atau di dalamnya yang tertera nama orang terjejas, hendaklah mengandungi perkataan "Konservator Dilantik" atau perkataan seumpama.

(3) Apa-apa pelanggaran perenggan ini tidaklah memberi kesan kepada keesahan tindakan konservator dalam pentadbiran orang terjejas.

Kesan perlantikan konservator

4. Perlantikan seorang konservator di bawah seksyen 27 tidak boleh—
- (a) diambil kira sebagai meletakkan konservator, orang terjejas atau mana-mana orang lain yang melanggar atau ingkar di bawah mana-mana kontrak atau dalam pecah kepercayaan;
 - (b) diambil kira sebagai membangkitkan suatu hak kepada mana-mana orang untuk—
 - (i) menamatkan, membatalkan atau mengubahsuai suatu perjanjian;
 - (ii) menguatkuasakan atau mempercepatkan pelaksanaan suatu kewajipan; atau

- (iii) menghendaki pelaksanaan suatu kewajipan yang jika tidak berbangkit untuk pelaksanaan;
- (c) diambil kira sebagai meletakkan konservator, orang terjejas atau mana-mana orang lain yang melanggar mana-mana undang-undang atau perjanjian yang melarang, menyekat atau mengawal selia penyerahhakan, jualan, pelupusan atau pindahmilik apa-apa aset atau pendedahan maklumat;
- (d) melepaskan seorang penjamin daripada suatu kewajipan;
- (e) mentaksahkan atau melepaskan suatu kontrak atau cagaran;
- (f) dianggap sebagai menamatkan, membatalkan atau mengubah apa-apa hak, keistimewaan, pengecualian (termasuklah apa-apa pengecualian cukai) atau keutamaan yang berhubungan dengan suatu aset; atau
- (g) dianggap sebagai meletakkan Perbadanan atau konservator dalam pelanggaran mana-mana undang-undang atau apa-apa perintah mahkamah.

Kuasa am konservator

5. Seorang konservator hendaklah mempunyai kuasa yang berikut:
 - (a) kuasa untuk menukar tempat pejabat berdaftar orang terjejas;
 - (b) kuasa untuk mengguna meterai biasa orang terjejas;
 - (c) kuasa untuk melakukan semua tindakan dan menyempurnakan atas nama dan bagi pihak orang terjejas apa-apa surat ikatan, resit atau dokumen lain;
 - (d) kuasa untuk melantik mana-mana ejen untuk membuat apa-apa urusan yang tidak dapat dibuat sendiri oleh konservator atau yang boleh dibuat dengan lebih mudah oleh seseorang ejen dan kuasa untuk mengambil dan memecat pegawai dan pekerja yang berkaitan dengan orang terjejas;
 - (e) kuasa untuk menubuhkan subsidiari orang terjejas;
 - (f) kuasa untuk memindah kepada subsidiari orang terjejas semua atau mana-mana bahagian aset orang terjejas;
 - (g) kuasa untuk mengambil dan mengekalkan insurans berkenaan dengan aset orang terjejas;
 - (h) kuasa untuk mengambil milikan, mengumpul dan mendapatkan aset orang terjejas dan bagi maksud itu, untuk mengambil apa-apa prosiding sebagaimana dianggapnya suai manfaat kepada konservator;
 - (i) kuasa untuk menjual atau selainnya melupus aset orang terjejas secara lelongan awam atau kontrak persendirian;
 - (j) kuasa untuk memberi atau menerima suatu penyerahan balik suatu pajakan atau penyewaan aset orang terjejas, dan untuk mengambil suatu pajakan atau penyewaan apa-apa aset yang dikehendaki atau sesuai untuk aset orang terjejas;

- (k) kuasa untuk membuat semua perkara, termasuklah melaksanakan kerja, sebagaimana perlu bagi pengurusan dan penghasilan aset, urusan dan hal-ehwal orang terjejas;
- (l) kuasa untuk mendapatkan kumpulan wang, meminjam wang atau memberi cagaran ke atas aset orang terjejas;
- (m) kuasa untuk mengeluarkan, menerima, membuat dan mengendors apa-apa bil pertukaran atau nota janji hutang atas nama dan bagi pihak orang terjejas;
- (n) kuasa untuk membuat panggilan ke atas mana-mana modal orang terjejas yang belum dipanggil;
- (o) kuasa untuk membuat apa-apa bayaran yang diperlukan atau bersampingan dengan pelaksanaan fungsinya;
- (p) kuasa untuk menjalankan urusan orang terjejas;
- (q) kuasa untuk melaksanakan apa-apa fungsi dan menjalankan apa-apa kuasa, yang orang terjejas, mana-mana pengarah atau pegawainya boleh melaksanakan atau menjalankan sekiranya seorang konservator tidak dilantik;
- (r) kuasa untuk melantik mana-mana orang sebagai seorang pengarah orang terjejas, sama ada untuk mengisi suatu kekosongan atau sebagai mana-mana pengarah tambahan;
- (s) kuasa untuk melantik seorang peguamcara, akauntan atau orang berkelayakan profesional yang lain untuk membantunya dalam pelaksanaan fungsinya berkenaan dengan orang terjejas;
- (t) kuasa untuk memecat atau menggantung jawatan mana-mana pengarah orang terjejas atau melantik orang lain untuk bertindak sebagai pengarah orang terjejas walau pun apa-apa undang-undang atau dokumen konstituen orang terjejas;
- (u) kuasa untuk membawa atau membela apa-apa tindakan atau prosiding undang-undang yang lain atas nama dan bagi pihak orang terjejas;
- (v) kuasa untuk merujuk kepada timbang tara apa-apa persoalan yang melibatkan orang terjejas;
- (w) kuasa untuk membuat apa-apa perkiraan atau kompromi bagi pihak orang terjejas;
- (x) kuasa untuk memeringkat dan menuntut dalam kebangkrapan, ketaksolvenan atau penyelesaian mana-mana orang yang berhutang kepada orang terjejas dan untuk menerima dividen atau pulangan, dan untuk menyertai surat ikatan amanah untuk pemiutang mana orang terjejas;
- (y) kuasa untuk mengemuka atau membela suatu petisyen untuk penggulungan orang terjejas; atau
- (z) kuasa untuk membuat segala perkara lain yang bersampingan dengan pelaksanaan kuasa di atas.

Tugas am konservator

6. (1) Tanpa menjejaskan perenggan 11, 13 dan 14, konservator hendaklah, selepas pelantikannya, mengambil ke dalam jagaannya atau di bawah kawalannya semua aset yang kepadanya orang terjejas berhak atau ternyata berhak.

(2) Konservator hendaklah menguruskan aset, urusan dan hal-ehwal orang terjejas—

- (a) pada bila-bila masa sebelum kelulusan cadangan oleh pemiutang bercagar orang terjejas di bawah perenggan 22, menurut apa-apa arahan yang diberikan oleh Perbadanan; dan
- (b) pada bila-bila masa selepas kelulusan cadangan oleh pemiutang bercagar orang terjejas di bawah perenggan 22, menurut cadangan itu sebagaimana yang boleh diubahsuaikan dari semasa ke semasa menurut perenggan 24.

Konservator sebagai ejen orang terjejas

7. Konservator hendaklah, dalam pentadbiran orang terjejas, disifatkan bertindak sebagai ejen orang terjejas.

Pegawai orang terjejas hendaklah melaksanakan atau menjalankan fungsi dengan kelulusan bertulis

8.(1) Jika seorang konservator telah dilantik, tiada seorang pun, termasuklah lembaga pengarah orang terjejas, selain daripada konservator hendaklah melaksanakan atau menjalankan atau berupa sebagai melaksanakan atau menjalankan suatu fungsi sebagai seorang pegawai orang terjejas, kecuali dengan kelulusan bertulis terlebih dahulu konservator.

(2) Jika konservator meluluskan pelaksanaan atau penjalanan sesuatu fungsi seorang pegawai bagi orang terjejas menurut subperenggan (1), konservator itu hendaklah membayar kepada pegawai itu suatu fi atau apa-apa saraan lain sebagaimana diputuskan dengan munasabahnya oleh konservator.

(3) Kecuali sebagaimana yang diperuntukkan dalam perenggan (2) dan walau apa jua pun mana-mana undang-undang atau kontrak lain, tiada saraan apa-apa jua pun akan terakru atau boleh dibayar kepada mana-mana pegawai orang terjejas kecuali sebagaimana yang diluluskan secara bertulis oleh konservator itu berhubungan dengan mana-mana aktiviti yang dikehendakki atau diberi kuasa oleh konservator bagi tempoh pentadbiran orang terjejas.

(4) Bagi maksud subperenggan (1), konservator adalah berhak untuk menjalankan segala fungsi lembaga pengarah orang terjejas.

(5) Dalam perenggan ini, seseorang pekerja orang terjejas tidak boleh ditafsirkan sebagai seorang pegawai semata-mata kerana dia adalah seorang pekerja orang terjejas.

Urus niaga dengan aset orang terjejas

9. Jika seseorang terjejas berupa sebagai untuk membuat, atau mana-mana orang berupa sebagai membuat bagi pihak orang terjejas, sesuatu transaksi atau urus niaga dengan mana-mana aset orang terjejas, transaksi atau urus niaga itu hendaklah menjadi batal melainkan jika—

- (a) ia adalah suatu transaksi atau urus niaga yang dibuat oleh Perbadanan atau konservator; atau
- (b) kebenaran bertulis terlebih dahulu daripada konservator telah diperolehi untuk transaksi atau urus niaga itu.

Pampasan

10. (1) Jika Mahkamah mendapati seseorang bersalah bagi suatu kesalahan di bawah subperenggan 9(2) dan Mahkamah berpuas hati bahawa orang terjejas atau seorang lain telah menanggung kerugian atau kerosakan kerananya, Mahkamah boleh memerintahkan orang yang melakukan kesalahan itu membayar pampasan kepada orang yang telah menanggung kerugian atau kerosakan itu.

(2) Walau apa jua pun subperenggan (1) konservator boleh memulakan prosiding guaman terhadap mana-mana orang untuk mendapatkan kembali aset orang terjejas atau pampasan sebagai gantinya.

Kewajipan pegawai orang terjejas

11. (1) Seseorang pegawai atau pekerja orang terjejas hendaklah dalam tempoh tujuh hari selepas pelantikan konservator—

- (a) menyerahkan kepada konservator kesemua buku, rekod, akaun atau dokumen lain orang terjejas dalam milikan pegawai atau pekerja itu; dan
- (b) jika pegawai atau pekerja itu mengetahui tempat letaknya buku, rekod, akaun atau dokumen lain berhubungan dengan orang terjejas, memaklumkan konservator tempat letaknya buku, rekod, akaun atau dokumen itu.

(2) Seseorang pegawai atau pekerja orang terjejas hendaklah—

- (a) memberi konservator apa-apa maklumat berkenaan dengan aset, urusan, hal-ehwal dan hal keadaan kewangan orang terjejas; dan
- (b) membantu konservator pada bila-bila masa,

sebagaimana yang dikehendaki secara munasabah oleh konservator.

Penyiasatan urusan dan hal-ehwal

12. (1) Konservator boleh menghendaki mana-mana orang yang disebutkan dalam subperenggan (2), dalam tempoh dua puluh satu hari dari tarikh itu atau

apa-apa masa lanjutan sebagaimana yang dibenarkan oleh konservator, menentusahkan dan mengemukakan kepada konservator suatu pernyataan mengenai urusan dan hal-ehwal orang terjejas dalam suatu bentuk yang ditentukan oleh konservator yang mengandungi—

- (a) butiran aset dan liabiliti orang terjejas;
- (b) nama dan alamat pemiutang orang terjejas;
- (c) cagaran yang dipegang oleh pemiutang orang terjejas yang disebut dalam subsubperenggan (1)(b);
- (d) tarikh cagaran yang disebut dalam subsubperenggan (1)(c) telah diberikan;
- (e) suatu akuan berkanun yang dibuat mengikut peruntukan Akta Akuan Berkanun 1960 [*Akta 13*], mengisytiharkan maklumat dalam pernyataan hal-ehwal itu sebagai benar dan betul; dan
- (f) apa-apa maklumat lanjut atau maklumat lain sebagaimana dikehendaki oleh konservator.

(2) Konservator boleh menghendaki orang yang berikut supaya menentusahkan dan mengemukakan pernyataan urusan dan hal-ehwal yang disebut dalam subperenggan (1)—

- (a) orang yang menjadi atau pernah menjadi pegawai orang terjejas;
- (b) orang yang pernah mengambil bahagian dalam pembentukan orang terjejas pada bila-bila masa dalam tempoh dua tahun sebelum pelantikan konservator itu; atau
- (c) orang yang dalam penggajian orang terjejas atau pernah berada dalam penggajian orang terjejas dalam tempoh dua tahun sebelum pelantikan konservator yang, pada pendapat konservator, mempunyai maklumat yang dikehendaki.

(3) Konservator boleh pada bila-bila masa melepaskan seseorang daripada apa-apa kewajipan yang dikenakan ke atasnya di bawah subperenggan (1) atau (2).

(4) Konservator hendaklah, apabila fungsi dan tugasnya di bawah Akta ini tamat, memulangkan kepada orang terjejas apa-apa buku, pernyataan, rekod, akaun atau dokumen lain atau apa-apa jua yang disebut di bawah subperenggan 11(1), perenggan ini dan perenggan 13.

(5) Dalam perenggan ini, "penggajian" termasuklah penggajian di bawah suatu kontrak untuk perkhidmatan.

Hak konservator ke atas buku, rekod, akaun atau dokumen lain orang terjejas

13. (1) Tertakluk kepada subperenggan (3), tiada seorang pun berhak berbanding dengan konservator—

- (a) untuk menyimpan dalam milikan buku, rekod, akaun atau dokumen lain orang terjejas; atau

(b) untuk menuntut atau menguatkuasakan suatu lien ke atas buku, rekod, akaun atau dokumen lain orang terjejas.

(2) Konservator boleh memberikan notis kepada seseorang berhubungan dengan buku, rekod, akaun atau dokumen lain orang terjejas dan orang itu hendaklah menyerahkan kepada konservator buku, rekod, akaun atau dokumen lain yang disebutkan dalam notis itu yang ada dalam milikannya.

(3) Subperenggan (1) dan (2) tidaklah terpakai berhubungan dengan mana-mana buku, rekod, akaun atau dokumen lain—

(a) yang berhak dimiliki oleh seorang pemiutang bercagar orang terjejas melainkan jika disebabkan oleh suatu lien; atau

(b) orang terjejas yang ditahan oleh mana-mana badan kawal selia,

tetapi konservator itu adalah berhak untuk memeriksa dan membuat salinan buku, rekod, akaun atau dokumen lain itu.

Hak konservator ke atas aset orang terjejas

14. (1) Konservator boleh menghendaki mana-mana orang yang mempunyai dalam milikan atau kawalannya aset, buku, rekod, akaun atau dokumen lain yang orang terjejas ternyata berhak kepadanya untuk menyerahkan, memberikan, menyerah balik atau memindahkan aset, buku, rekod, akaun atau dokumen lain kepada konservator dengan serta merta atau dalam apa-apa tempoh yang diarahkan oleh konservator dan orang itu hendaklah serta merta menyerahkan, memberikan, menyerah balik atau memindahkan aset, buku, rekod, akaun atau dokumen lain itu kepada konservator.

(2) Jika konservator menyita apa-apa aset yang bukan aset orang terjejas dan pada masa penyitaan itu, mempercayai, dan mempunyai alasan yang munasabah untuk mempercayai, bahawa dia berhak untuk menyita aset itu, maka, konservator tidak bertanggung kepada mana-mana orang berkenaan dengan apa-apa kerugian atau kerosakan yang diakibatkan oleh penyitaan itu melainkan jika kerugian dan kerosakan itu disebabkan dengan sengaja oleh konservator atau mana-mana orang yang bertindak bagi pihaknya atau oleh kecuaiannya sendiri.

Kesan menyekat atau menghalang konservator

15. Tiada seorang pun boleh menyekat atau menghalang penjalanan mana-mana tugas, hak atau kuasa oleh seorang konservator.

Penolak tuntutan

16. (1) Tertakluk kepada subperenggan (3), jika mana-mana bahagian aset orang terjejas yang terdiri daripada—

(a) apa-apa kepentingan dalam tanah yang mengandungi waad yang membebankan;

(b) syer dalam perbadanan;

- (c) kontrak yang tidak menguntungkan; atau
- (d) apa-apa aset lain yang tidak boleh dijual atau tidak sedia untuk dijual, oleh sebab ia mengikat pemiliknya kepada pelaksanaan apa-apa tindakan yang membebankan atau kepada pembayaran apa-apa jumlah wang,

konservator boleh dalam tempoh dua belas bulan selepas dia menyedari akan mana-mana aset yang tersebut di atas, menolak tuntutan mana-mana aset sedemikian.

(2) Hak mana-mana orang yang terjejas oleh konservator mengikut penjalanan kuasanya untuk menolak tuntutan di bawah subperenggan (1) hendaklah diuruskan mengikut cara yang dinyatakan dalam cadangan itu dan apa-apa pampasan kepada orang itu hendaklah ditarafkan sebagai suatu hutang tak bercagar.

(3) Konservator boleh untuk tidak menjalankan kuasanya di bawah subperenggan (1) untuk menolak tuntutan apa-apa kontrak pasaran.

(4) Bagi maksud subperenggan (3), suatu "kontrak pasaran" mempunyai erti yang sama sebagaimana ditakrifkan di bawah seksyen 101 Akta Industri Sekuriti 1983 dan hendaklah termasuk kontrak niaga hadapan yang diniagakan dalam pasaran niaga hadapan yang dijelaskan melalui suatu pusat penjelasan diluluskan.

Moratorium

17. (1) Tertakluk kepada subperenggan (6), dengan pelantikan konservator, suatu moratorium hendaklah berkuat kuasa yang dalam tempoh itu—

- (a) tiada perintah perogatif boleh dibuat atau apa-apa tindakan atau prosiding guaman lain boleh dimulakan terhadap Perbadanan, konservator atau orang terjejas berkenaan dengan—
 - (i) pelantikan konservator; atau
 - (ii) mana-mana kuasa yang dilaksanakan di bawah Akta ini atau apa-apa tindakan yang diambil atau ditinggal untuk diambil berikutan daripada atau berbangkit daripada pelantikan konservator itu;
- (b) apa-apa petisyen untuk penggulungan orang terjejas hendaklah ditolak oleh mahkamah;
- (c) tiada ketetapan boleh diluluskan atau perintah dibuat bagi penggulungan orang terjejas;
- (d) tiada penerima, pengurus, penerima dan pengurus atau pelikuidasi sementara boleh dilantik, atau jika dilantik, pelantikannya hendaklah tamat dengan serta merta dan dia hendaklah mengosongkan jawatannya;
- (e) tiada langkah boleh diambil—
 - (i) untuk mewujudkan, menyempurnakan atau menguatkuasakan apa-apa cagaran ke atas mana-mana aset orang terjejas;
 - (ii) untuk menguatkuasakan suatu penghakiman ke atas mana-mana aset orang terjejas;

- (iii) untuk memiliki semula apa-apa aset dalam milikan, jagaan atau kawalan orang terjejas; atau
- (iv) untuk menolak apa-apa hutang yang terhutang kepada orang terjejas berkenaan dengan apa-apa tuntutan terhadap orang terjejas,

kecuali dengan kebenaran bertulis terlebih dahulu daripada Perbadanan;

- (f) tiada prosiding, pelaksanaan atau proses undang-undang lain boleh dimulakan atau diteruskan, dan tiada distres boleh dilevikan, terhadap orang terjejas atau asetnya kecuali dengan kebenaran bertulis terlebih dahulu daripada Perbadanan;
- (g) apa-apa permohonan yang dibuat di bawah seksyen 176 Akta Syarikat 1965 hendaklah ditangguhkan *sine die* dan apa-apa perintah sekatan yang dikeluarkan menurut subseksyen 176(10) Akta Syarikat 1965 hendaklah dilepaskan dan diketepikan dengan serta merta; dan
- (h) tiada prosiding, pelaksanaan atau proses undang-undang lain boleh dimulakan atau diteruskan, terhadap mana-mana orang yang menyediakan suatu jaminan atau yang bertindak sebagai seorang penjamin bagi liabiliti orang terjejas kecuali dengan kebenaran bertulis terlebih dahulu daripada Perbadanan.

(2) Tempoh moratorium yang diperuntukkan dalam subperenggan (1) hendaklah bagi suatu tempoh dua belas bulan bermula dari tarikh pelantikan konservator dan boleh ditamatkan pada bila-bila masa oleh Perbadanan.

(3) Walau apa jua pun subperenggan (2), Perbadanan boleh melanjutkan moratorium itu bagi apa-apa tempoh sebagaimana yang disifatkan Perbadanan sesuai bagi membolehkan konservator menyediakan atau menjalankan suatu cadangan di bawah Jadual ini.

(4) Jika tempoh moratorium itu dilanjutkan mengikut subperenggan (3), suatu notis mengenai pelanjutan itu hendaklah disiarkan dalam sekurang-kurangnya dalam dua akhbar harian di Malaysia, satu daripadanya hendaklah dalam bahasa kebangsaan.

(5) Perbadanan tidaklah boleh bertanggung atas sesuatu tindakan atau ganti rugi berkenaan dengan sesuatu keengganan untuk memberi kebenarannya di bawah subperenggan (1).

(6) Tiada apa-apa dalam perenggan ini boleh menghalang apa-apa prosiding guaman atau jenayah daripada dimulakan atau diteruskan oleh mana-mana badan kawal selia di bawah mana-mana undang-undang terhadap orang terjejas.

(7) Tertakluk kepada subperenggan (5), subperenggan (1) tidak menghalang mana-mana orang yang menanggung kerugian daripada apa-apa tindakan Perbadanan, konservator atau orang terjejas daripada memulakan suatu tindakan bagi ganti rugi untuk kerugian yang dialami oleh orang itu.

(8) Walau apa-apa jua pun tindakan yang dimulakan menurut subseksyen (7), Perbadanan, konservator atau orang terjejas boleh meneruskan pelaksanaan mana-mana atau kesemua kuasanya di bawah Akta ini.

(9) Apa-apa keputusan Perbadanan di bawah perenggan ini adalah muktamad dan mengikat.

Mendapatkan balik wang balasan daripada aset yang diperolehi atau dijual sebelum pelantikan konservator

18. (1) Bagi maksud perenggan ini —

"balasan wang", berhubung dengan suatu pemerolehan atau jualan oleh orang terjejas, ertinya balasan bagi pemerolehan atau jualan yang boleh dibayar selain daripada melalui pengeluaran syer oleh orang terjejas;

"pengarah" mempunyai erti yang sama sebagaimana yang ditakrifkan di bawah seksyen 4 Akta Syarikat 1965;

"nilai aset" termasuklah nilai bagi mana-mana nama baik atau keuntungan yang mungkin diperolehi daripada aset atau balasan yang seumpama.

(2) Jika mana-mana aset yang telah diperolehi oleh orang terjejas untuk balasan wang dalam tempoh dua tahun sebelum pelantikan seorang konservator di bawah Akta ini —

- (a) daripada seseorang yang pada masa pemerolehan, seorang pengarah bagi orang terjejas; atau
- (b) daripada sesuatu syarikat yang pada masa pemerolehan, seorang yang juga pengarah adalah juga pengarah bagi orang terjejas,

konservator boleh mendapatkan balik daripada orang atau syarikat yang daripadanya aset itu telah diperolehi apa-apa jumlah yang wang balasan bagi pemerolehan itu melebihi nilai aset itu pada masa pemerolehannya.

(3) Jika apa-apa aset telah dijual oleh orang terjejas bagi sesuatu balasan wang dalam tempoh dua tahun sebelum pelantikan seorang konservator di bawah Akta ini —

- (a) kepada seorang yang pada masa jualan seorang pengarah bagi orang terjejas; atau
- (b) kepada suatu syarikat yang pada masa jualan seseorang yang juga pengarah adalah juga pengarah bagi orang terjejas,

konservator boleh mendapatkan balik daripada orang atau syarikat yang kepadanya aset itu telah dijual apa-apa jumlah yang nilai aset itu ketika jualan melebihi balasan wang.

Keutamaan tak wajar

19. (1) Dengan pelantikan konservator, apa-apa pemindahan, gadai janji, penyempurnaan, penahanan kewajipan, penyelesaian, gadaian, penyerahhakan, penghantaran barangan, bayaran atau tindakan lain yang berhubungan dengan apa-apa aset yang dibuat, ditanggung oleh atau terhadap orang terjejas yang, sekiranya ia dilakukan oleh atau terhadap orang perseorangan, akan menjadi batal atau boleh batal jika dilakukan semasa dia dalam keadaan bankrap di bawah undang-undang kebangkrutan, bolehlah dielakkan atau didapatkan oleh konservator itu.

(2) Bagi maksud subperenggan (1), jika rujukan dibuat dalam undang-undang kebangkrutan kepada suatu tarikh bagi maksud untuk memutuskan kesan kebangkrutan atas transaksi yang disebutkan di dalamnya, tarikh itu hendaklah menjadi tarikh pelantikan konservator.

Pengosongan jawatan penerima, dsb.

20. (1) Mana-mana penerima, pengurus, penerima dan pengurus atau pelikuidasi sementara yang mengosongkan jawatannya mengikut subsubperenggan 17(1)(c) hendaklah dengan serta merta menyerahkan semua aset, buku, rekod, akaun atau dokumen lain orang terjejas kepada konservator.

(2) Semua jumlah wang yang ditanggung dengan sewajarnya berkenaan dengan kos, perbelanjaan dan saraan penerima, pengurus, penerima dan pengurus atau pelikuidasi sementara, mengikut mana-mana yang berkenaan, hendaklah dicajkan pada dan dibayar daripada hasil yang direalisasikan orang terjejas mengikut cara yang dinyatakan dalam cadangan di bawah perenggan 22.

Konservator hendaklah menyediakan cadangan

21. (1) Konservator hendaklah, tertakluk kepada terma dan syarat-syarat pelantikannya, menyediakan dan mengemukakan kepada Perbadanan suatu cadangan yang membentangkan rancangan konservator berkenaan dengan orang terjejas.

(2) Cadangan konservator atau mana-mana pengubahsuaian kepada cadangan di bawah perenggan 24 boleh termasuk mana-mana peruntukan sebagaimana yang difikirkan patut oleh konservator.

(3) Tanpa menjejaskan keluasan makna peruntukan yang sebelumnya, cadangan itu boleh memasukkan peruntukan untuk—

- (a) suatu kompromi atau perkiraan di antara orang terjejas dan pemiutangnya atau mana-mana kelas pemiutang atau di antara orang terjejas dengan anggotanya atau dengan mana-mana kelas anggota atau di antara orang terjejas dengan penghutangnya atau mana-mana kelas penghutang;
- (b) perubahan atau pengurangan semua atau sebahagian daripada modal syer orang terjejas;

- (c) jualan semua atau sebahagian daripada akujanji atau aset orang terjejas;
- (d) pemindahan kepada mana-mana syarikat mengenai keseluruhan atau mana-mana bahagian akujanji, aset atau liabiliti orang terjejas;
- (e) penyambungan oleh atau terhadap syarikat yang disebut dalam subsubperenggan (d) akan mana-mana prosiding undang-undang yang belum selesai oleh atau terhadap orang terjejas;
- (f) penggulungan atau pembubaran tanpa penggulungan orang terjejas; atau
- (g) mana-mana peruntukan lain yang perlu untuk memastikan cadangan atau rancangan konservator atau mana-mana kompromi, perkiraan, penyusunan semula atau pengabungan berkenaan dengan orang terjejas hendaklah dijalankan sepenuhnya dan secara berkesan.

(4) Perbadanan hendaklah menimbangkan cadangan yang dikemukakan oleh konservator dan, tidak kurang daripada tiga puluh hari selepas pengemukakan cadangan atau apa-apa tempoh yang lebih panjang sebagaimana yang dibenarkan oleh Menteri, melulus atau menolak cadangan itu.

Mesyuarat pemiutang bercagar

22. (1) Konservator hendaklah, selepas kelulusan bagi cadangan oleh Perbadanan, menghantar melalui pos berdaftar berbayar dahulu atau mengikut apa-apa cara lain yang ditetapkan di bawah Akta ini ke alamat terakhir setiap pemiutang bercagar orang terjejas yang diketahui oleh konservator—

- (a) suatu salinan cadangan itu;
- (b) jika Perbadanan menyifatkannya sesuai, suatu memorandum daripada Perbadanan yang membentangkan apa-apa perkara yang pada pandangan Perbadanan patut diambil kira oleh pemiutang bercagar dalam menimbangkan cadangan itu; dan
- (c) suatu notis mesyuarat pemiutang bercagar bagi maksud yang dinyatakan dalam perenggan ini.

(2) Suatu mesyuarat pemiutang bercagar orang terjejas hendaklah diadakan dalam masa empat belas hari selepas pengeluaran notis mesyuarat pemiutang bercagar di bawah subperenggan (1).

(3) Mesyuarat pemiutang bercagar orang terjejas yang diadakan di bawah subperenggan (2) hendaklah memutuskan sama ada untuk melulus atau menolak cadangan itu.

(4) Jika-

- (a) lebih suara pemiutang bercagar mengikut nilai, hadir dan mengundi, sama ada dengan sendiri atau melalui proksi, di mesyuarat itu meluluskan cadangan itu; atau
- (b) tiada pemiutang bercagar orang terjejas yang diketahui oleh konservator dan Perbadanan meluluskan cadangan di bawah subperenggan 21(4),

cadangan itu, termasuklah cadangan sebagaimana ia boleh diubah suai kemudiannya di bawah perenggan 24, hendaklah mengikat orang terjejas, semua pemegang

syer dan pemiutang orang terjejas atau mana-mana orang lain yang terjejas oleh cadangan itu, sama ada atau tidak orang itu mempunyai pengetahuan atau pemakluman mengenai cadangan itu.

(5) Bagi maksud subsubperenggan (4)(a), suatu ketetapan untuk meluluskan cadangan itu dengan apa-apa pengubahsuaian hendaklah disifatkan sebagai suatu penolakan cadangan itu.

(6) Walau apa jua pun mana-mana undang-undang —

- (a) kelulusan atau pelaksanaan suatu cadangan di bawah subperenggan (4), termasuklah cadangan sebagaimana ia boleh diubah suai kemudiannya di bawah perenggan 24, hendaklah tidak melepaskan mana-mana cagaran yang diperuntukkan oleh mana-mana orang untuk menjamin apa-apa tugas atau liabiliti yang terhutang oleh orang terjejas kepada mana-mana pemiutang orang terjejas kecuali mengikut cara dan setakat yang diperuntukkan dalam cadangan itu; dan
- (b) kecuali sebagaimana yang diperuntukkan dalam cadangan itu setiap cagaran, tugas atau liabiliti sedemikian bagi orang yang memperuntukkan cagaran itu hendaklah sentiasa sah dan berkuat kuasa terhadap orang itu walau apa pun kelulusan atau pelaksanaan cadangan itu, termasuklah cadangan itu sebagaimana ia boleh diubahsuai kemudiannya di bawah perenggan 24, atau mana-mana kompromi, perkiraan, penyusunan semula atau penggabungan berhubung dengan orang terjejas.

(7) Kegagalan untuk memberitahu mana-mana pemiutang bercagar orang terjejas mengenai mesyuarat pemiutang bercagar tidak boleh mentaksahkan mesyuarat yang diadakan di bawah subperenggan (2) atau ketetapan yang diluluskan dalam mesyuarat itu.

(8) Bagi mengelakkan keraguan, jika Perbadanan adalah pemiutang bercagar orang terjejas, Perbadanan adalah berhak untuk menghadiri dan mengundi di mesyuarat pemiutang bercagar orang terjejas yang diadakan oleh konservator di bawah subperenggan (2) atau perenggan 24.

Pelaksanaan cadangan

23. (1) Tertakluk kepada perenggan 22, 24 dan 25, konservator hendaklah melaksanakan cadangan itu menurut termannya.

(2) Konservator hendaklah—

- (a) dalam masa empat belas hari dari tarikh kelulusan cadangan itu oleh pemiutang bercagar orang terjejas di bawah perenggan 22;
- (b) jika tiada pemiutang bercagar yang diketahui oleh konservator, dalam masa empat belas hari dari tarikh kelulusan cadangan itu oleh Perbadanan di bawah subperenggan 21(4); atau
- (c) dalam masa empat belas hari dari tarikh kelulusan cadangan di bawah subperenggan 21(4),

menyebabkan disiarkan dalam sekurang-kurangnya dua akhbar harian di Malaysia, satu daripadanya hendaklah dalam bahasa kebangsaan, kelulusan cadangan itu dan masa serta tempat bagi mana-mana pemiutang orang terjejas untuk memeriksa butiran mengenai cadangan itu.

(3) Walau apa jua pun peruntukan mana-mana undang-undang atau kontrak, suatu cadangan yang diluluskan atau diubahsuai di bawah Akta ini boleh dilaksanakan, dan konservator hendaklah mempunyai kuasa untuk melaksanakan dan melakukan semua perkara yang perlu untuk menjalankan sepenuhnya dan secara berkesan dan melaksanakan cadangan atau mana-mana bahagian cadangan itu tanpa memerlukan apa-apa notis kepada atau kelulusan atau keizinan mana-mana pemegang syer, pemiutang orang terjejas atau mana-mana orang lain yang terjejas oleh cadangan itu atau kelulusan atau pengesahan oleh mahkamah, dan apa-apa notis, kelulusan, kebenaran atau pengesahan sedemikian, sama ada dikehendaki di bawah mana-mana undang-undang, kontrak atau selainnya, hendaklah disifatkan sebagai telah diberi atau didapati sewajarnya, mengikut mana-mana yang berkenaan.

(4) Jika mana-mana bahagian aset orang terjejas adalah tertakluk kepada hak pemiutang bercagar atau mana-mana orang lain dan suatu cadangan telah diluluskan di bawah Akta ini, konservator berhak untuk menguruskan aset sedemikian mengikut cara yang dinyatakan dalam cadangan itu.

(5) Konservator hendaklah menggunakan semua hasil yang direalisasikan dalam pelaksanaan cadangan itu mengikut cara yang dinyatakan dalam cadangan itu.

(6) Jika seorang konservator memindahmilik aset atau liabiliti mengikut suatu cadangan, maka aset itu hendaklah dipindahmilikkan dan diletakhak dalam, dan liabiliti itu hendaklah dipindahmilikkan kepada dan menjadi liabiliti, penerima pindahmilik, bebas dalam hal mana-mana aset tertentu jika cadangan itu mengarahkan sedemikian, daripada mana-mana gadaian, kaveat atau bebanan lain.

(7) Walau apa jua pun apa-apa yang bertentangan dalam mana-mana undang-undang, Perbadanan atau subsidiarinya boleh memperolehi mana-mana aset atau cagar boleh pasar yang dikeluarkan oleh, orang terjejas.

(8) Walau apa jua pun apa-apa yang bertentangan dalam mana-mana undang-undang, konservator hendaklah mempunyai kuasa untuk membuat semua perkara yang perlu untuk memberi kesan kepada dan untuk melaksanakan cadangan yang diluluskan mengikut perenggan 21 dan 22 atau diubahsuai menurut perenggan 24.

(9) Jika suatu cadangan memberi kesan kepada modal syer orang terjejas, konservator hendaklah dalam tempoh empat belas hari selepas cadangan itu diluluskan menurut Jadual ini, memberitahu Pendaftar Syarikat bagaimana cadangan itu menjejaskan modal syer orang terjejas.

(10) Suatu notis di bawah subperenggan (9) hendaklah dalam borang sebagaimana yang ditetapkan di bawah Akta Syarikat 1965.

(11) Apabila suatu notis diserahkan di bawah subperenggan (9), kesemua kehendak di bawah Akta Syarikat 1965 atau mana-mana undang-undang lain yang berkenaan dengan perubahan kepada modal syer orang terjejas hendaklah dianggap sebagai telah dipatuhi dan, berkuat kuasa dari tarikh yang dinyatakan dalam cadangan itu, modal syer orang terjejas hendaklah sebagaimana yang dinyatakan dalam notis itu.

(12) Dengan serahan simpan notis di bawah subperenggan (9), butiran yang ditunjukkan dalam notis itu hendaklah disifatkan sebagai menggantikan butiran yang bersamaan dengannya dalam dokumen konstituen orang terjejas.

Pengubahsuaian kepada cadangan

24. (1) Konservator boleh pada bila-bila masa selepas —

- (a) cadangan itu diluluskan oleh pemiutang bercagar orang terjejas di bawah perenggan 22; atau
- (b) jika tiada pemiutang bercagar yang diketahui oleh konservator, kelulusan cadangan itu oleh Perbadanan di bawah subperenggan 21(4),

mencadangkan ubahsuaian kepada cadangan itu.

(2) Jika Perbadanan berpandangan bahawa ubahsuaian yang dicadangkan tidak berbeza secara substansial daripada cadangan pemiutang bercagar di bawah subperenggan (1), Perbadanan hendaklah memutuskan keperluan untuk mengadakan suatu mesyuarat pemiutang bercagar untuk menimbang cadangan ubahsuaian yang dicadangkan itu.

(3) Keputusan Perbadanan di bawah subperenggan (2) hendaklah muktamad, konklusif dan mengikat konservator, orang terjejas, kesemua pemegang syer dan pemiutang orang terjejas dan orang lain yang terjejas dengan cadangan itu sama ada orang itu mempunyai pengetahuan atau pemakluman mengenai cadangan yang diubahsuai itu.

(4) Sekiranya Perbadanan memutuskan bahawa adalah perlu untuk mengadakan suatu mesyuarat pemiutang bercagar untuk menimbang ubahsuaian yang dicadangkan, Perbadanan hendaklah melalui notis bertulis memberitahu konservator mengenai keperluan untuk mengadakan mesyuarat itu.

(5) Konservator hendaklah, dalam tempoh enam puluh hari dari tarikh penerimaan notis daripada Perbadanan atau tempoh yang lebih panjang sebagaimana yang dinyatakan oleh Perbadanan dalam notis itu, mengadakan suatu mesyuarat.

(6) Konservator hendaklah, sebelum mesyuarat yang diadakan di bawah subperenggan (5), menghantar melalui pos berdaftar berbayar dahulu atau mengikut apa-apa cara lain yang ditetapkan di bawah Akta ini ke alamat terakhir setiap pemiutang bercagar yang diketahui oleh konservator—

- (a) suatu salinan ubahsuaian yang dicadangkan itu;

- (b) jika Perbadanan menyifatkan sesuai, suatu memorandum daripada Perbadanan menyatakan perkara yang pada pandangan Perbadanan patut diambil kira oleh pemiutang bercagar dalam menimbangkan ubahsuaian yang dicadangkan itu; dan
- (c) suatu notis mesyuarat pemiutang bercagar bagi ubahsuaian yang dicadangkan itu dalam perenggan ini.

(7) Mesyuarat pemiutang bercagar orang terjejas untuk menimbang ubahsuaian yang dicadangkan itu hendaklah diadakan dan dijalankan mengikut cara yang dinyatakan dalam perenggan 22.

(8) Tanpa menjejaskan perenggan 25, pematuhan dengan mana-mana syarat kelulusan yang dikenakan oleh suatu badan kawal selia tidak boleh ditafsirkan sebagai suatu ubahsuaian kepada cadangan bagi maksud perenggan ini.

Syarat kelulusan kawal selia

25. (1) Jika-

- (a) kelulusan mana-mana badan kawal selia dikehendaki bagi melaksanakan cadangan itu; atau
- (b) kelulusan mana-mana badan kawal selia dikehendaki untuk melaksanakan apa-apa ubahsuaian yang dicadangkan kepada cadangan itu,

dan syarat kelulusan yang dikenakan oleh badan kawal selia itu, Perbadanan boleh, walau apa jua pun yang pemiutang bercagar orang terjejas telah bersetuju dengan cadangan di bawah perenggan 22 atau 24, mengarahkan konservator untuk membuang cadangan itu atau selainnya memberhentikan pelaksanaan cadangan itu jika Perbadanan berpendapat bahawa syarat kelulusan sedemikian adalah bukan demi kepentingan orang terjejas.

(2) Keputusan Perbadanan di bawah subperenggan (1) hendaklah mengikat orang terjejas, semua pemegang syer dan pemiutang orang terjejas dan mana-mana orang lain yang terjejas oleh sebab cadangan itu, sama ada atau tidak orang itu mempunyai pengetahuan atau pemakluman mengenai cadangan itu.

Penolakan atau pemberhentian cadangan

26. (1) Jika Perbadanan mengarahkan konservator untuk membuang cadangan atau selainnya tak meneruskan pelaksanaan cadangan di bawah perenggan 25

atau cadangan itu tidak diluluskan di bawah perenggan 22 atau 24,

Perbadanan

boleh menimbangkan pilihan lain untuk menguruskan pengurusan dan pelupusan

aset orang terjejas dan boleh-

- (a) meminta konservator untuk mengemukakan suatu cadangan baru;
- (b) membatalkan moratorium yang dikenakan di bawah perenggan 17; atau
- (c) melantik seorang konservator gantian.

(2) Tanpa menjejaskan subperenggan (1), Perbadanan boleh pada bila-bila masa menamatkan pelantikan seorang konservator dan pentadbirannya jika pada pendapatnya penerusan pentadbiran itu tidak boleh lagi mencapai objektif yang dinyatakan dalam subseksyen 27(1).

(3) Apa-apa keputusan Perbadanan di bawah subperenggan (1) atau (2) hendaklah muktamad dan mengikat.

Kelayakan konservator

27. (1) Tiada seorang pun boleh dilantik sebagai seorang konservator melainkan jika—

- (a) orang itu ialah orang sebenar; dan
- (b) dia telah bersetuju secara bertulis mengenai pelantikannya dan tidak menarik balik persetujuannya pada tarikh pelantikannya.

(2) Orang-orang yang berikut layak untuk dilantik sebagai konservator:

- (a) juruaudit syarikat yang diluluskan di bawah Akta Syarikat 1965;
- (b) seorang yang mempunyai, pada pendapat Perbadanan, pengalaman yang dikehendaki; atau
- (c) seorang yang, pada pendapat Perbadanan, berupaya melaksanakan tugas seorang konservator.

(3) Orang yang berikut tidak layak untuk dilantik sebagai konservator:

- (a) suatu perbadanan;
- (b) seorang bankrap yang belum dilepaskan;
- (c) seorang pemegang gadai janji mana-mana aset orang terjejas;
- (d) seorang juruaudit orang terjejas; atau
- (e) seorang pegawai orang terjejas.

Dua orang atau lebih konservator

28. Jika dua atau lebih orang dilantik sebagai konservator bagi orang terjejas —

- (a) fungsi atau kuasa konservator boleh dilaksanakan atau dijalankan oleh mana-mana satu daripada mereka atau oleh kedua-duanya atau kesemua mereka secara bersesama; dan
- (b) rujukan kepada konservator dalam Akta ini adalah rujukan kepada mana-mana satu daripada mereka yang dilantik, mengikut mana-mana yang berkenaan.

Laporan mengenai salah laku

29. Jika sesuatu penyiasatan ke dalam urusan dan hal-ehwal orang terjejas oleh konservator mendedahkan apa-apa fraud, misfeasans atau salah laku lain berkaitan dengan penajaan atau pembentukan orang terjejas atau dalam pengurusan

orang terjejas atau hal-ehwalnya, atau jika telah berlaku apa-apa pelepasan atau penahanan salah apa-apa aset kepunyaan orang terjejas, konservator hendaklah melaporkan fraud, misfeasans atau salah laku sedemikian kepada badan kawal selia atau badan penguatkuasa yang berkaitan.

Keesahan transaksi

30. Apa-apa bayaran yang dibuat, transaksi yang dibuat atau apa-apa tindakan atau perkara lain yang dilakukan dengan suci hati oleh, atau dengan kebenaran konservator, adalah sah dan mempunyai kuat kuasa bagi maksud Akta ini dan tidaklah tak sah, boleh jadi tak sah atau dianggap sebagai suatu keutamaan tak wajar semasa penggulungan orang terjejas.

JADUAL KEEMPAT

[Seksyen 28]

Hak untuk Mengekal, Melupus atau Memperolehi Harta

Tafsiran

1. Dalam Jadual ini—

"pemeroleh" ertinya seseorang yang disebut dalam perenggan 28(1)(b);

"pembeli" ertinya mana-mana orang yang kepadanya Perbadanan atau pemeroleh melupuskan apa-apa harta di bawah seksyen 28;

"undang-undang tanah yang berkaitan" ertinya—

- (a) dalam hal Semenanjung Malaysia, kaedah-kaedah tanah Negeri masing-masing;
- (b) dalam hal Sabah, Ordinan Tanah Sabah; atau
- (c) dalam hal Sarawak, Kanun Tanah Sarawak.

Kuasa disifatkan untuk memperolehi

2. Bagi maksud seksyen 28 —

- (a) Perbadanan atau pemeroleh hendaklah disifatkan diberi kuasa oleh pemberi jaminan sesuatu cagaran untuk memberi kuasa pemindahan pemilikan harta kepada pembeli; dan
- (b) setiap pendaftar mahkamah, Pendaftar Syarikat, Pendaftar tanah, pendaftar kapal Malaysia, depository pusat, ejen depository diberi kuasa dan mana-mana orang yang menyenggara suatu daftar atau rekod pemilikan atau kepentingan, mengikut mana-mana yang berkenaan, hendaklah menerima suatu perakuan peletakhakan yang dilaksanakan oleh Perbadanan atau pemeroleh dan tertakluk kepada bayaran fi yang

ditetapkan di bawah undang-undang tanah yang berkaitan, mendaftar pindahmilik harta itu atau mana-mana bahagian harta itu kepada pembeli tanpa memerlukan apa-apa permohonan lanjut atau pemfailan apa-apa dokumen selanjutnya.

Jualan harta melalui triti persendirian

3.(1) Suatu jualan melalui suatu triti persendirian di bawah seksyen 28 boleh dibuat melalui suatu kontrak persendirian, lelongan, tender atau mana-mana cara jualan lain.

(2) Peruntukan statutori peletakhakan yang dinyatakan dalam Jadual Kedua hendaklah terpakai bagi apa-apa jualan, pemerolehan atau urus niaga di bawah Jadual ini oleh Perbadanan.

Perbadanan boleh memperoleh harta

4. Jika Perbadanan, subsidiarinya atau seorang pemeroleh sebagai pemegang jaminan atas apa-apa harta sama ada sebagai pemegang gadaian, pemegang gadai janji, pemegang serah hak, pemegang lien atau selainnya menjalankan haknya di bawah seksyen 28 untuk melupuskan harta itu atau mana-mana bahagian harta itu melalui triti persendirian kemudian, walau apa jua pun apa-apa yang bertentangan dalam mana-mana undang-undang, Perbadanan, subsidiarinya atau mana-mana pemeroleh, mengikut mana-mana yang berkenaan, boleh tanpa perlu membayar apa-apa deposit, memperolehi harta demikian atau sebahagian daripada harta itu dan menolak harga belian terhadap apa-apa liabiliti yang terhutang kepada Perbadanan, subsidiarinya atau pemeroleh itu.

Hak pemerolehan Perbadanan atau pemeroleh hendaklah mengatasi

5. Hak Perbadanan atau pemeroleh di bawah seksyen 28 boleh dilaksanakan —
- (a) walau apa jua pun apa-apa perintah jualan yang dibuat sama ada di bawah kaedah mahkamah, Kanun Tanah Negara, Ordinan Tanah Sabah atau Kanun Tanah Sarawak atau mana-mana undang-undang lain atau apa-apa langkah atau prosiding yang diambil atau sementara menunggu untuk menjual harta;
 - (b) tanpa memerlukan apa-apa kebenaran, pengesahan atau perintah mahkamah; atau
 - (c) bersesama dengan apa-apa hak atau remedi yang diperuntukkan oleh mana-mana undang-undang atau kontrak.

Hak Perbadanan atau pemeroleh tidak boleh dibataskan

6. Hak Perbadanan atau pemeroleh yang dijalankan di bawah seksyen 28 adalah tidak eksklusif daripada apa-apa hak atau remedi lain yang diperuntukkan oleh mana-mana undang-undang atau kontrak.

HURAIAN

Akta Perbadanan Insurans Deposit Malaysia 2005 ("Akta") yang dicadangkan oleh Rang Undang-Undang ini mengandungi peruntukan bagi penubuhan Perbadanan Insurans Deposit Malaysia, pentadbiran suatu sistem insurans deposit di bawah Akta dan bagi perkara yang bersampingan atau berkaitan dengannya.

BAHAGIAN I

2. Bahagian I Rang Undang-Undang ini mengandungi perkara permulaan.
3. *Fasal 1* mengandungi tajuk ringkas. Ia juga bertujuan memberi Menteri kuasa untuk menetapkan suatu tarikh permulaan kuat kuasa Akta dan untuk menetapkan tarikh berbeza bagi permulaan kuat kuasa peruntukan berbeza dalam Akta ini.
4. *Fasal 2* mengandungi takrif ungkapan tertentu yang digunakan dalam Rang Undang-Undang ini.

BAHAGIAN II

5. Bahagian II Rang Undang-Undang mengandungi 5 Bab dan memperuntukkan perkara yang berhubungan dengan penubuhan Perbadanan, objektif, Lembaga pengarah, Ketua Pegawai Eksekutif, pegawai dan pekerja Perbadanan dan tugas dan kuasa Lembaga dan Perbadanan.

Bab 1

6. *Fasal 3* memperuntukkan bagi penubuhan Perbadanan Insurans Deposit Malaysia yang kekal turun-temurun dan mempunyai suatu meterai biasa dan meterai faksimili, dan boleh menyaman dan disaman atas nama perbadanan.
7. *Fasal 4* memperuntukkan objektif Perbadanan, iaitu untuk mentadbir suatu sistem insurans deposit di bawah Akta ini, memperuntukkan insurans terhadap kehilangan sebahagian atau kesemua deposit sesuatu institusi anggota, memperuntukkan insentif untuk pengurusan risiko wajar dalam sistem kewangan dan menggalak atau menyumbang kepada kestabilan sistem kewangan. Perbadanan dikehendaki untuk bertindak dalam apa-apa cara bagi meminimumkan kos kepada sistem kewangan dalam mencapai objektif kedua dan keempatnya.
8. *Fasal 5* memperuntukkan penggunaan dan penjagaan meterai biasa dan meterai faksimili oleh Perbadanan bagi maksud pelaksanaan mana-mana dokumen.
9. *Fasal 6* memperuntukkan bagi pelaksanaan apa-apa dokumen atau surat cara oleh Perbadanan atau mana-mana pegawai Perbadanan bagi pihaknya.
10. *Fasal 7* bertujuan untuk membenarkan Perbadanan untuk menubuhkan apa-apa jawatankuasa sebagaimana yang dirasakannya patut atau suai manfaat bagi pelaksanaan fungsinya.

11. *Fasal 8* bertujuan untuk membenarkan Perbadanan untuk menubuhkan, di dalam atau di luar Malaysia, apa-apa pejabat sebagaimana yang ia rasakan perlu dan suai manfaat bagi pelaksanaan fungsinya.
12. *Fasal 9* bertujuan untuk membenarkan Perbadanan untuk melantik seseorang di dalam atau di luar Malaysia sebagai wakilnya dan orang itu akan diberi kuasa untuk melakukan atau melaksanakan apa-apa tindakan, kuasa atau fungsi yang diberi kuasa. Perbadanan juga diberi kuasa untuk melantik ejen sebagaimana dirasakannya perlu dan suai manfaat bagi pelaksanaan fungsinya.
13. *Fasal 10* bertujuan untuk membenarkan Perbadanan untuk menubuhkan apa-apa subsidiari sebagaimana yang dirasakannya perlu dan suai manfaat bagi pelaksanaan fungsinya dan mana-mana subsidiari ditetapkan oleh Perbadanan hendaklah mempunyai kuasa dan imuniti Perbadanan termasuklah yang diperuntukkan dalam *fasal 25, 26, 27, 28*, perenggan *71(1)(b)* dan Jadual Kedua, Ketiga dan Keempat.

Bab 2

14. *Fasal 11* memperuntukkan bagi tugas dan komposisi Lembaga Pengarah Perbadanan. Anggota Lembaga terdiri daripada seorang Pengerusi yang dilantik oleh Menteri, Gabenor, Ketua Setiausaha Perbendaharaan, seorang pengarah yang dilantik oleh Menteri daripada sektor awam dan tidak lebih daripada tiga pengarah lain yang dilantik oleh Menteri yang hendaklah mempunyai pengalaman dalam sektor swasta berkaitan dan sekurang-kurangnya seorang daripada mereka hendaklah mempunyai pengalaman dalam sektor perbankan dan kewangan berkaitan.
15. *Fasal 12* bertujuan untuk membenarkan Lembaga untuk membuat undang-undang kecil sebagaimana perlu atau suai manfaat berhubungan dengan pentadbiran, pengurusan, kawalan, perniagaan, aset dan hal-ehwal Perbadanan.
16. *Fasal 13* memperuntukkan bagi tempoh jawatan pengarah-pengarah dalam Lembaga, selain daripada Gabenor dan Ketua Setiausaha Perbendaharaan, yang tidak boleh melebihi tiga tahun dan layak Untuk dilantik semula.
17. *Fasal 14* memperuntukkan bagi kehilangan kelayakan dan penamatan pengarah Lembaga.
18. *Fasal 15* memperuntukkan bagi apa-apa tindakan dan prosiding Lembaga yang tidak terjejas oleh kekosongan, dsb.
19. *Fasal 16* memperuntukkan bagi saraan dan elaun pengarah Lembaga yang diputuskan oleh Menteri, atas syor Lembaga.
20. *Fasal 17* mengenakan suatu tugas kepada seorang pengarah Lembaga supaya pada setiap masa bertindak dengan jujur dan demi kepentingan Perbadanan dan menggunakan kebijaksanaan munasabah dalam melaksanakan tugas jawatannya. Seorang pengarah atau mana-mana orang yang pernah menjadi seorang pengarah adalah dilarang untuk menggunakan secara salah apa-apa maklumat yang didapati oleh sebab kedudukannya sebagai seorang pengarah untuk memperolehi, secara langsung atau tak langsung, suatu faedah bagi dirinya atau bagi mana-mana orang lain atau melakukan, memperkatakan atau menyiarkan apa-apa yang boleh memudaratkan kepentingan Perbadanan.

21. *Fasal 18* memperuntukkan bilangan mesyuarat untuk dijalankan oleh Lembaga, iaitu sekurang-kurangnya empat kali dalam setahun dan juga tata cara mesyuarat.

Bab 3

22. *Fasal 19* memberi kuasa kepada Menteri untuk melantik seorang Ketua Pegawai Eksekutif Perbadanan atas syor Lembaga dan Pegawai itu hendaklah bertanggungjawab dalam pentadbiran urusan dan hal-ehwal harian Perbadanan.

23. *Fasal 20* memperuntukkan bagi terma dan syarat perkhidmatan bagi Ketua Pegawai Eksekutif.

Bab 4

24. *Fasal 21* bertujuan untuk membenarkan Perbadanan untuk melantik mana-mana pegawai atau pekerja sebagaimana perlu untuk menjalankan urusan dan hal-ehwal Perbadanan. Seseorang pegawai atau pekerja Perbadanan hendaklah, pada setiap masa, bertindak secara suci hati dan mematuhi apa-apa keperluan, piawai, tugas dan kod kelakuan termasuklah surcaj sebagaimana diperuntukkan dalam undang-undang kecil yang dibuat oleh Lembaga di bawah *fasal 12(1)(a)*. *Fasal* ini juga memberi kuasa kepada Perbadanan, dengan kelulusan Lembaga, untuk menubuh dan menyenggara suatu kumpulan wang pencen atau simpanan bagi pegawai dan pekerjanya.

25. *Fasal 22* bertujuan untuk membenarkan Perbadanan untuk memberi bantuan kewangan kepada pegawai, pekerjanya atau mana-mana orang lain.

Bab 5

26. *Fasal 23* melarang Menteri atau Perbadanan daripada menyiasat secara khusus mengenai hal-ehwal mana-mana pelanggan sesuatu institusi anggota.

27. *Fasal 24* memperuntukkan perkara berhubungan dengan kerahsiaan maklumat yang berkaitan dengan urusan dan hal-ehwal Perbadanan, Bank Negara Malaysia, suatu institusi anggota atau seorang pelanggan Bank Negara Malaysia. Pengarah, pegawai, pekerja atau ejen Perbadanan termasuklah seorang yang dilantik di bawah *fasal 25(3)* atau mana-mana orang yang mempunyai dengan apa-apa cara akses kepada apa-apa jua rekod, buku, daftar, surat-menyurat, atau apa-apa dokumen lain, atau bahan atau maklumat, yang berhubungan dengan urusan dan hal-ehwal sedemikian adalah dilarang mendedahkan perkara itu kepada mana-mana orang kecuali pendedahan itu diperlukan di bawah mana-mana undang-undang, bagi pelaksanaan tugasnya atau penjalanan fungsinya di bawah Akta ini atau apabila dikehendaki berbuat demikian menurut undang-undang oleh mana-mana mahkamah.

28. *Fasal 25* memperuntukkan kuasa Perbadanan dalam penjalanan objektifnya, pelaksanaan fungsinya atau penunaian tugasnya.

29. *Fasal 26* bertujuan untuk memberi kuasa kepada Perbadanan untuk memperoleh atau melupuskan aset menurut peruntukan statutori peletakhakan yang dinyatakan dalam Jadual Kedua atau mengikut undang-undang am.

30. *Fasal 27* bertujuan untuk membenarkan Perbadanan untuk melantik konservator dan konservator tambahan bagi orang terjejas utama dan orang terjejas. Perlantikan, tugas dan fungsi konservator adalah diperuntukkan dalam Jadual Ketiga.

31. *Fasal 28* bertujuan untuk memberi kuasa kepada Perbadanan untuk melupuskan mana-mana harta atau bahagian harta dengan cara triti persendirian menurut Jadual Keempat.

BAHAGIAN III

32. Bahagian III Rang Undang-Undang mengandungi peruntukan kewangan berkenaan dengan Perbadanan.

33. *Fasal 29* mengandungi peruntukan bagi Perbadanan menyenggara dan mentadbir dua kumpulan wang berasingan, iaitu suatu kumpulan wang Islam dan suatu kumpulan wang konvensional, bagi tujuan Akta.

34. *Fasal 30* bertujuan membenarkan Menteri untuk meminjamkan wang kepada Perbadanan dan peminjaman demikian hendaklah dibuat daripada Kumpulan Wang Disatukan.

35. *Fasal 31* menyatakan pelaburan yang dibenarkan oleh Perbadanan.

36. *Fasal 32* memperuntukkan tahun kewangan Perbadanan.

37. *Fasal 33* memperuntukkan keperluan Perbadanan untuk menyimpan buku, rekod, akaun atau dokumen lain mengikut Akta Badan Berkanun (Akaun dan Laporan Tahunan) 1980.

38. *Fasal 34* memperuntukkan bagi akaun Perbadanan diaudit oleh Juruaudit Negara.

39. *Fasal 35* memperuntukkan bagi keperluan bagi akaun tahunan dan laporan tahunan Perbadanan dikemukakan kepada Menteri yang akan menyebabkannya dibentangkan di hadapan Dewan Negara dan Dewan Rakyat.

BAHAGIAN IV

40. Bahagian IV Rang Undang-Undang mengandungi peruntukan berhubungan dengan deposit diinsuranskan.

41. *Fasal 36* mengandungi takrifan perkataan tertentu yang digunakan dalam Bahagian ini.

42. *Fasal 37* bertujuan untuk menyifatkan setiap institusi kewangan berlesen di bawah Akta Bank dan Institusi-Institusi Kewangan 1989 atau Akta Bank Islam 1983 sebagai institusi anggota dari permulaan kuat kuasa Akta ini.

43. *Fasal 38* bertujuan untuk menghendaki suatu institusi anggota untuk mematuhi terma dan syarat keanggotaan di bawah peraturan-peraturan yang ditetapkan di bawah seksyen 100.

44. *Fasal 39* bertujuan untuk mengadakan tata cara bagi Perbadanan untuk membatalkan keanggotaan suatu institusi anggota dalam hal lesennya telah diserahkan balik atau dibatalkan di bawah Akta Bank dan Institusi-Institusi Kewangan 1989 atau Akta Bank Islam 1983, mengikut mana-mana yang berkenaan.
45. *Fasal 40* memberi kuasa kepada Lembaga untuk membuat pemutusan bagi menamatkan keanggotaan suatu institusi anggota dan perkara lain yang berhubungan dengan penamatan keanggotaan itu.
46. *Fasal 41* mengandungi peruntukan mengenai kesan pembatalan atau penamatan keanggotaan.

Bab 2

47. *Fasal 42* memperuntukkan supaya premium pertama untuk ditaksirkan dan dipungut oleh Perbadanan daripada institusi anggota. Premium pertama itu hendaklah dibayar ke ibu pejabat Perbadanan dalam masa tiga puluh hari dari tarikh institusi anggota itu menjadi anggota.
48. *Fasal 43* dan *44* memperuntukkan bagi premium tahunan dibayar oleh institusi anggota kepada Perbadanan dan pengiraan premium tahunan itu.
49. *Fasal 45* melarang apa-apa penolakan ke atas mana-mana bayaran premium oleh institusi anggota.
50. *Fasal 46* menyatakan keadaan yang Perbadanan diberi kuasa untuk mengenakan suatu surcaj premium ke atas institusi anggota dengan kebenaran bertulis terlebih dahulu daripada Menteri.
51. *Fasal 47* memperuntukkan bagi apa-apa premium atau surcaj premium yang perlu dibayar dan kena dibayar di bawah *fasal 42, 43* atau *46* dinaikkan ke suatu jumlah yang ditetapkan tanpa notis lanjutan diserahkan kepada institusi anggota.
52. *Fasal 48* bertujuan untuk memberi kuasa kepada Perbadanan untuk membuat peraturan-peraturan berhubungan dengan premium pertama dan tahunan.

Bab 3

53. *Fasal 49* mengandungi peruntukan mengenai perlindungan berasingan deposit insurans ke atas deposit Islam dan deposit konvensional dan layanan berbeza bagi deposit pemegang amanah dan pemunya bersama.
54. *Fasal 50* memperuntukkan bagi perlindungan deposit insurans untuk diterima oleh seorang pendeposit institusi anggota jika institusi anggota itu bergabung dengan dua atau lebih institusi anggota lain.
55. *Fasal 51* memperuntukkan bagi perlindungan deposit insurans diterima oleh seorang pendeposit institusi anggota jika deposit institusi anggota itu akan diperoleh oleh seorang institusi bukan anggota.

56. *Fasal 52* bertujuan untuk memperuntukkan bahawa deposit yang diambil alih oleh seorang institusi anggota daripada institusi anggota lain adalah disifatkan deposit institusi anggota yang mengambil alih itu.

57. *Fasal 53* memperuntukkan bagi jenis wang yang bukan menjadi sebahagian daripada deposit.

Bab 4

58. *Fasal 54* memperuntukkan bahawa apa-apa bayaran oleh Perbadanan kepada seorang pendeposit berkenaan dengan deposit Islam atau deposit konvensional hendaklah dibuat masing-masing daripada kumpulan wang Islam atau kumpulan wang konvensional.

59. *Fasal 55* memperuntukkan bagi keadaan bagi bayaran wajib dibuat oleh Perbadanan kepada pendeposit.

60. *Fasal 56* memperuntukkan keadaan bagi bayaran budi bicara dibuat oleh Perbadanan.

61. *Fasal 57* bertujuan untuk membenarkan Perbadanan untuk membuat bayaran pendahuluan kepada pendeposit walaupun bayaran wajib atau bayaran budi bicara telah dibuat.

62. *Fasal 58* mengandungi peruntukan mengenai tarikh mengira liabiliti berkenaan dengan bayaran wajib dan bayaran budi bicara.

63. *Fasal 59* menyatakan cara-cara pengiraan apa-apa pulangan atau faedah atas deposit bagi bayaran wajib oleh Perbadanan.

64. *Fasal 60* bertujuan untuk membenarkan Perbadanan untuk membayar pulangan atau faedah atas bayaran wajib.

65. *Fasal 61* menyatakan cara-cara pengiraan apa-apa pulangan atau faedah atas deposit bagi bayaran budi bicara oleh Perbadanan.

66. *Fasal 62* memperuntukkan bagi pulangan atau faedah bagi deposit berkaitan indeks.

67. *Fasal 63* memperuntukkan bagi pelepasan liabiliti Perbadanan berhubungan dengan apa-apa bayaran yang dibuat di bawah Bab ini.

68. *Fasal 64* memperuntukkan bagi subrogasi Perbadanan dalam hal Perbadanan membuat suatu bayaran di bawah Bab ini.

69. *Fasal 65* bertujuan untuk memberi kuasa kepada Perbadanan untuk menahan bayaran deposit sehingga ia telah menerima suatu penyerahhakan bertulis mengenai semua hak dan kepentingan pendeposit berhubungan dengan deposit mereka.

70. *Fasal 66* memperuntukkan bagi batasan masa bagi tuntutan terhadap Perbadanan.

BAHAGIAN V

71. Bahagian V Rang Undang-Undang mengandungi peruntukan berhubung dengan pemeriksaan institusi anggota,

72. *Fasal 67* memperuntukkan bahawa Bank Negara Malaysia boleh memberikan maklumat berkaitan yang dikehendaki di bawah *Fasal* ini kepada Perbadanan dalam masa yang sesuai.

73. *Fasal 68* bertujuan untuk memberi kuasa kepada Bank Negara Malaysia untuk memeriksa operasi suatu institusi anggota atas permintaan Perbadanan dan bidang pemeriksaan yang hendak dijalankan itu. Perbadanan diberi kuasa untuk menugaskan suatu audit bebas berkenaan dengan pemeriksaan di bawah *fasal 68(1)* atau subseksyen 69(1) tertakluk kepada kebenaran bertulis terlebih dahulu daripada Bank Negara Malaysia.

74. *Fasal 69* bertujuan untuk memberi kuasa kepada Perbadanan untuk menjalankan pemeriksaan khas jika Perbadanan mempunyai sebab untuk mempercayai bahawa bayaran yang dibuat di bawah Bab 4 Bahagian IV hampir berlaku.

BAHAGIAN VI

75. Bahagian VI Rang Undang-Undang mengandungi peruntukan berhubung dengan tindakan ketetapan yang boleh diambil oleh Perbadanan terhadap seseorang institusi anggota.

76. *Fasal 70* bertujuan untuk membenarkan Bank Negara Malaysia memberitahu Perbadanan secara bertulis jika sesuatu institusi anggota telah terhenti, atau berkemungkinan untuk terhenti, berdaya maju.

77. *Fasal 71* mengandungi peruntukan khusus berkenaan dengan kuasa Perbadanan yang boleh dilaksanakan terhadap sesuatu institusi anggota yang takberdaya maju setelah diberitahu oleh Bank Negara Malaysia di bawah *Fasal 70*.

78. *Fasal 72* memperuntukkan bagi tempoh bagi penyelesaian mana-mana ketetapan yang dilaksanakan oleh Perbadanan di bawah *Fasal 71*.

79. *Fasal 73* bertujuan untuk memberi kuasa kepada Perbadanan untuk menubuhkan suatu Jawatankuasa Pentaksir untuk mengkaji semula kemunasabahan harga diperniagakan apabila dipohon oleh pemegang saham menentang. Apa-apa keputusan Jawatankuasa Pentaksir di bawah *fasal* ini hendaklah menjadi muktamad dan mengikat,

80. *Fasal 74* mengandungi peruntukan berhubung dengan pengambilalihan kawalan di bawah *fasal 71(1)(c)*.

81. *Fasal 75* bertujuan untuk memberi kuasa kepada Perbadanan atau mana-mana orang yang dilantik di bawah *fasal 71(1)(c)* untuk mengurangkan modal syer institusi anggota yang diambil alih dan untuk membatalkan syer institusi anggota itu dengan membuat suatu permohonan kepada Mahkamah Tinggi.

82. *Fasal 76* mengandungi peruntukan berhubung dengan penggantungan prosiding di bawah Akta.
83. *Fasal 77* mengandungi peruntukan berhubung dengan pelanjutan masa di bawah Akta.
84. *Fasal 78* memperuntukkan bagi apa-apa peruntukan dalam apa-apa perjanjian yang dibuat oleh institusi anggota sebelum pengambilalihan kawalan di bawah *fasal 71(1)(c)* adalah diatasi bagi maksud *fasal* itu.
85. *Fasal 79* mengandungi keadaan yang membenarkan sesuatu institusi anggota untuk mempunyai perbekalan dan pendahuluan lanjutan walau apa pun sekatan yang diperuntukkan dalam *fasal 76* dan *78*.
86. *Fasal 80* mengandungi senarai perjanjian kewangan dan transaksi yang tidak boleh ditamatkan walau apa pun sekatan dalam *Fasal 76*.
87. *Fasal 81* memperuntukkan bagi kuasa orang yang dilantik, penerima, pengurus atau penerima dan pengurus yang dilantik, masing-masing di bawah *fasal 71(1)(c)* dan *(d)*.
88. *Fasal 82* menyatakan kedahuluhan bayaran bagi deposit Islam dan deposit konvensional dalam hal keadaan suatu penggulangan sesuatu institusi anggota.
89. *Fasal 83* memperuntukkan bagi pemakaian Akta Bank dan Institusi-Institusi Kewangan 1989 atau Akta Bank Islam 1983 jika terdapat sesuatu percanggahan atau ketakselarasan di antara peruntukan Akta-akta itu dengan Akta ini.

BAHAGIAN VII

90. Bahagian VII Rang Undang-Undang mengandungi peruntukan berhubung dengan kesalahan di bawah Akta.
91. *Fasal 84* menjadikan suatu kesalahan bagi mana-mana orang untuk mengemukakan diri sebagai suatu institusi anggota.
92. *Fasal 85* memperuntukkan penalti bagi kesalahan membuat pernyataan palsu.
93. *Fasal 86* memperuntukkan penalti bagi kesalahan kerana gagal untuk memperuntukkan maklumat, dsb.
94. *Fasal 87* memperuntukkan penalti bagi kesalahan am.
95. *Fasal 88* mengandungi peruntukan mengenai kesalahan oleh pertubuhan perbadanan atau bukan perbadanan atau oleh pengarah, pegawai, pengawal, dsb.
96. *Fasal 89* bertujuan untuk memberi kuasa kepada Perbadanan untuk mengkompaun kesalahan.

97. *Fasal 90* memberi kuasa kepada mahkamah untuk mengeluarkan suatu perintah kepada orang yang disabitkan untuk mebetulkan pelanggaran di bawah Akta ini.
98. *Fasal 91* memberi kuasa kepada mahkamah untuk mengenakan hukuman kewangan tambahan terhadap orang yang disabitkan.
99. *Fasal 92* bertujuan untuk membenarkan Perbadanan untuk memohon kepada Mahkamah Tinggi bagi suatu perintah pematuhan atau penyekatan terhadap seseorang supaya orang itu mematuhi.
100. *Fasal 93* memperuntukkan bahawa apa-apa denda yang kena dibayar di bawah Akta ini boleh didapatkan dan dikuat kuasa oleh Perbadanan dan apabila didapatkan, dibayar ke dalam dan menjadi sebahagian daripada Kumpulan Wang Disatukan.

BAHAGIAN VIII

101. Bahagian VIII Rang Undang-Undang mengandungi peruntukan am.
102. *Fasal 94* memperuntukkan bagi pengemukaan maklumat kepada Perbadanan oleh mana-mana institusi anggota atau daripada mana-mana perbadanan yang berkaitan dengan mana-mana institusi anggota mengenai apa-apa perkara yang berhubungan dengan urusan atau hal-ehwal institusi anggota atau perbadanan yang berkaitan itu walau apa jua pun sekatan di bawah Akta Bank dan Institusi-Institusi Kewangan 1989 atau Akta Bank Islam 1983.
103. *Fasal 95* memberi hak kepada Bank Negara Malaysia bagi maklumat yang didapati oleh atau dikemukakan kepada Perbadanan berkenaan dengan urusan dan hal-ehwal institusi anggota atau mana-mana subsidiarinya atau gabungannya atau mana-mana orang yang berurusan dengan institusi anggota itu atau mana-mana subsidiarinya atau gabungannya, yang berkaitan dengan keselamatan dan kukuhan, atau pengendalian, institusi anggota itu.
104. *Fasal 96* memperuntukkan bagi pengiktirafan kehakiman mengenai apa-apa fakta atau perkara yang dikehendaki untuk disiarkan di bawah Akta dan apa-apa fakta atau perkara yang dinyatakan dalam apa-apa perakuan yang dikeluarkan di bawah Akta.
105. *Fasal 97* melarang penggulangan Perbadanan.
106. *Fasal 98* memperuntukkan bagi imuniti orang yang disebutkan dalam menjalankan apa-apa tindakan atau pembuatan apa-apa pernyataan di bawah Akta atau dalam mengeluarkan apa-apa perintah, arahan, petunjuk, notis atau apa-apa jua pun benda lain yang dikeluarkan di bawah Akta dengan syarat bahawa apa-apa tindakan atau pernyataan demikian dilakukan atau dibuat dengan suci hati.
107. *Fasal 99* memperuntukkan bagi pemakaian Akta Perlindungan Pihak Berkuasa Awam 1948 dan ketidakpakaian Akta Peminjam Wang 1951.

108. *Fasal 100* bertujuan untuk memberi kuasa kepada Perbadanan untuk membuat undang-undang kecil, arahan, garis panduan, pekeliling atau nota dan, dengan kebenaran Menteri, peraturan-peraturan, kaedah-kaedah atau perintah.

IMPLIKASI KEWANGAN

Rang Undang-Undang ini akan melibatkan Kerajaan Persekutuan dalam perbelanjaan kewangan tambahan yang amaunnya tidak dapat ditentukan sekarang.

[PN(U²) 2456]